

萬 有 文 庫

第 二 集 七 百 種

王 雲 五 主 編

人 境 廬 詩 草

黃 遵 憲 撰

商 務 印 書 館 發 行





人 境 廬 詩 草

黃 遵 憲 撰

國 學 基 本 叢 書

編主五雲王

庫文有萬

種百七集二第

草詩廬境人

中華民國二十六年三月初版

撰者 黃 遵 憲

發行人 王 雲 五  
上海河南路

印刷所 商 務 印 書 館  
上海河南路

發行所 商 務 印 書 館  
上海及各埠

(本書校對者徐鼎銘)

# 嘉應黃先生墓誌銘

新會 梁啓超撰

國家自甲午喪師以後。勢益不競。謀國者尙泄泄。未知改圖。獨德宗皇帝大奮神斷。明詔天下。改變百度。而是時各行省大吏奉行詔書最力者。惟湖南巡撫義寧陳公寶箴。而相與助其成者。則嘉應黃先生公度也。先生時方以湖南鹽法道署理按察使。與陳公戮力殫精。朝設而夕施。綱舉而目張。而其尤爲先生精心所措注者。則曰保衛局。保衛局者。略仿外國警察之制。而凡與民利民瘼相麗爲一方。民力所能自舉者。悉統焉。擇其鄉邑之望分任之。而吏董其成。初布之初。民頗疑誠。後乃大驩。先生方欲推布一切。目圖久遠。而朝局變。黨禍起。先生與陳公得罪而去。而天下事益不可爲。嗟乎。古有以一人之用。舍係一國之興亡者。觀於先生其信之矣。先生諱遵憲。世爲嘉應州人。曾祖諱學詩。祖諱際昇。父諱鴻藻。官廣西知府。皆以先生貴。封贈榮祿大夫。先生以拔貢生中式光緒二年順天鄉試舉人。旋隨使日本。歷官四十年。有大小久暫之不同。而皆舉其職。當爲日本使館參贊也。日本方縣我琉球。且覬及朝鮮。先生告使者。乘彼謀未定。先發制之。具牘數千言。陳利害甚悉。東人至今誦之。而當事不省。不二十年。二屬遂相繼不保。又爲英之新嘉坡美之舊金山總領事矣。美人嫉吾民之僑彼境者。蓄志擯之。先生旣以先事禦之。之謀

告其上而不用。乃盡其力所能及。以爲捍衛。美政府嘗藉口衛生。係吾民數千。先生數語。捭闔而脫之。且責償焉。吾嘗遊美洲。去先生爲領事時。且二十餘年矣。而吾民尙稱道此事。不容口。先生居外國久。於其上下情形。內外形勢。洞幽察隱。故凡有所應付。莫不迎刃而解。而大吏亦稍稍知先生能外交。故每以事相屬。江鄂四省教案。積數十起。連十數年。文牘盈尺。莫能斷結。及先生受委。則浹月而決之。教士橋舌而不敢爭異。時沿江沿海。劃地爲市。租借外旅。命曰租界。始事者昧於國際法。於界內。畀以治外法權。喪威失權。悔不可追。先生恫之。值甲午之役。約以蘇州杭州兩處爲租界。予日本。授受之際。先生適主其事。乃曰。蘇杭腹地。非江海口岸比。因議自營市政。凡所以便外旅者。纖悉備至。而獨於治外法權。則靳焉。日本主者莫能難也。殆畫諾矣。適有以蜚語相中者。謂先生受外賂。爲它人計便安。約遂廢。而日本亦撤其使歸。兩國同以此事譴其使。而天下萬國。則謂日本之舉爲計獨得也。先生雖以外交知名當世。然受兩使命。皆中沮。光緒二十一年。奉旨入觀。以道員帶卿銜。授出使大臣。駐德國。時德人方圖膠州。憚先生來折其機牙。迺設詞以撼我政府。卒尼其行。光緒二十四年。復以三品京堂候補充出使日本大臣。時先生方解湖南按察使任。養疾上海。淹留未行。而黨禍卒起。緹騎繞先生室者兩日。幾受羅織。事雖得白。使事亦解。先生遂歸田里。光緒三十一年二月二十三日。以疾卒於家。嗚呼。以先生之明於識。練於事。忠於國。使稍得藉手。其所措施。豈可限量。而乃使之浮沈於羣吏之間者。且數十年。晚遭際會。似可稍展其所蘊矣。

而事變忽起。所志不終遂。且乃憂讒畏譏。流離失職而死。此豈天之所爲耶。先生讀書有精識遠見。不囿於古。不徇於今。嘗思成一家言。曰演孔篇。未成。而所成之日本國志四十卷。當吾國二三十年以前。羣未知日本之可畏。而先生此書則已言日本維新之效。成則且霸。而首先受其衝者爲吾中國。及後而先生之言盡驗。以是人尤服其先見。先生爲文章。務取暢達。不苟爲夸飾。至其爲詩。則精思渺慮。盤礴而莫測其際。平生所作逾千首。自哀集得六百餘首。曰人境廬詩草。自其少年稽古學道。以及中年閱歷世事。暨國內外名山水。與其風俗政治形勢土物。至於放廢而後。憂時感事。悲憤伊鬱之情。悉託之於詩。故先生之詩。陽開陰闔。千變萬化。不可端倪。於古詩人中。獨具境界。先生娶葉氏。誥封夫人。子四人。曰冕。曰鼎崇。曰履剛。曰璇泰。履剛早殤。女子二。適鍾適梁。先生之卒也。冕方隨節日本。奔喪歸。旋以毀卒。今上皇帝紀元之三月。鼎崇。璇泰始奉其喪葬於梅南黃居坪之原。先生之從弟曰遵庚。以狀請銘。且曰先兄志也。啓超以弱齡得侍先生。惟道惟義。以誨以教。獲罪而後。交親相棄。亦惟先生咻喚振厲。拳拳懇懇。有同疇昔。先生前卒之一歲。詒書啓超曰。國中知君者無若我。知我者無若君。然則啓超雖不文。又安敢辭。銘曰。士失職者多矣。而獨於斯人焉。奚悲。悲其一身之進退死生。與一國之榮悴兮。相依。謂天不欲平治天下。曷爲篤生此才。槃魄而權奇。謂天欲平治天下。曷爲挫鑠窘辱。拂亂之不已。又中道而奪之。其所志所學。蟠天際地。曾不得以百一自見於時。若夫事業文章之在人耳目者。則乃其平生之所不屑爲。然且舉九

州之駿足十駕焉而莫之能追。則夫其所旁薄鬱積而未發者。又安得而測知。而今也。悉隨其形神精魄。灰化蛻委。萬劫不復。而永闕於茲。白日墜兮露滋。楊蕭蕭兮蔓離離。九原不作兮。吾道誰與歸。儀型先民。兮視此辭。

# 自序

余年十五六。卽學爲詩。後以奔走四方。東西南北。馳騁少暇。幾幾束之高閣。然以篤好深嗜之故。亦每以餘事及之。雖一行作吏。未遽廢也。士生古人之後。古人之詩。號專門名家者。無慮百數十家。欲棄去古人之糟粕。而不爲古人所束縛。誠戛戛乎其難。雖然。僕嘗以爲詩之外有事。詩之中有人。今之世異於古。今之人亦何必與古人同。嘗以胸中設一詩境。一曰復古人比興之體。一曰以單行之神。運排偶之體。一曰取離騷樂府之神理而不襲其貌。一曰用古文家伸縮離合法以入詩。其取材也。自羣經三史。逮於周秦諸子之書。許鄭諸家之註。凡事名物名同於今者。皆採取而假借之。其述事也。舉今日之官書會典。方言俗諺。以及古人未有之業。未關之境。耳目所歷。皆筆而書之。其練格也。自曹鮑陶謝李杜韓蘇。訖於晚近小家。不名一格。不專一體。要不失乎爲我之詩。誠如是。未必遽躋古人。其亦足以自立矣。然余固有志焉。而未逮也。詩有之曰。雖不能至。心嚮往之。聊書於此。以俟他日。光緒十七年六月。在倫敦使署。公度自序。



# 人境廬詩草目錄

卷一古今體詩共七十二首

感懷

乙丑十一月避亂大埔三河虛

拔自賊中述所聞

潮州行

喜聞恪靖伯左公至官軍收復嘉應賊盡滅

亂後歸家

送女弟

二十初度

游豐湖

長子履端生

雜感

哭張心谷士駒三首

山歌

生女

庚午六月重到豐湖誌感

游潘園感賦

香港感懷十首

寓汕頭旅館感懷寄梁詩五 居實

將至潮州又寄詩五

鐵漢樓歌

和周朗山 見贈之作

寄和周朗山

春夜懷蕭蘭谷 光泰

聞詩五 婦病甚

懷詩五

爲詩五悼亡作

庚午中秋夜始識羅少珊文仲於矮屋中途偕詩五共登明遠樓看月少珊有詩作此追和時癸酉

孟秋也

羊城感賦六首

卷二古今體詩共五十五首

寄四弟

人境廬雜詩

將應廷試感懷

出門

由輪舟抵天津作

水濱

武清道中作

早行

慷慨

月夜

代東寄詩五蘭谷並問諸友

狂歌示胡二曉岑

重九日雨獨遊醉中作

別賴雲芝同年

鶴年

爲蕭少尉步青作

烏之珠歌

田橫島

和鍾西耘庶常德祥津門感懷詩

福州大水行同張樵野丈蔭桓龔藹人丈易圖作

將應順天試仍用前韻呈藹人樵野丈

述懷再呈藹人樵野丈

大獄四首

別張簡唐恩敬並示陳緯尙

元焯

三十初度

將之日本題半身寫真寄諸友

又寄內子

卷三古今體詩共四十八首

由上海啓行至長崎

西鄉星歌

石川鴻齋英偕僧來謁張副使誤謂爲僧鴻齋作詩自辯余賦此以解嘲

不忍池晚遊詩

宮本鴨北以舊題長華園詩索和

櫻花歌

陸軍官學校開校禮成賦呈有栖川熾仁親王

都踊歌

庚辰四月重野成齋安釋岩谷六一偈日下部東作鳴鶴蒲生綱齋重章岡鹿門千仞諸君子約遊後樂園園卽源光國舊藩邸感而賦此

送穴戶磯公使之燕京

大阪

游箱根

宮本鴨北索題晃山圖卽用卷中小野湖山詩韻

近世愛國志士歌

赤穗四十七義士歌

罷美國留學生感賦

徐晉齋觀察壽朋吳瀚濤貳尹廣需隨使美洲道出日本余飲之金壽樓翰濤卽席有詩和韻以贈

流求歌

卷四古今體詩共三十二首

奉命爲美國三富蘭西士果總領事留別日本諸君子

爲佐野雪津常民題觚亭

海行雜感

逐客篇

紀事

馮將軍歌

九姓漁船曲

感懷

卷五 古今體詩共二十七首

八月十五夜太平洋舟中望月作歌

歸過日本誌感

舟中驟雨

到香港

到廣州

肇慶卅中

將至梧州誌痛

游七星巖

夜宿潮州城下

人境廬詩草 目錄

夜泊

遠歸

鄉人以余遠歸爭來詢問賦此誌感

今夕

春夜招鄉人飲

小女

卽事

下水船歌

閉關

春暮偶游歸飲人境廬

拜曾祖母李太夫人墓

遣悶

寒食

夜飲



日本國志書成誌感

十月十九日至滬初隨何大臣知璋使日本卽於是日由上海東渡今十二年矣

由潮州泝流而上駛風舟行甚疾

夜泊高陂其地多竹

卷六古今體詩共六十九首

自香港登舟感懷

過安南西貢有感

錫蘭島臥佛

溫則宮朝會

重霧

倫敦大霧行

在倫敦寫真誌感

得梁詩五書

今別離

憶胡曉岑

感事三首

寄懷左子與領事乘隆

送承伯純厚吏部東歸

歲暮懷人詩

春遊詞

鬱鬱

登巴黎鐵塔

蘇彝士河

九月十一夜渡蘇彝士河

舟泊波塞是夕大雨蓋六月不雨矣

卷七古今體詩共五十首

夜登近海樓

續懷人詩

新嘉坡雜詩十二首

以蓮菊桃雜供一瓶作歌

眼前

寓章園養疴

番客篇

養疴雜詩

卷八古今體詩共五十七首

悲平壤

東溝行

哀旅順

哭威海

偕葉損軒大莊夜談

乙未二月二十七日公祭沈文肅公祠

爲同年吳德瀟壽其母夫人

馬關紀事

晚渡江

降將軍歌

五月十三夜江行望月

臺灣行

度遼將軍歌

閏月飲集鍾山送文芸閣學士廷式假歸兼懷陳伯嚴吏部三立

用寫經齋體送葉損軒之申江

立秋日訪易實甫順鼎遂偕游秦淮和實甫作

又和實甫

元武湖歌和龍松岑繼棟

九月初三夜招袁重黎柯巽庵梁節庵王晉卿諸君小飲和節庵韻

上海喜晤陳伯嚴

題黃佐廷贈尉遺像

贈梁任父同年

寄女

感懷呈樵野尙書丈卽用話別圖靈字韻

放歌用前韻

題樵野丈運甓齋話別圖

和沈子培同年曾植

游仙詞仍用沈乙庵韻

元朱碧山銀槎歌

爲何翹高兵部藻翔題象山圖

贈曾重伯編修

上黃鶴樓

上岳陽樓

長沙弔賈誼宅

書憤

支離

卷九古今體詩共一百三十六首

紀事

放歸

九月朔日啓程由上海歸舟中作

到家

感事

人境廬之隣有屋數間余購取其地葺而新之有樓巍然獨立無壁南武山人爲書一聯曰陸沈欲  
借舟權住天問翻無壁受呵因足成之

寒夜獨坐臥虹榭

小飲息亭醉後作

仰天

雁

酬劉子巖同年疾

己亥雜詩

己亥續懷人詩

臘月二十四日詔立皇嗣感賦

卷十古今體詩共七十六首

庚子元旦

杜鵑

初聞京師義和團事感賦

寄懷邱仲闕 逢甲

感事又寄邱仲闕

述聞

七月十五夜暑甚看月達曉

南澳修慧寺千佛塔歌

五禽言

再述

人境廬詩草 目錄

七月二十一日外國聯軍入犯京師

聞車駕西狩感賦

有以守社稷爲言者口號示之

中秋夜月

讀七月二十五日行在所發罪己詔書泣賦

諭剿義和團感賦

聞駐蹕太原

聞車駕又幸西安

久旱雨霽邱仲闕過訪飲人境廬仲闕有詩兼慨近事依韻和之

再用前韻酬仲闕

三用前韻

四用前韻

五用前韻

六用前韻



七用前韻

八用前韻

天津紀亂十二首

京亂補紀六首

京師

三哀詩

和平里行和邱仲闕

卷十一古今體詩共十九首

聶將軍歌

夜起

羣公

奉諭改於八月二十四日回鑾感賦

和議成誌感

啓鑾喜賦

車駕駐開封府

李肅毅侯挽詩四首

寄題陳氏峭廬

病中紀夢述寄梁任父

# 人境廬詩草卷一

清嘉應黃遵憲公度撰

感懷

世儒誦詩書。往往矜爪觜。昂頭道皇古。抵掌說平治。上言三代隆。下言百世俟。中言今日亂。痛哭繼流涕。摹寫車戰圖。胼胝過百紙。手持井田譜。畫地期一試。古人豈我欺。今昔奈勢異。儒生不出門。勿論當世事。識時貴知今。通情貴閱世。卓哉千古賢。獨能救時弊。賈生治安策。江統徙戎議。

有清膺天命。仁澤二百年。聖君六七作。上追堯舜賢。熙隆全盛時。蓋如日中天。帷闕外戚患。干戈藩鎮權。煽虐奄人毒。煬竈權臣奸。百弊咸蕩滌。王道同平平。邇者盜潢池。神州洿腥羶。治久必一亂。法弊無萬全。謂由吏惰窳。亦坐民殷闐。當世得失林。未可稽陳編。儒生拾古語。謂當罪己愆。庚申之役。有上疏請下罪己詔者。顯皇十

一載。憂虞忱深淵。拔擢盡豪傑。力能扶危顛。惟念大亂平。正當補弊偏。且濡活溪筆。看取穹碑鐫。

吁嗟兩楹奠。聖歿微言絕。戰國諸子興。大道幾滅裂。劫灰出秦燔。六籍半殘缺。皇皇孝武詔。羣言罷一切。別白定一尊。萬世循軌轍。遺書一萌芽。衆儒互拾掇。異同晰石渠。講習布綿纈。戴憑席互爭。五鹿角叢折。泊乎許鄭出。褒然萬人傑。宋儒千載後。勃窣探理窟。自詡不傳學。乃剽思孟說。講道稍僻違。論事頗迂闊。

萬頭趨科名。一意相媚悅。聖清崇四術。衆賢起頽頡。顧闕關初塗。段王揚大烈。審意得古訓。沈晦悉爬抉。讀史辨豕亥。訂禮分袒襲。上溯考據家。僅附文學列。儒于九流中。亦祇一竿揭。矧又某氏儒。塗徑各歧別。均之筐篋物。操此何施設。大哉聖人道。百家盡囊括。至德如淵濶。尙未一間達。區區漢宋學。烏足尊聖哲。畢生事鑽仰。所慮吾才竭。

乙丑十一月避亂大埔三河虛

六月中興洗甲兵。金陵王氣復昇平。豈知困獸猶能鬪。尙有羣蛙亂跳鳴。一面竟開逋寇網。三邊不築受降城。細民堅壁知何益。翹首同瞻大帥旌。

南風不競死聲多。生不逢辰可若何。人盡流離呼伯叔。時方災難又干戈。諸公竟以鄰爲壑。一夜喧呼賊渡河。聞說牙璋師四起。將軍翻用老廉頗。

星斗無光夜色寒。一軍驚擁將登壇。爭功士聚沙中語。遇敵師從壁上觀。誰敢倚公爲砥柱。可憐報國只心肝。東南一局全輸卻。當局翻成袖手看。

七年創痛記分明。無數沙蟲殉一城。己未二月。賊破嘉應。知州文壯。烈公晟死之。從而殉者萬餘人。逐鹿狂奔成鋌走。傷禽心怯又弦驚。

爺娘弟妹牽衣語。南北東西何處行。一葉小舟三十口。流離虎穴脫餘生。

拔自賊中述所聞

紅巾繫我腰。綠紗裹我頭。男兒重橫行。阿嫂汝莫愁。  
朝傾百斛酒。暮飽千頭羊。時時賭博簞。夜夜迎新娘。  
今日阿哥妻。明日旁人可。但付一馬馱。何用分汝我。  
四更起開門。月黑陰雲堆。幾時踏殺羊。老虎來不來。

### 潮州行

人生亂離中。所謀動乖忤。一夕輒三遷。蹤跡無定所。自從居三河。謂是安樂土。世情誰念亂。百事恣凌侮。  
交交黃鳥啼。此邦不可處。一水通潮州。且往潮州住。是時北風寒。平江蕩柔櫓。行行將近城。炊煙密如縷。  
行舟忽不前。有盜伏林莽。起驚賊已來。快櫓飛如雨。舟人急繫舟。揮戈左右拒。翻懼力不敵。轉逢彼賊怒。  
扣舷急相呼。不如任攜取。流離患難來。行篋無幾許。但飽羣賊囊。免更遭劫虜。一聲霹靂礮。殺賊賊遽去。  
虎口脫餘生。驚喜泣相語。回看諸弟妹。僵伏尙如鼠。起起呼使坐。輒語相慰撫。扶牀面色灰。謬言不畏懼。  
吁嗟患難中。例受一切苦。須臾達潮州。急覓東道主。剪紙重招魂。招魂江之浦。

### 喜聞恪靖伯左公至官軍收復嘉應賊盡滅

諸侯齊築受降城。狂喜如雷墮地鳴。終累吾民非敵國。  
嘉慶間剿辦白蓮教匪。仁宗詔曰。自古只聞用兵於敵國。未聞用兵於吾民。如蔓延日久。是賊是民。  
皆吾赤子。何忍誅戮。顯皇曾手書此詔。普告臣下云。又從據亂轉昇平。黃天當立空題壁。赤子雖饑莫弄兵。天下終無白頭賊。中原

羣盜漫縱橫。

恢恢天網四圍張。羣賊空營走且僵。舉國望君如望歲。將軍擒賊早擒王。十年竊號留餘孽。六百名城作戰場。今日平南馳露布。在天靈爽慰先皇。

亂後歸家

遂有還家樂。跳梁賊盡平。舉家開笑口。一棹出江城。兒女團團坐。風波自在行。驚魂猶未定。夜半莫呼兵。卽別潮州去。還從蓬辣歸。累人行篋少。滯我客舟遲。顛倒歸來夢。驚疑痛定思。便還無處所。已喜免流離。一炬成焦土。先人此敝廬。曾王父所建築有家真壁立。無樹可巢居。小婦啼開篋。羣童喜荷鋤。苔花經雨長。狼藉滿家書。

便免顛連苦。相依此一窩。窗虛添夜冷。屋漏得天多。豺虎中原氣。蛟螭海上波。掃除勤一室。此志恐銷磨。

送女弟

阿爺有書來。言頗傾家貲。箱篋四五事。莫嫌嫁衣希。阿母開篋看。未看先長歎。吾家本富饒。頻歲遭亂離。累葉積珠翠。歷劫無一遺。舊時典衣庫。爛漫堆人衣。今日將衣質。庫主知是誰。掃葉添作薪。烹穀持作糜。尺布尙可縫。親手自維持。行行手中線。離離五色絲。一絲一淚痕。線短力旣疲。卽此區區物。艱難汝所知。所重功德言。上報慈母慈。

中原有舊族。遷徙名客人。過江入八閩。展轉來海濱。儉嗇唐魏風。蓋猶三代民。就中婦女勞。尤見風俗純。雞鳴起汲水。日落猶負薪。盛裝始脂粉。常飾唯綦巾。汝我張黃家。頗亦家不貧。上溯及太母。劬勞無不親。客民例操作。女子多苦辛。送汝轉念汝。恨不男兒身。

阿母性慈愛。愛汝如珍珠。一日三摩挲。未嘗離須臾。今日送汝去。執手勞踟躕。汝姑哀寡鵠。哀腸多鬱紆。弟妹尙穉幼。呀呀求乳雛。太母持門戶。人言勝丈夫。靡密計米鹽。辛勤種瓜壺。一門多秀才。各自誇巾裾。粥粥擾羣雌。申申冒女褻。汝須婉以順。朝夕承歡娛。歡娛一以承。我心一以愉。待汝一月圓。歸來話區區。

二十初度

墮地添丁日。時平萬戶春。我生遂多事。臣壯不如人。離亂艱難際。窮愁現在身。摩挲腰下劍。龍性那能馴。

游豐湖

西湖吾未到。夢想或遇之。濛濛水雲鄉。荷花交柳枝。今日見豐湖。萬頃青琉璃。持問老東坡。杭穎誰雄雌。洑旬困積暑。潑眼驚此奇。恍如畫圖中。又疑夢寐時。人生爲何事。畢世狂奔馳。黃塵沒馬頭。勞勞不知疲。嗟我不能仙。豈能免人羈。要留一片地。自謀老來私。悠悠湖上雲。耿耿我所思。下與鷗鷺盟。上告雲天知。濃綠潑雨洗。森森竹千個。亭亭立荷葉。萬碧含露唾。四圍垂柳枝。隨風任顛簸。中有屋數椽。周遭不爲大。羅山峙其西。豐湖繞其左。關門不見山。鑿穴疊石作。前檐響欐檉。後屋旋水磨。扶筇朝看花。入夜不一坐。

亭午垂湘簾。倦便枕書臥。偕婦說家常。呼兒問書課。敲門剝啄聲。時有老農過。君看此屋中。非他正是我。行移家具來。坐待鄰里賀。

斜陽照空林。徘徊未忍去。多戀究多累。掉頭未可住。我生二十年。初受塵垢汙。家計竭中乾。俗狀作先驅。飛鳥求枝棲。三匝方繞樹。大海泛浮萍。歸根定何處。渺茫發大願。天意肯輕付。況今千里來。擔簦期一遇。行鎖矮屋中。蒸餓熱毒注。密如營窠蜂。困似涸轍鮒。走雷轉腸鳴。渴水乞沫响。誰能出塵世。一脫束縛苦。回頭望此湖。萬頃迷烟霧。夢魂時一遊。且記湖邊路。

長子履端生

剛是花生日。春風鷺一廬。愛防牛折齒。慚詠鳳將雛。急喜先求火。癡心到買書。長安傳一紙。歡慰定何如。

雜感

少小誦詩書。開卷動齟齬。古文與今言。曠若設疆圉。竟如置重譯。象胥通蠻語。父師遞流傳。慣習忘其故。我生千載後。語音雜僞楚。今日六經在。筆削出鄒魯。欲讀古人書。須識古語古。唐宋諸大儒。紛紛作箋注。每將後人心。探索到三五。性天古所無。器物目未睹。妄言足欺人。數典既忘祖。燕相說郢書。越人戴章甫。多歧道益亡。舉燭乃筆誤。

大塊鑿混沌。渾渾旋大圓。隸首不能算。知有幾萬年。羲軒造書契。今始歲五千。以我視後人。若居三代先。



俗儒好尊古。日日故紙研。六經字所無。不敢入詩篇。古人棄糟粕。見之口流涎。沿習甘剽盜。妄造叢罪愆。黃土同搏人。今古何愚賢。卽今忽已古。斷自何代前。明窗敵流離。高爐爇香煙。左陳端溪硯。右列薛濤箋。我手寫我口。古豈能拘牽。卽今流俗語。我若登簡篇。五千年後人。驚爲古爛斑。

造字鬼夜哭。所以示悲憫。衆生殉文字。蚩蚩一何蠢。可憐古文人。日夕雕肝腎。儷語配華葉。單詞畫蚯蚓。古近辨詩體。長短成曲引。洎乎制義興。卷軸車連軫。常恐後人體。變態猶未盡。吁嗟東京後。世茶文益振。文勝失則弱。體竭勢已窘。後有王者興。張網羅賢俊。決不以文章。此語吾敢信。但念廢棄後。巧拙同泯泯。欲求覆瓿。已難拾灰燼。我今展卷吟。徒使後人哂。

周公作禮樂。謂矯世弊害。秦皇焚詩書。乃使民鬻瞶。宋祖設書館。以禮羅措大。吁嗟制藝興。今亦五百載。世儒習固然。老死不知悔。精力疲丹鉛。虛榮逐冠蓋。勞勞數行中。鼎鼎百年內。束髮受書始。卽已縛紐械。英雄盡入彀。帝王心始快。豈知流寇亂。翻出擾鋤輩。誦經賊不避。清談兵旣潰。儒生用口擊。國勢幾中殆。從古禍患來。每在思慮外。三代學校亡。空使人材壞。

謂開明經科。所得學究耳。謂開制策科。亦祇策士氣。謂開詞賦科。浮華益無恥。持較今世文。未易遽軒輊。隋唐制科後。變法屢興廢。同以文章名。均之等廢契。譬如探籌策。亦可得茂異。狗曲出何經。驢券書博士。所用非所習。祇以叢罵詈。亦有高材生。各自矜爪鷲。祖漢誇考據。媚宋爭義理。彼此互是非。是非均一鄙。

茫茫宇宙間。萬事等兒戲。作詩一長吟。聊用自娛喜。

哭張心谷士駒三首

匆匆事業了潮州。竟認潮州作首邱。哀泣一家新故鬼。此邦與汝定何讐。

君之生之婚之卒暨君親之歿皆在潮州

半盂麥飯一罈香。終有人來拜墓堂。將爲君立嗣只恨錦囊無贖稿。廣陵散絕并琴亡。

君歿後余搜君遺稿及其先人稿均不可得

一隊同游少年輩。兩年零落九原多。頻頻淚到心頭滴。便恐明朝兩鬢皤。

山歌

土俗好爲歌。男女贈答。頗有子夜讀曲遺意。採其能筆於書者得數首。

自煮蓮羹切藕絲。待郎歸來慰郎饑。爲貪別處雙雙箸。只怕心中忘却匙。  
人人要結後生緣。儂只今生結目前。一十二時不離別。郎行郎坐總隨肩。  
買梨莫買蜂咬梨。心中有病沒人知。因爲分梨故親切。誰知親切轉傷離。  
催人出門雞亂啼。送人離別水東西。挽水西流想無法。從今不養五更雞。  
隣家帶得書信歸。書中何字儂不知。等儂親口問渠去。問他比儂誰瘦肥。  
一家女兒做新娘。十家女兒看鏡光。街頭銅鼓聲聲打。打着中心只說郎。  
嫁郎已嫁十三年。今日梳頭儂自憐。記得初來同食乳。同在阿婆懷裏眠。

自剪青絲打作條。親手送郎將紙包。如果郎心止不住。看儂結髮不開交。  
第一香櫟第二蓮。第三檳榔個個圓。第四夫容五棗子。送郎都要得郎憐。

生女

拜佛拈花後。居然見汝生。繫絲誰健婦。爭乳奈雛兄。覓果年來事。游山嫁畢情。一齊到心坎。杯酒醉還傾。  
庚午六月重到豐湖誌感

湖光澈澈柳陰陰。又作隄邊叉手吟。客與名山同惜別。人逢舊雨漸交深。何時葛令移家住。猶是菟裘養老心。自揀黃柑親手種。他年看汝綠成林。

遊潘園感賦

神山左股割蓬萊。惘惘游仙夢一回。海水已乾田亦賣。主人久易我纔來。棲梁燕子巢林去。對鏡荷花向壁開。彈指須臾千載後。幾人起滅好樓臺。

香港感懷十首

彈指樓臺現。飛來何處峯。爲誰刈藜藿。遍地出芙蓉。以鴉片肇禍開港後進口益多方丈三神地。諸侯百里封。居然成重

鎮。高壘蠹狼烽。

豈欲珠崖棄。其如城下盟。帆檣通萬國。壁壘逼三城。虎穴人雄據。鴻溝界未明。割地以後。每以海界爭論傳聞哀痛詔。

猶灑淚縱橫。宜廟遺詔深以棄香港爲恥。

會長虬髯客。豪商碧眼胡。金輪銘武后。香港城名域多利即女主名也。寶塔禮耶穌。火樹銀花耀。氈衣繡縷鋪。五丁開鑿

後。欲界亦仙都。

盜喜逋逃藪。兵誇曳落河。官尊大呼藥。官之尊者亦稱總督。客聚衆婁羅。王面鑄金寶。蠻腰跨革鞞。斑闌衣服異。關

吏莫誰何。港不設關。

沸地笙歌海。排山酒肉林。連環屯萬室。地勢如環故名上中下三環。尺土過千金。民氣多羶行。夷言學鳥音。黃標千萬

積。翻訝屋沈沈。

便積金如斗。能從聚窟消。蠻雲迷寶髻。脂夜蕩花妖。龍女爭盤鏡。鮫人鬪織綃。珠簾春十里。難遣可憐宵。

博物張華志。千間廣廈開。摩挲銅狄在。悵望寶山回。大鳥如人立。長鯨跋浪來。官山還府海。人力信雄哉。

流水游龍外。平波又畫橈。佛猶誇國樂。奴亦挾天驕。御氣毳千尺。馳風馬百驍。街彈巡赤棒。獨少市聲囂。

指北黃龍飲。從西天馬來。飛輪齊鼓浪。祝嘏日鳴雷。凡他國軍艦初至必然嘏二十一響以敬地主西人名曰祝嘏。中外通喉舌。橫縱積

貨財。登高遙望海。大地故恢恢。

遣使初求地。高皇全盛時。乾隆四十八年英遣使馬六州誰鑄錯一慟失燕脂。鑿空蠶叢闢。噓雲蜃氣奇。

山頭風獵獵。猶自誤龍旗。

寓汕頭旅館感懷寄梁詩五居實

策策秋聲木葉乾。百端蕭瑟入心肝。顛風斷渡鈴能語。古月懸天鏡獨看。未到中年哀樂備。無多同調別離難。巡簷繞室行千徧。剛對孤燈又依闌。

將至潮州又寄詩五

片帆遙指鳳凰城。屈指家山尙幾程。以我風塵憔悴色。共君骨肉別離情。一燈縮縮棲鴉影。四壁蕭蕭戰馬聲。回首六年離亂事。夢餘猶覺客心驚。乙丑冬月避亂居潮州寇退乃返

鐵漢樓歌

濕雲漠漠山有無。登城四望遙踟躕。頽垣敗瓦不可踏。劫灰昏黑堆城隅。剝苔剔蘚覓碑讀。字缺半亦形模糊。公無遺像有精氣。恍惚左右神風趨。憶公秉政宣仁日。自許稷契君唐虞。英名卓卓驚殿虎。辣手赫赫鋤城狐。同文獄起事一變。先生遂爾南馳驅。洞庭寒夜走蛟蜃。瀟湘清晝啼猩鼯。臣心萬折必東去。一生九死長征途。豈知章蔡恨未雪。謂臣雖死有餘辜。如飛判使暗挾刃。來取逐客寒頭顱。梅州太守亦義士。告語先生聲嗚嗚。先生湛然色不變。崛強故態猶狂奴。有朋誣諉細料理。對客酣飲仍歌呼。嗚呼先生真鐵漢。品題不愧眉山蘇。一樓高插北城角。中有七尺先生軀。鐵石心腸永不變。騰騰劍氣光滿廬。荔丹蕉黃並羅列。無有遠邇羣南膜。軍書忽報寇氛熾。官民空巷爭逃遁。先生獨坐北樓北。雙眼炯炯張虬鬚。

跳梁小鼠敢肆惡。公然裂毀無完膚。邇來彫瘵漸蘇息。無人收拾前規模。東坡已往仲謀死。起人忠義誰匡扶。金狄摩挐事如昨。鉛水清淚流已枯。我來憑弔空惻愴。呀呀屋上啼寒烏。

和周朗山珉見贈之作

噫嘻乎。儒生讀書不識羞。動誇虎頭燕頰取萬戶侯。萬戶侯耳豈足道。烏知今日稗瀛大海還有大九州。賤子生長南方陬。少年寂寂車前驕。當時乳虎氣食牛。衆作蟬噪蠅噍啁。小技蟲雕羞刻鏤。中間離亂逢百憂。紅塵蔽天森戈矛。我時上馬看吳鉤。嗚呼不能用吾謀。駒伏轅下鷹在鞵。看人貂蟬出兜鍪。幡然一笑先生休。矢人爲矢。轉人轉。蘭臺漆書吾箕裘。且呼古人相綢繆。打頭屋小歌聲遒。亦手帖括吟啾啾。時文國小原莒鄒。要知假道途。必由習爲諧媚爲便柔。招搖過市希急售。盜竊名器爲奸偷。平生所恥羞效尤。謗傷爭來撼樹蟬。非笑亦有槍榆鳩。立志不肯隨沈浮。一齊足敵衆楚咻。皇皇使者來軒輶。元珠出水黝然幽。珊瑚入網枝相膠。不才如憲亦兼收。一頭放出千人稠。其旁一客爲馬周。炯炯秋水橫雙眸。謂生此文無匹速。卽此已卜公侯仇。噫噫吾文原啞啞。公竟許我海與邱。感公知己淚一流。以公才氣命不猶。文不璜珮鳴琅璆。武不龍虎張旌旒。時時酒酣摩劓絛。蕭條此意將白頭。至今不願爲閒鷗。乘風猶來海上游。海波正寒風颼颼。中有蝮蛇從鶴鶩。盲雲怪雨無停留。老蛟欲泣潛魚憂。何物小魅不匿度。公然與龍爲仇讎。蒼梧回首雲正愁。公從仙人來十洲。公其爲龍求蟠虬。左揖洪崖右浮邱。招邀羣策同力戮。

號召百族相聚謀。鐵鎖重使支祈囚。赤文綠字光油油。重銘瑤宮修瓊樓。嗚呼此願何時酬。

寄和周朗山

拍手引鸞鳳。來從海上游。大鵬遇希有。兩鳥忽相酬。金作同心結。刀期繞指柔。各平湖海氣。商權共登樓。

春夜懷蕭蘭谷光泰

深巷曾無車馬喧。閉關我自枕書眠。平生放眼無餘子。與汝論交過十年。既覺夢都隨雨去。半開花欲放春顛。隔牆紅徧千株樹。何日能來看木棉。

聞詩五婦病甚

中年兒女更情長。宛轉重吟婦病行。終日菜羹魚醬外。帖書乞米藥鈔方。

懷詩五

萬族求饒益。營營各一途。俗情日紛擾。吾道便愁孤。波靜魚依藻。枝高鳳在梧。昨書言過我。翻又費招呼。

爲詩五悼亡作

畫閣垂簾別樣深。回廊響屐更無音。平生愛爾風雲氣。倘既消磨不自禁。

庚午中秋夜始識羅少珊文仲於矮屋中。遂借詩五共登明遠樓。看月少珊有詩作此。追和時癸酉孟秋也。

萬蠶食葉蠶聲酣。三條紅燭光炎炎。忽然大聲出鄰屋。偷窺有客掀欄衫。狂吟高歌徹屋瓦。兩目虎視方  
眈眈。此人豈容交臂失。闐然握手驚雄談。問名識是將家子。金版玉匱素所諳。事時發策問兵是。胸中武  
庫肯包含。我方掀簾促膝坐。昂頭有月來屋檐。此人此月此樓。豈可負此夕。輒邀吾友同追探。巍巍明遠  
樓。高插南斗南。鉦聲鼓聲宵戒嚴。我來不避官吏嫌。躡衣徑上梯百尺。憑欄要到塔七尖。天風吹衣怕飛  
去。汝我左右相扶攙。纖雲四捲天不夜。空中高懸圓明蟾。沈沈矮屋萬行瓦。昨者煮海今堆鹽。回頭卻望  
望東海。濛濛烟氣團蔚藍。其餘人家億萬戶。水波不動澄空潭。三更夜深風露重。下士萬蟻齊黑酣。大千  
世界共此月。今夕只照人兩三。雖然無肴無酒不得謀。一醉猶有驚人好句同掀髯。別來此月幾圓缺。三  
人兩地同觀瞻。匆匆三年忽已過。秋風重磨舊劍鐔。羊城相見執手笑。追述往事言呢喃。男兒竟作可憐  
蟲。等此蓄縮纏窠蠶。少珊少珊我且與汝共登越王之高臺。白雲往來駕兩騶。試尋黃屋左蠶舊霸業。陰  
符發篋溫韜鈴。不然泛舟南海南。乘風破浪張長帆。要借五十糖餌釣此巨鯨去。刳腹鬻肉供口饑。使君  
於此自不凡。何苦徒作風月談。要搏扶搖羊角直上九萬里。埋頭破屋心非甘。噫嘻乎。埋頭破屋心非甘。

羊城感賦六首

早潮晚汐打城門。玉漏聲催銅鼓喧。百貨均輸成劇邑。五方風氣異中原。舵舟輿轎山川險。帕首鞞刀府  
帥尊。今古茫茫共誰語。越王臺下正黃昏。



手挽三江盡北流。寇氛難洗越人羞。黃巢毒竟流天下。陶侃軍難進石頭。

金陵未克以前左帥致書曾文正公謂當從廣東進師文正不

謂然左帥又言於此始者於此終粵賊當滅於粵後其言竟驗

鈺鹿偶然完首尾。爛羊多賴得公侯。機槍掃盡紅羊挽。從此當朝息內憂。

際海邊疆萬里開。臣佗大長信奇才。平蠻看豎擎天柱。朝漢同登浴日臺。南極星辰原北拱。東流海水竟西回。喁喁鷓鴣波濤阻。獨有聯翩天馬來。

慷慨爭揮壯士戈。洗兵竟欲挽天河。苦煩父老通印笮。難禁奸民教尉佗。祆廟火焚氛更惡。鮫人珠盡淚猶多。紛紛和戰都非策。聚鐵雖堅奈錯何。

戰臺祠廟巋然存。雙闕嵯峨聳虎門。誰似伏波饒將略。猶聞蹈海報君恩。要荒又議珠崖棄。霸業彌思蠶屋尊。最是凋零蘇武節。無人海外賦招魂。

木棉花落絮飛初。歌舞岡前夜雨餘。關道鸞聲都寂寞。市樓蜃氣亦空虛。騎羊漫詡仙人鶴。驅鱷難除海大魚。獨有十三行外柳。重重深護畫樓居。



# 人境廬詩草卷二

## 寄四弟

雛雁毛羽成。各各南北飛。與君爲兄弟。義兼友與師。師嚴或傷和。肝鬲君所知。階前百尺桐。濃綠侵鬢眉。樹根兩坐石。一平一嶽奇。我坐拾落葉。君立攀高枝。此讀彼吟哦。形影常相隨。有時隔屋語。亦復穴壁窺。當時忘此樂。亦已樂不疲。人生歡聚時。何知苦別離。

匏瓜繫不食。壯夫是所羞。出門望長安。遠在天盡頭。貢士親署名。行作萬里游。念此當乖離。恩情日綢繆。今年槐花黃。掛帆來廣州。亦謂此恨淺。待我過深秋。秋風亦已過。別恨終悠悠。欲歸不得歸。飄蓬迹沈浮。登高插茱萸。重陽風颼颼。以汝異鄉思。知我游子憂。千里遠相隔。已恨歸滯留。何況萬里別。益以十年愁。

## 人境廬雜詩

春風吹庭樹。樹樹若爲秋。忽作通宵雨。來登近水樓。溼雲攢岫出。疊浪拍天流。不識新波長。沙邊有睡鷗。門前幾株樹。樹外一亭茅。啜絮魚行水。銜雛鳥戀巢。月隨瓜架漏。花入藥欄交。難怪陶徵士。移居樂近郊。亦有終焉志。其如綠鬢何。雲閒猶作雨。水止亦生波。春暖先鴉起。湖寬讓鯽多。門前親種柳。生意未婆娑。出屋梧桐長。都經手自栽。十年勞樹木。百尺看成材。莽莽風雲會。深深雨露培。最高枝上月。留待鳳凰來。

紫藤花壓架。開落到如今。舊雨傷黃土。殘春悵綠陰。尋香猶惘惘。埋玉故深深。庭下閒叉手。多餘戀舊心。  
葉葉蕉相擊。叢叢竹自鳴。蕭蕭傳雨意。撼撼誤秋聲。露溼寒蛩寂。枝搖暗鶻驚。幢幢燈影暗。獨坐到微明。  
初日照高樓。遲遲樹影收。苔痕緣壁漫。花氣到簾留。春軟雞同粥。風和鶻亦柔。書聲牆外過。有弟住東頭。  
耐冷齋頭客。西寧學署齋名。時詩五客此。鰥魚不寐餘。知君長獨坐。念我近何如。哀樂中年感。艱難遠道書。楊梁諸子好。蹤跡亦蕭疏。

將應廷試感懷

二十餘年付轉車。自摩腓肉問何如。暫垂鵬翼扶搖勢。一學蠅頭世俗書。蕩蕩天門爭欲上。茫茫人海豈難居。尋常米價無須問。要訪奇才到狗屠。

出門

出門楊柳萬條春。送我臨歧意未申。得失雞蟲何足道。文章牛斗可能神。無窮離合悲歡事。從此東西南北人。手版腳韉兼帕首。任風吹墮軟紅塵。

由輪舟抵天津作

遙指天河問析津。茫茫巨浸浩無垠。華夷萬國無分土。人鬼浮生共轉輪。敵國同舟今日事。太倉稊米自家身。大鵬擊水南風勁。忽地吹人落軟塵。

水濱

來牛去馬看頻頻。獨立蒼茫此水濱。避面青山難見我。打頭黃土信搏人。東西市舶無分界。南北藩封此要津。七十二沽秋色滿。不堪吹鬢半胡塵。

武清道中作

始識風塵苦。吾生第一回。斗星隨北指。雲氣挾東來。走竟偕牛馬。臣初出草萊。海天千萬里。南望幾徘徊。天到荒寒地。山猶懶刻鏤。沙濛惟見日。樹瘦盡如秋。長路漫漫苦。斜陽渺渺愁。嶺南好時節。不爲荔支留。綠樹如雲擁。門前百尺桐。吾家正溪北。有弟住牆東。盡室團樂樂。行人夢寐中。茫茫百端集。到此意何窮。唐魏風同儉。幽并氣不豪。龍衣將瓦覆。牛矢壓牆高。憂患家多口。荒涼地不毛。最憐羅馬拜。中婦乞錢號。居者與行者。勞勞同一嘆。天恩纔咫尺。民氣不衣冠。地況窮荒遠。人兼瑣尾殘。監門圖一幅。誰上九重看。

早行

堤長已歷八九折。柝擊猶聞四五更。涼風吹衣抱衾臥。殘月在樹啼烏聲。東方欲明未明色。北斗三點兩點星。腐儒饑寒苦相迫。驅車自唱行行行。

慷慨

慷慨悲歌士。相傳燕趙多。我來仍矢志。走問近如何。到處尋屠狗。初番見橐駝。龍泉腰下劍。一看一摩挲。

月夜

梧桐庭院鳳凰枝。六尺湘簾腕地垂。長記綺窗相對語。二三更後夜涼時。

代東寄詩五蘭谷並問諸友

入夢江湖遠。撐胸天地寬。長安人踏破。有客獨居難。短榻鳴蟲寂。孤燈落葉寒。不禁兒女語。瑣屑寫君看。  
萬樹秋風起。吾心吹不歸。袖留孤刺在。書自百城圍。大海容鷗住。高雲看鳥飛。酒痕和淚漬。時一檢青衣。  
親健都奇福。芳蘭各自花。雲扶王父杖。余祖年六十六矣。酒煖冷官衙。詩五尊人官西寧學博。巢燕長依母。棲鳥又有家。詩五

近方續娶。上堂如照鏡。莫嘆鬢絲華。

覆地桐陰綠。中爲人境廬。剛柔分日課。兄弟各頭居。草草常留飯。匆匆亦讀書。近來仍過我。見我衰師無。

狂歌示胡二曉岑曠

飛鳥不若笈。鳳游鱗不若篆。龍虛譽不若疑。謗速拙不若緩。工高臺落日多悲風。我劍子劍弓子弓。與子拍手青雲中。但須塞耳甘耳聾。蒼蠅營營無萬數。下士大笑聲滂滂。

重九日雨獨遊醉中作

吹面風多冷意酣。蕭蕭寒雨滴重簷。宵來一醉長安市。竟夕相思大海南。徧插茱萸偏我少。無端萍梗爲誰淹。故山歲歲登高去。蟹熟鱸香酒壓擔。

別賴雲芝同年 鶴年

結客須結少年場。占士能占男子祥。爲雲爲龍將翱翔。擔簦跨馬毋相忘。蒼梧之水悠且長。中有潯山山蒼蒼。前有龍輪臣呂月。滄后朱伯韓。王定甫。靈芝繼起殊尋常。渾金璞玉其器良。皇皇使者鐵網張。摩挲三之貢玉堂。鳳凰飛飛上高岡。立足未穩天風剛。吹爾斂翼下八荒。長安紈袴多清狂。闊眉廣袖時世粧。日醉杜曲歌韋娘。紅裙翠襦圍銀觴。朝朝暮暮樂未央。子獨閉門尋羲皇。青鞋破帽闔無光。時或彳亍書賈坊。邂逅揖我謂我臧。子之外家吾故鄉。通明移家趨華陽。至今鄉音猶未忘。西風牽手情話長。比鄰胡二工文章。因我識子據肝腸。桃笙棋褥鋪繩床。敲冰煮茗焚清香。左陳鐘鼎右縹緲。往往道古稱先王。繁星窺戶月在牆。甲夜至丙言尤詳。子言少孤早罹殃。機聲燈影宵啼螿。阿母責讀聲琅琅。每至蓼莪泣數行。去年雛鳳新求凰。左敖右翮招由房。和鳴鏘鏘期育姜。倚門倚閭久相望。不可以留行束裝。春明門外多垂楊。寒雨乍斷露始霜。今日送子天一方。貧士縮瑟無酒漿。祇用好語深淺商。子足暫別庸何傷。歸與兄弟謀稻粱。問字之酒束脩羊。男唯女俞懽重堂。明年槐黃舉子忙。呦呦鹿鳴諧笙簧。行聽子歌承筐將。人生相見殊參商。吁嗟努力毋怠皇。

爲蕭少尉步青作

蕭公平遠人。任河南永城縣丞。咸豐五年。粵逆破城。妻女姪婦同時殉難。分祀昭忠節烈祠。

守土穹官先敗北。防河諸將亦籠東。哦松射鴨閒官耳。一死猶能作鬼雄。

烏之珠歌

毅皇帝馬。領侍衛某所進。西安將軍所購也。宮車晏駕。馬悲鳴於景山林樹之間。卒以不食斃。微臣聞而感焉。

北風雨雪門不開。景山暫作金粟堆。黃竹歌停八駿杳。一馬鳴訴悲風哀。此馬遠自流沙至。鐵花滿身黑雲被。將軍甫奏天馬徠。雄姿已有凌雲意。鳳臆麟身人未知。內官頻促黃門試。天顏一顧喜出羣。便入天閑登上駟。春郊三月楊柳絲。九衢夾道飛龍旗。臥瓜五仗引金鉞。霓幢羽葆隨黃麾。烏皮靴聲地囊囊。龍紋蓋影雲遲遲。十五善射作前導。親王貝勒相追隨。中一天人御飛鞚。躡電追風塵不動。黃韉朱氎鎔金鞍。顧影不鳴更矜寵。路旁遙指衣黃人。側睽龍媒神亦悚。沙平風軟四蹄輕。不聞人聲惟馬聲。銀花佩帔露黃帶。紅絨結頂飄朱纓。少年天子萬民看。望塵不及人皆驚。鑾儀校尉獨惆悵。輕車步輦空隨行。從官爭費千金產。苦索飛龍求上選。奚官善相阿敦調。有此神駿無此穩。一朝忽泣天花雨。日慘雲冥愁楚楚。都是攀髯不逮人。并鮮慰情勝無女。萬花淚濺柳愁含。御牀不埽空垂簾。六宮共抱蒼梧痛。萬國還驚白奈簪。多時不見宮中駕。一馬悲嘶夜復夜。自蒙拂拭衆人驚。奚啻黃金長聲價。青絲絡頭伏道旁。反因受寵叢譏罵。何如死殉侍昭陵。風雨靈旗馳石馬。先皇御宇十三年。金牀玉几少晏眠。黃巾甫平白帽擾。戰馬每歲從周旋。望驩禮拜木蘭返。十年往事猶目前。中興未集弓劍闕。豈獨此馬哀呼天。卽今兵革猶未



息羣胡化鬼擾西域王師出關萬虎熊衆馬從人同殺賊汝獨一死報君恩吁嗟龍性固難測烏珠烏珠努力肯飽食諒汝立功報國

田橫島

生王頭死士壘一毛輕等邱山重臣頭百里走見王王自趨前頭不動五百人頭共一邱人人視頭同贅疣背面事讎頭亦羞橫來橫來大者王小者侯臣戴頭來王勿憂嗚呼死士壘乃爲生王頭

和鍾西耘庶常德祥津門感懷詩

雷動星馳入貢車舌人環列護交閭但占風雨都來享偶斷苞茅便問諸宅北曾分義仲命康熙中用湯

爲欽天監皆西人綏南遠賜趙佗書康熙二十五年俄羅斯邊鄙之人據我黑龍江聖祖由荷蘭使船賜其國王書乃遣使畫疆以外興安嶺爲界盟津八百爭朝會猶

記徵祥紀白魚

八荒無事息兵車七葉謳吟洽聖閭豈謂浮雲變蒼狗竟教明月蝕詹諸驪山烽火成焦土牛耳牲盤捧載書秋草木蘭馳道靜白龍微服記爲魚

六月中興賦出車金陵王氣復充閭華夷共主皆思服堯舜如天尙病諸邊寇重編歸漢里和戎難下絕秦書只應文物開王會珥筆曾誇太史魚

狼臙遺種等高車萬族相從到尾閭魍魅入林逢不若蝦蟆吞月鑑方諸昔聞鞞鞫歌西樂今見佉盧制

左書始受一塵濠鏡地。有明師早漏多魚。

執挺降王走傳車。先擒月愛後東閩。難言赤狄初何種。終痛庭堅祀忽諸。兩帝東西爭戰國。九州大小混

方書。嗚嗚鶴鷄來無路。久已縱橫海大魚。

謂南洋各島

電掣重輪走水車。風行千里獻比閩。移山未要喘愚叟。捧土真能塞孟諸。黑齒雕題徵鬼錄。赤文綠字翊

天書。尋常弓矢疑堪用。聞道潮人驅鱷魚。

鸞聲閣道碾安車。元老相從語踟閩。未雨綢繆徹桑土。御冬旨蓄備桃諸。借籌幸闢同文館。警鼓驚傳奔

命書。相戒魴鱖休出入。吞聲私泣過河魚。

東西南北走舟車。虎穴驚看插邑閩。七萬里戎來集此。五千年史未聞諸。考工述物搜奇字。鬼谷尊師發

秘書。教訓十年民力盛。倘排犀手射鯨魚。

福州大水行同張樵野丈蔭桓龔謫人丈易圖作

黑風吹海海夜立。倏忽平地生波濤。囊沙擁水門急閉。飛浪已越城牆高。漂廬拔木無萬數。安得江隄淮

陽包。衆頭攢動乍出沒。欲葬無棹棲無巢。攀崖緣壁幸脫死。饑腸雷吼嗷嗷。中丞視民猶已溺。急起冒

突揮露橈。鷓鴣毀室商救子。魚鼈滿城資渡橋。況聞移粟蘇喘息。自雍及絳來千艘。流離瑣尾得安宅。無

復登屋聲三號。天災流行國代有。難得官長勞民勞。海疆東南正多事。水從西來紛童謠。曲突徒薪廣恩

澤願亟靖海安天驕。

將應順天試仍用前韻呈藹人樵野丈

平生攬轡澄清志。足跡殊難出里閭。萬一鉛刀堪小試。可容韞匱便藏諸。觚稜魏闕宵來夢。簡練陰符夜半書。一第區區何足道。頻番緣木妄求魚。

轍亂旗翻屢敗車。行吟憔悴比三閭。未知吾舌猶存否。終望人饑得食諸。辛苦低頭就羈勒。功名借徑寄詩書。若論稽古榮車服。久已臨淵不羨魚。

旁午軍書議出車。沿邊鵝鶴列爲閭。眼看虎落環甌脫。心冀燕讎雪望諸。四海同袍征士氣。頻年贈策故人書。荷戈亦是男兒事。何必河魴始食魚。

齊東燕北走舟車。三載南雲望倚閭。宦學無成便歸去。父兄有命敢行諸。傷禽惡聽連環彈。老蠹愁繙舊校書。碧海掣鯨公手筆。倘分勺水活枯魚。

述懷再呈藹人樵野丈

嗚呼制義興今蓋六百年。宋元始萌蘖。明制皇朝沿。十八房一行。羣蟻趨附羶。諸書束高閣。所習惟兔園。古今昏不知。各各張空拳。士夫一息氣。奄奄殊可憐。黼黻承平時。無賢幸無奸。小醜一竊發。外患紛鈎連。但辨口擊賊。天下同拘攣。祖宗養士恩。幾費大官錢。徒積汗牛文。焉用扶危顛。到此法不變。終難興英賢。

中興名世者。豈不出其間。

漢家耀武功。累葉在西北。車書四萬里。候尉三重譯。物腐蟲蠹生。月盈詹諸蝕。鼠盜忽竊發。犬戎敢相逼。惜哉臣年少。不及出報國。中興六月師。羣陰歸殄滅。臣虎臣方叔。持節布威德。如何他人睡。猶斲臥榻側。白氣十丈長。狼星影未匿。羣狐舞天山。酋者阿古栢。公與秦晉盟。隱若樹一敵。王師昨出關。軍容黑如墨。狺狺桀犬吠。尙遲有苗格。東南鬼侯來。晝伏夜伺隙。含沙射人影。鬼蜮不可測。虎威狐輒假。鴟視鼠每嚇。今年問周鼎。明年索趙璧。恫疑與虛喝。悉索無不力。蕩蕩王道平。如行入荆棘。普天同王臣。咸願修矛戟。荷戈當一兵。吾亦從殺賊。

兩漢舉賢良。六朝貴門第。設科不分目。我清重進士。孔孟生今日。必就有司試。豈能無斧柯。皇皇行仁義。憲也少年時。謂芥拾青紫。五嶽填心胸。往往矜爪觜。三戰復三北。馬齒加長矣。破劍破後衣。年年來侮恥。下爭雞鶩食。擔囊走千里。時時發狂疾。痛灑憂天淚。羣書雜然陳。所志非所事。柄鑿殊方圓。如何可嘗試。今上元二年。詔書下黃紙。帝曰爾諸生。爾其應大比。紛紛白袍集。臣亦出載贄。既不辛野耕。又難漆雕仕。龍門雖則高。舍此何位置。掄才國所重。得第親亦喜。繞牀夜起舞。何以爲臣子。

大獄四首

國恥誠難雪。何辭到匹夫。旣傳通道檄。翻棄入關繻。事竟成狙擊。危同捋虎鬚。陰謀圖一逞。攘外計何愚。

萬里滇南道。空勞秉節臣。就令戎伐使。已累漢和親。況坐王庭獄。惟誣化外人。在旁鷹眼睨。按劍更生噴。洗血拚流血。鯨魚海上橫。人方投袂起。我始奉書行。重鎮勞移節。羣兒慮劫盟。懷柔數行詔。悔過復渝平。休倡攘夷論。東西共一家。疏防司里館。謝罪使臣槎。詎我持英蕩。容人擊副車。萬方今一概。莫自大中華。

別張簡唐思敬並示陳絳尙元焯

馬首欲東王事亟。乘轅改北故人歸。別君泥醉杯中酒。獨我愁看身上衣。萬緒一時齊擾擾。三年同客更依依。平安寄語吾家去。爲道腰支近稍肥。

平生四海論人物。早有張陳在眼中。一舉雲霄希有鳥。頻年塵土可憐蟲。試思科第定何物。長此羈貧卻惱公。歸問白眉吾好友。可能追逐共雲龍。

三十初度

學劍學書無一可。摩挲兩鬢漸成絲。爺娘歡喜親朋賀。三十年前墮地時。

將之日本題半身寫真寄諸友

如此頭顱如此腹。此行萬里亦奇哉。諸公未見靴尖趨。待我扶桑濯足來。

又寄內子

十年驢聚不知愁。今日分飛獨遠遊。知否吾妻橋上望。淡烟疎柳數行秋。

日本東京  
有吾妻橋。



# 人境廬詩草卷二

由上海啓行至長崎

浩浩天風快送迎。隨槎萬里賦東征。使星遠耀臨三島。帝澤旁流徧裨瀛。大鳥扶搖搏水上。神龍首尾挾舟行。馮夷歌舞山靈喜。一路傳呼萬歲聲。

滿城旭影耀紅旗。神武當年此肇基。竿木纔平秦世亂。衣冠創見漢官儀。中原舊族流傳遠。長崎多有勝朝遺老後裔四海同家聚會奇。此土此民成此國。有人盡日倚欄思。

西鄉星歌

西鄉隆盛既滅。適有慧星見於日本西南境。國人遂名之爲西鄉星。

人不能容此嶽。寄磊落之身。天尙與之發揚蹈厲之精神。除舊布新識君意。爛爛一星光射人。人人驚呼伯有至。昨爲大盜今爲厲。海上纔停妖鳥鳴。天邊尙露神龍尾。神龍本自西海來。蹈海不死招魂回。當時帝星擁虛位。披髮上訴九天閭。闔呼不開。尊王攘夷平生志。聯翩三傑同時起。錦旗遙指東八州。手縛名王獻天子。河鼓一將監衆軍。中宮匡衛羅藩臣。此時赤手同捧日。上有一人戴旒冕。是爲日神之子。天帝孫。下有八十三州地。滿城旭綵輝紅輪。乾坤整頓兵氣息。光華復旦歌維新。無端忽唱征韓議。汝輩媿阿

難計事。參商水火不相能。拂衣大笑吾歸矣。歸來落拓不得志。牽狗都門日遊戲。鼻端出火耳後風。指天畫地時聚議。夜半拊床欲爲帝。奮挺大呼投袂起。將軍要問政府罪。胡驅吾輩置死地。三千萬衆我同胞。忍令絞血輸血稅。死於饑寒。死於苛政。死於暴客等一死。徒死何如舉大計。一時嘯聚八千人。各負長刀短銃至。赤囊傳警舉國驚。守險力扼熊本城。雷池一步不得過。天網所際難逃生。十二萬軍同日死。嗚呼大星遂隕地。將軍之頭走千里。將軍之身分五體。聚骨成山血作川。噫氣爲風淚如雨。此外暗嗚吡咤之聲勢。化爲妖雲爲沴氣。騎箕一星復歸來。狼角光芒耀天際。吁嗟乎丈夫不能留芳千百世。尙能貽臭億萬載。生非柱國死非閻羅王。猶欲醋血書經化作魔王擾世界。英雄萬事期一快。不復區區計成敗。長星勸汝酒一杯。一世之雄曠世才。

石川鴻齋英借僧來謁張副使誤謂爲僧鴻齋作詩自辯余賦此以解嘲

謂僧爲官非禿鷲。謂官爲僧非沐猴。爲官爲僧無不可。呼馬應馬牛應牛。先生作者杖策至。兩三老衲共聯袂。寬衣博袖將毋同。只少袈裟念珠耳。師丹固非老善忘。魯侯亦豈儒爲戲。知心迹僧心亦僧。不復拘拘皮相士。先生聞當喜欲狂。自辯非僧太迂泥。但論普度一切心。安識轉輪三世事。吾聞先達曾戲言。莫如爲僧樂且便。世間快意十八九。只恨酒色須逃禪。入宮有妻案有肉。棄冠便作飛行仙。作者大邦布令甲。宗門無用守戒法。周妻何肉兩無忌。朝過屠門夕擁妾。佛如有知亦歡喜。重願東來度僧牒。溯從佛法



初來東稻目以後爭信崇造經千卷塔七級賜衣百襲粟萬鍾帝王亦稱三寶奴上皇尊號多僧徒七道百國輸正稅民膏民血供浮屠將軍柄政十數世爭挽強弓不識字斯文一脉比傳燈亦賴儒僧延不墜西方菩薩東沙門天上地下我獨尊尊君爲僧固君福急掩君口聽我言九方何必分黃驪兩兔安能辨雄雌鴻飛寧記雪泥迹馬耳且任東風吹

### 不忍池晚遊詩

上野有不忍池亦名西湖近郊勝地也余每暮晚遊長夏暑熱或夜深始歸得詩十數首

開門看雨夢纔醒一抹斜陽映畫屏隨着西風便飛去弱花無力繫蜻蜒  
蜃樓海氣隱重城浩浩風停遠市聲四壁晚鐘齊接應分明不隔一牛鳴  
紅板長橋雁柱橫兩頭路接白沙平前呼後擁蕭蕭馬猶記將軍警蹕聲  
如此江山信可憐驩虞霸政百餘年黃梁飯飽紅燈上小戶家家弄管絃  
百千萬樹櫻花紅一十二時僧樓鐘白頭烏哭屋梁月此是侯門彼佛宮

廢矣

王師東下以上野爲戰場故近處公侯第宅梵王宮殿大半荒

羯鼓擊髮舞折腰銀鈿銜壁酒波搖爐香裊處瓶花側不掛當時黑鞘刀

東人屋側以隙地爲供爐插花之所舊時士夫皆佩雙刀宴飲

時則懸於壁今廢此儀矣

薄薄櫻茶一吸餘。點心清露挹芙蓉。青衣擎出酒波綠。徑尺玻瓈紙片魚。  
鴉背斜陽閃閃紅。桃花人面薄紗籠。銀鞍並坐妮妮語。馬不嘶風人食風。四人攜眷出遊者每並轡偕行

萬綠沈沈嘒一蟬。迷茫水氣化湖煙。無端吹墜豐湖夢。不到豐湖已十年。

絕遠窮荒海外經。風災鬼難渡零丁。誰知大地山河影。只一微塵水底星。  
濛濛隔水幾行竹。暗暗籠煙併是梅。微影模糊聲擘確。是誰攜屐踏花來。

柳梢斜掛月如丸。照水搖搖頗耐看。欲寫真容無此鏡。不難捉影捕風難。

不耐茫茫對此何。花如吉野月須磨。如魚邪虎烏烏武。樹底時時人唱歌。吉野之櫻須磨之月。爲東方名勝之最。

三更夜深月上櫺。荷花遙遙透微馨。鑪煙帖妥窗紗靜。不解參禪也讀經。

山色湖光一例奇。莫將西子笑東施。卽今隔海同明月。我亦高吟三笠辭。仲麻呂使於唐將還從明州上舟望月作歌世傳爲絕唱三笠

山辭是也。

宮本鴨北以舊題長華園詩索和

繞榭山花紅欲然。林中結屋屋如船。人來蓬島無賓主。境比桃源別洞天。近事披圖談鬪虎。論英俄二國因突厥事。

舊遊濡筆紀飛鳶。曾使高麗登樓北望方多事。未許偷閒作散仙。

櫻花歌

鶴金寶鞍裝盤陀。螺鈿漆盒攜叵羅。繖張胡蝶衣哆囉。此呼奧姑彼檀那。一花一樹來婆婆。坐者行者口吟哦。攀者折者手按莎。來者去者肩相摩。墨江潑綠水微波。萬花掩映江之沱。傾城看花奈花何。人人同唱櫻花歌。道旁老人三嗟咨。菊花雖好不如葵。卽今遊客多於鯽。未及將軍全盛時。將軍主政國尙武。源蹶平顛紛鬪虎。德川累世柔服人。漸變戰場成樂土。將軍好花兼好遊。每歲看花載簫鼓。三百諸侯各質拏。爭費黃金教歌舞。千金萬金營香巢。花光照海影如潮。遊俠聚作萃淵藪。眞仙亦迷脂夜妖。合歌萬葉寫白紵。纏頭每樹懸紅綃。七月張燈九月舞。一年最好推花朝。噴雲吹霧花無數。一條錦繡遊人路。明明樓閣倚空虛。玲瓏忽見花千樹。花開別縣移花來。花落千丁載花去。十日之遊舉國狂。歲歲驩虞朝復暮。承平以來二百年。不聞鼙鼓聞管絃。呼作花王齊下拜。自誇神國尊如天。當時海外波濤湧。龍鬼佛天都震恐。歐西諸大日逞強。漸剪黑奴及黃種。芙蓉毒霧海漫漫。我自閉關眠不動。一朝輪舶礮聲來。驚破看花衆人夢。我聞桃花源洞口雲迷離人間。漢魏了不知。又聞淨土落花深四寸。每讀華嚴經卷神爲癡。拈花再拜開耶姬。上告豐葦原國天尊人皇百神祇。仍願丸泥封關再閉一千載。天雨新好花。長是看花時。

陸軍官學校開校禮成賦呈有栖川熾仁親王

爲將不知兵。是謂卒予敵。不教驅之戰。豈能出以律。桓文節制師。蘇張縱橫策。制勝非有他。所貴在練習。日本二千年。本以武立國。幕府值季世。犬戎迭相逼。賢豪爭勤王。蔚成中興辟。環顧五部洲。滄海不可隔。

函關一丸泥。勢難復閉壁。勇夫且重閉。豈曰偃兵革。天孫茅纒稍。高麗鐵鑄的。古豈無利器。今合借他石。近年歐羅巴。兵法蓋無匹。廣輪四海圖。上下千年籍。擇長以爲師。悉命譯人譯。廣廈千萬間。多士宅爾宅。羣萃而州處。乃受觀摩益。使指固藉臂。伏足固藉翼。得一良將才。勝百連城壁。是日營門開。軍容茶火赫。賢王代臨雍。客卿咸就席。組練簡一千。距躍習三百。拐馬熟連環。飛礮鳴霹靂。亦有輕氣球。凌風騰千尺。隼人與相撲。餘技及刺擊。粲粲西人服。竦立咸屏息。王告汝多士。勗哉宜勉力。刃當磨厲須。錐乃脫穎出。千日可不用。兢惕在朝夕。王告汝多士。豺虎在有北。養汝民脂膏。爲民出鋒鏑。汝能扞城民。俾汝公侯伯。多士曰唯唯。拜手受詔勅。使者覩茲禮。懽忻目屢拭。念余捧載書。相見藉玉帛。同在亞細亞。自昔鄰封輯。譬若輔車依。譬若犄角立。所恃各富強。乃能相輔弼。同類爭奮興。外侮自潛匿。解甲歌太平。傳之千萬億。

都踊歌

西京舊俗七月十五至晦日每夜巨索街上懸燈數百兒女艷妝靚服爲隊舞蹈達旦名曰都踊所唱皆男女猥褻之詞有歌以爲之節者謂之音頭譯而錄之其風俗猶之唐人合生歌其音節則漢人董逃行也

長袖飄飄兮。髻峨峨。荷荷。裙緊束兮。帶斜拖。荷荷。分行逐隊兮。舞傞傞。荷荷。往復還兮。如擲梭。荷荷。回黃轉綠兮。同按莎。荷荷。中有人兮。通微波。荷荷。貽我釵鸞兮。餽我翠螺。荷荷。呼我娃娃兮。我哥哥。荷荷。柳梢月兮。鏡新磨。荷荷。雞眠貓睡兮。犬不呵。荷荷。待來不來兮。歡奈何。荷荷。一繩隔兮。阻銀河。荷荷。雙燈照兮。

暈紅渦。荷荷。千人萬人兮。妾心無他。荷荷。君不知兮。棄則那。荷荷。今日夫婦兮。他日公婆。荷荷。百千萬億。化身菩薩兮。受此花。荷荷。三千三百三十二座大神兮。聽我歌。荷荷。天長地久兮。無差訛。荷荷。

庚辰四月重野成齋

安釋

岩谷六一條

日下部東作

鳴鶴

蒲生綱齋

重章

岡鹿門

千仞

諸君子約遊

後樂園園卽源光國舊藩邸感而賦此

泓嶸蕭瑟不可言。周遭水木圍亭軒。夏初若有新秋意。袞袞來游後樂園。主人者誰源黃門。脫棄簪紱甘

邱樊。夷齊西山不可得。

園有夷齊廟

欲以此地爲桃源。左挈舜水右淡泊。想見往往傾空尊。嗚呼源平霸者起。

太阿倒持歸將軍。黃門懿親敢異議。聊借蕨薇懷天恩。一編帝紀光日月。開館彰考非爲文。高山九郎好

痛哭。相繼呼天叩帝關。布衣文學二三子。協力卒使天皇尊。卽今賓客紛裙屐。一堂笑語言溫溫。豈識當

時圖後樂。酒觴未舉淚有痕。豐碑巍然頽祠倒。夕陽歸鴉噪黃昏。願起朱子使執筆。重紀米帛貽子孫。

送穴戶璣公使之燕京

海外大荒經。旣稱帶方東。是有君子國。挂劍知儒風。唐宋時遣使。車書萬里同。緇流唱金經。武士橫瑠弓。

內國旣多事。外使不復通。邇者海禁開。乘時多英雄。捧盤從載書。隔海飛鱗鱘。益知唇齒交。道誼在和衷。

子今持使節。累葉家聲隆。博學等黃備。抱德追管公。冠垂華藹枝。手燃梅花紅。

世所傳管原道真奉使大唐圖手持梅花二枝考日

本史道真雖奉使命實未來華

同行二三子。亦如貫珠驥。子能彌闕失。竹帛銘汝功。今日送子去。東西倏轉蓬。扶桑遙迴

顧旭影多朦朧。仰瞻闕庭高。我心亦忡忡。

大阪

黑面猴王今已矣。尙餘石壘疊城濠。江山入眼花光媚。樓閣凌虛海氣豪。橫列東西青雀舫。旁通三百赤欄橋。昨宵茗宴今花會。多少都人載酒遊。

游箱根

危塗遠盤紆。徑仄鳥迹絕。一步不敢前。雙足若被別。人呼兜籠來。縮橫寬尺八。腳手垂郎當。腰背盤曲折。輿人出裸國。皮縐龜兆裂。螭蛟繡滿身。橫胸施絳襪。兩肩乍擡舉。雙杖互扶挈。前枝後更撐。仰攀俯若跌。有如蟻旋磨。又似蛇出穴。踉蹌上竹鮎。蠢蠢爬沙鼈。噫風竹筒吹。汗雨蒸甑泄。勞倦時一歌。鄉音鳥嘲晰。烟樹繞千迴。風花眩一瞥。峭壁俯絕壑。旁睨每橋舌。四山呼無人。一墮便永訣。畏途寧中止。弛擔婁更迭。直窮絕頂高。始覺天地闊。

羣峯插雲中。結屋峯頭住。濛濛萬雲海。憑空無寸土。開窗起看雲。迷茫若無覩。一雲忽飛來。一雲不肯去。一雲幻作龍。盤旋繞屋柱。闌窗急遮攔。攢隙細如縷。須臾塞破屋。真氣滿庭戶。解裝張行囊。呼童共撈取。大風捲地來。團作黑煙聚。隱隱聞雷聲。乍似嬰兒怒。遙知百萬家。已灑三尺雨。我方跛腳眠。夢騎赤龍舞。直傾天河水。遠向并豫注。側身起西望。夢墮雲深處。時山西河  
南大旱。

舉國無名川。一湖何滉漾。環抱三百里。下窺五十丈。神武開闢來。亘古無消長。沈泉日穴出。汎流失歸向。一碧湛空明。萬象絕依傍。昂頭只日月。兩輪互摩盪。我來駕一舟。杳茫迷所往。謂是滄溟遊。乘風破巨浪。何圖衆山頂。乃泛海蕩蕩。關東昔豪傑。割地爭霸王。湯池據此險。漆城莫敢上。邇來司農官。又作填海想。鑿脈乾此湖。可得千沃壤。紛紛校得失。堯桀我俱忘。且作煙波徒。容與打雙槳。

羣山若堂防。依巖各構屋。家家爭調水。曲筧引修竹。泠泠滴簷角。汨汨出巖腹。曉鶉猶未興。既有游人浴。東屋鳴琴絃。西屋鬪棋局。南屋垂釣竿。北屋羅簡牘。蛟毫展涼簟。鶴氅披輕服。點白茶始嘗。堆紅果初熟。蕃舶從海來。蒲萄泛新綠。洪崖揖浮邱。簫史媚弄玉。雞犬亦飛昇。熊魚各得欲。人生貴行樂。矧此神仙福。纏腰更騎鶴。避俗還食肉。平生煙霞心。奈此桑下宿。行攜桃源圖。歸我篔簹谷。

宮本鴨北索題晃山圖卽用卷中小野湖山詩韻

地球渾渾周八極。大塊鬱積多名山。汪洋巨海不知幾萬里。乃有此島蝨其間。關東八州特秀出。落落晃山天半懸。亂峰插雲俯水立。怒濤潑地轟雷聞。坐令三百諸侯竭土木。股民膏血供雲烟。下有黑獅白虎。踉蹌踉蹌伏闕下。上有瓊樓玉宇高處天風寒。中間一人冕旒擬王者。今古護衛僧官千。嗚呼將軍主政。七百載。唯汝勳業差可觀。卽今霸圖寥落披此卷。尙足令我開笑顏。古稱海上蓬萊方壺圓。嶠可望不可。卽我曰其然豈其然。

送秋月古香種樹歸隱日向故封即用其留別詩韻

昨日公侯今老農，飄然掛冠歸舊封。忙時蠟屐閒扶筇，空山猿鶴長相從。觚稜帝闕春夢濃，醒來忽隔天九重。天風吹袂雲盪胸，云胡不樂心溶溶。人生一別難相逢，落月屋梁思子容。他時子倘思吾儂，雞鳴西望羅浮峯。

近世愛國志士歌

日本自將軍執政凡五百年，世不知有王德川氏與投戈講藝親藩源光國作大日本史立將軍傳略仿世家載記及藩鎮列傳之例世始知尊王之義後源松苗作日本史略賴襄作日本外史益主張其說及西人規盟幕府主和諸藩主戰於是議尊王之事大定矣當家康初政頗欲與外國通商繼而天變而講和戎之利而大藩聯衡幕府傾覆尊王之義遂廢擊外船者有議造廠艦者有欲留學外國者識者深憂之而未敢昌言也外舶紛擾屢戰屢勝有論防海者有議造廠艦者有欲留學外國者德川氏皆嚴禁之唱尊王者觸大忌唱通番者犯大禁幕府均下令逮捕黨獄橫興株連甚衆而有志之士前仆後起踵趾相接視死如歸死於刀鋸死於囹圄死於逃遁死於牽連死於刺殺者蓋不可勝數卒以成中興之業維新之功可謂盛矣明治初年下詔褒獎各贈階賞卹今舉其尤著者十數人著於篇以與起吾黨愛國之士

今日共尊王九原君知否，化鶴倘將來。塵抄柳城柳山縣昌貞字柳莊甲斐人著柳子年之神統三千萬

衆之共主而屈於一武人名之不正孰甚焉俊與竹內武部聚徒講武有上告者告其考究江戶險要遂論死

草莽臣正之望闕輒哭謁，眼枯淚未枯。中有杜鵑血，高山正之字仲繩上野人讀史則泣語王室式微則

師必至二條橋遙望關稽首曰草莽臣正之味死再拜拜畢又泣後西遊久留米自刃於旅寓



怒鞭尊氏像泣述山陵志可憐默默齋猶復不恤緯蒲生秀實字君平下野人作山陵志以寓尊王作其  
罪由是自號默默齋不敢論事矣重

拍枕海潮來勿再閉關眠日本橋頭水直接龍動天林子平仙臺人好遊屢至長崎接西人考外事嘗謂

艦履大海如平地視異域如比鄰而我不知備可謂危矣著三國兵談  
及三國通覽二書欲合日本全國爲一大城幕府命毀其板鋼詰其藩

文章亦小技能動處士議武門兩石弓不若一丁字梁孟緯字星巖美濃人少治陸王之學工詩與賴山

者悉就縛幕吏以星巖爲其巨魁也數其罪時星巖  
已臥病乃收其妻景婉并下於獄景婉亦能詩

鎖港百不知惟夢君先覺到今缺舌聲徧地設音學渡邊華山人與高野長英等共譯西書英艦護

商意殊叵測斷不可以一二細民弛禁華山等腹非之乃作鳩舌小記蕃論

私記憤機論長英亦著夢物語皆駁攘夷之非幕府遂下令搜捕嚴鋼之

只一衣帶水便隔九重霧能知四國爲獨君識時務佐久間啓字象山松代人喜讀西書凡銃礮及築壘

銃利三倍當時薩長肥土諸藩議防海者多師象山云爲門人吉田松陰畫策航海事發並下獄久之乃

釋時水戶藩士結黨連名請宣布攘夷詔象山獨主開港將上書詣山階親王陳其利害爲暴客刺死之乃

丈夫四方志胡乃死檻車倘遂七生願祝君生支那吉田矩方字松陰長門人受兵學於佐久間象山象

霧中會幕府託和蘭購兵艦象山又曰仰給於外不知遣人往學之爲愈也幕府不納矩方聞之感憤時

墨艦泊浦賀港象山實司警衛事乃密謀夜以小舟出港近墨船僞爲漁人墮水者墨人救之乃固請於

墨將披理求附載披理奇其才以犯禁故仍送致幕府請勿罪幕府綱之其藩密書寄象山曰知時務如  
先生今之俊傑也今之諸侯何者可恃神州恢復如何下手茫茫八洲置身無處丈夫死所何處爲宜乞  
告我矩方卒被判維新以來長門藩士之以尊王立功者多其  
門人在獄中又嘗引楠正成語草七生滅賊說其英烈可想也

寧死不帝秦。竟蹈東海死。當時互抱人。今亦騎箕尾。僧月照西京清水寺住持也。美艦柏浦賀孝明帝勅令修禳災法。賜以御書。月照出入公卿門。日謀勤王之事。幕府尤忌之。遂改姓易裝。偕西鄉隆盛避難於薩摩。聞追捕又至。又走日向。泊舟御舟浦。會望夜大月。露期開宴吟賞。酒酣作歌。示隆盛。遂相抱投海。時戊午十一月也。同舟平野國臣等爭入海拯之。而月照遂死。隆盛後立功。為維新三傑。與當路不協。憤憤起兵。今亦死。

手寫御屏風。美哉猶有憾。君看紅旗揚。神風掃夷艦。浮田一蕙名。可為京師人。班畫苑。寄人美艦之來。命乞畫者。輒作神風覆艦圖。以與之。嘗寫御屏風。後上書論事。孝明詢其人。則畫人也。孝明嘆曰。屏風所畫皆古來中興事。朕對之。實有慚色矣。戊午黨獄。一蕙父子亦拘繫。尋押送江戶大學頭池內。某與八郎有舊交。同在獄。一日同鞠池內。意游移。及還囚室。怒罵之。曰。汝非人也。大丈夫甯為溝中瘠。烏可屈節。以事權貴哉。久乃釋之。

雞鳴曉渡關。鳥棲夜繫獄。長歌招和魂。一歌一聲哭。黑川登幾。常陸村農。黑澤信助之妻也。少習國學。善子亦愛國之士。宜韜晦避禍。登幾曰。吾雖巾幗。當走京師。以雪君冤。乃偽為巡詣諸國。神佛者。已抵京。吏捕之。登幾慨然曰。妾憂腥膻。汚我神州。故求之神佛耳。豈為藩主。賈綠要路。幕哉。乃繫之獄。後八年。朝廷下褒辭。曰。汝一弱女子。乃盡力王事。始終不變。艱險備嘗。特賜米十石。以養之。

宗五汝宗五。呼天訴民苦。恨不漆頭顱。留看民歌舞。佐倉宗五郎。下總國農人。為佐倉主堀田某封內民堀田氏厚斂。民不能堪。農夫二百餘人。合謀上訴。宗五郎曰。此事宜死生以之。至江戶。訴於堀田氏邸。訴於閣老。久世和州皆不允。宗五又曰。將軍近日將詣東臺廟。吾冒險為之事。終必成。及期。乃縛訴疏於長竿頭。潛匿下谷三枝橋下。將軍乘大輿。喝道來。宗五躍出投疏。衛士縛之。將軍以責堀田氏。堀田氏乃輕稅。而以感訴。故處宗五郎及其妻。磔死。其子斬。既而堀田氏家多崇。乃為建祠。曰山口大明神。每歲以二月三日八月三日祭之。

赤穗四十七義士歌

日本元祿十四年三月。天皇勅使。聘於將軍。將軍命內匠頭淺野長矩。接待。十四日。延使報謝。詔命儀未行。長矩卒。拔刀擊高家上野介吉良義英。義英走。仆不死。目付官就訊。爭故。長矩對。自奉命。接

以件上野介每以非禮見遇是以及事將軍大怒命囚長矩賁之曰卿以憤爭故臨國大禮公然揮刃以私怨滅公法其賜死其弟大學頭長廣收屍葬之泉岳寺報至赤穗長矩者臣大石良雄聚衆言曰上野介尙在吾曹惟有枕城而死耳共刺血盟誓遣使告於長矩外親戶田氏定曰內匠頭有罪伏法臣等謹服命矣惟不共戴天之讎儼然朝列臣等無顏立於人世敢舍刃駢死以殉孤城請以此意報之自付官氏定答書曰荷報之目付達於公朝恐將不利於大學頭衆乃更議及收城使至復請曰淺野氏自勝國以來世世蒙國恩今大學頭現在願赦罪繼其家官使曰諾良雄復語衆曰城亡與亡鳥敢以大學故而圖存雖然舍此豈遂無死所哉各泣別去明年三月良雄等先後變姓名入江戶伴爲販夫僦居英第側以伺利便義英畏驪一夕三遷莫測其踪跡而嘗以茶事爲嬖姓所喜茶人語遂聚衆舉事按高忠雄乃伴爲富商從學茶法十二月十四夜義英將集飲於家良雄等得茶人語遂聚衆舉事按高忠雄乃伴爲富商從學茶法十二月十四夜義英將集飲於家良雄等之神崎則休鄉導夜四更至則燭門緣屋乘高呼曰內匠頭家上爲報讎來敢出拒者斬弱無力者坐不動者置之驢呼入室每室燒燭徧搜不能得乃捕規一人導至寢所有義英席臥被尙暖衆知其逃匿不遠更四出旁搜間光與至房側聞嚼嚼有耳語擊破戶呼曰得無在是耶衆發矢奮鎗薄之房乃藏茶具者有人亂擲物以拒武林隆重揭燭見一著白襪衣在隱所方拔刀欲起隆重攙進斫而殪之類及背有創痕喜曰此非亡主所手擊者哉乃吹螺嘯聚以竿懸首擁往泉岳寺長矩墓所良雄預作具名書二通一留義英外廳一遣人齎詣彈正官仙石久尙第自明其報仇非抗國法良雄等既至寺以橐盤盛義英首又出七首置碑附上錄刃外向四十七士自呼名拜謁環跪墓前讀祭文曰去年三月十四日之事臣等卑賤疏遠不與其狀然竊料我公與吉良上野君必應積怨深仇非得已也不幸仇人未得而身死國除遂以一朝之憤而忘百年之業臣等食君之祿有積怨深仇非得已也不幸仇人未得而身死國除遂以一朝之憤而忘百年之業臣等食君之祿應死君之事荷覲顏視息他日蒙恥入地將何面目見我公乎臣等自謀此事棄妻子捐親戚奔走東西不遑寧處凡一年又二百七十日於茲矣常慮渣先朝露所志不遂重爲世笑賴天之明君之靈昨夕四更往攻吉良氏臣等幸得藉手以畢先公未了之志此七首昔公在時割所愛以賜臣者今謹以奉上請公以此甘心仇人以事聞將軍命分囚之四諸侯明年二月四日就所拘之邸出見寺僧曰某等之事畢矣仙石久尙以事聞將軍命分囚之四諸侯明年二月四日就所拘之邸出見以屠腹死命曰前以主讐結徒聚衆執持弓矢擅殺朝臣大逆不道其賜自盡衆皆稽首曰自應自上旨汝等乃誣以主讐結徒聚衆執持弓矢擅殺朝臣大逆不道其賜自盡衆皆稽首曰自應處極刑乃賜劍自裁此朝廷之仁也某等死瞑目矣乃悉葬之長矩墓側各爲立碑府下帛祭者填湊成市數月不已咸稱爲四十七義士各搜輯其姓氏年甲遺事刊錄成帙所遺手澤爭寶藏焉

四十七士人同仇。四十七士心同謀。一盤中供仇人頭。哀哀燕雀鳴啁啾。泥首泣訴圍松楸。臣等無狀恐爲當世羞。君雖有臣不能爲君持干楨。君實有弟不獲傳國如金甌。君亦有國民不敢與師修戈矛。猶復覩顏視息日。日偷臣等非敢國法讎。伏念國亡君死實惟仇人由。當時天使來奉命。同會酬環門。觀禮千人稠。彼名高家實下流。高家世以知禮名。接伴官每事問之。罵我衣冠如沐猴。笑我朝會啼禿鷲。我君怒如鯁在喉。拔劍一發不復收。烏知仇人不死。翻貽家國憂。臣等聞變行嘆復坐愁。或言死拒。或言死請。無能運一籌。同官臭味殊薰蕕。一國蒙戎如狐裘。最後決意報讎同力勦。灑血書誓無悔尤。四十七人相綢繆。蹈間伺隙忽忽歲一周。昨夜四更月黑至。鶴鶴衆皆衷甲撐鐵兜。長梯大椎兼利鏃。或踰高墉或踰溝。開門先刃鈴下騶。大呼轉鬪如貔貅。彼仇人者巧藏強。如椽銀燭徧宅搜。神恫鬼怒人焉度。闖然首出霜鋒抽。彼盤之中血燭髓。先公猶識僮父面目不。此一匕首先公所賜繞指柔。請公含笑試吳鉤。勿復齋恨埋九幽。臣等事畢無所求。願從先君地下游。國家明刑有皋繇。定知四十七士同作檻車囚。不願四十七士戴頭如贅疣。唯願四十七士駢死同首邱。將軍有令付管勾。網輿分置四諸侯。明年賜劍如杜郵。四十七士性命同日休。一時驚嘆爭歌謳。觀者拜者弔者賀者。萬花繞塚每日香煙浮。一裙一屐一甲一冑一刀一矛一杖一笠一歌一畫。手澤珍寶如天球。自從天孫開國首重瓊。鉞和魂一傳千秋。況復五百年來。武門尙武國多賁育儔。到今赤穗義士某某某。四十七人一一名字留。內足光輝大八州。外亦聲明五大洲。

罷美國留學生感賦

漢家通西域。正值全盛時。南至大琉球。東至高句驪。北有同盟國。帝號俄羅斯。各遣子弟來。來拜國子師。皇帝臨辟雍。皇皇漢官儀。石經出玉篋。寶蓋張丹墀。諸王立橫卷。百蠻環泮池。於戲盛德事。慨想軒與羲。自從木蘭狩。國弱勢不支。環球六七雄。鷹立側眼窺。應制臺閣體。和聲帖括詩。二三老臣謀。知難濟傾危。欲爲樹人計。所當師四夷。奏遣留學生。有詔命所司。第一選雋秀。其次擇門楣。高門掇科第。若摘領下髭。黃背好八股。肯令手停披。茫茫西半球。遠隔天之涯。千金不垂堂。誰敢狎蛟螭。惟有小家子。重利輕別離。紆千山頭雀。短喙日啼饑。但圖飛去樂。不復問所之。藍縷田舍奴。蓬頭乳臭兒。優給堂俸錢。榮頒行裝衣。舟人東西人。相顧驚復疑。此乃窶人子。胡爲來施施。使者挈乘槎。四牡光駢駢。鄭重詔監督。一一聽指麾。廣廈百數間。高懸黃龍旗。入室闈無人。但見空泉比。便便腹高臥。委蛇復委蛇。借問諸學生。了不知東西。各隨女師去。雛雞母相依。鳥語日啾啾。庶幾無參差。就中高材生。每有出類奇。其餘中不中。大半悲染絲。千花紅氍毹。四窗碧琉璃。金絡水晶柱。銀盤夜光杯。鄉愚少所見。見異輒意移。家書說貧窮。問子今何居。我今膳雙雞。誰記炊屨屨。汝言盎無糧。何不食肉糜。客問故鄉事。欲答顏忸怩。嬉戲替戾岡。游讌賀跋支。互談伊優亞。獨歌妃呼豨。吳言與越語。病忘反不知。亦有習祆教。相率拜天祠。口嚼天父餅。手繙景教碑。樓臺法界住。香華美人貽。此間國極樂。樂不故蜀思。新來吳監督。其僚喜官威。謂此泛駕馬。銜勒乃能騎。

徵集諸生來不拜卽鞭笞弱者呼暑痛強者反唇稽汝輩狼野心不如鼠有皮誰甘畜生罵公然老拳揮  
監督憤上書溢以加罪辭諸生盡佻達所業徒荒嬉學成供蠻奴否則仍漢癡國家糜金錢養此將何爲  
朝廷命使者去留審所宜使者護諸生本意相維持監督意亦悔駟馬舌難追使者甫下車含怒故詆譏  
我不知許事我且食蛤蜊監督拂衣起喘如竹筒吹一語不能合遂令天地睽郎當一百人一一悉遣歸  
竟如瓜蔓抄牽累何纍纍當其未遣時西人書交馳總統格蘭脫校長某何誰願言華學生留爲國光輝  
此來學日淺難言成與虧頗有聰穎士利雖非鈍槌忽然筵席徹何異鞞帶褫本圖愛相助今胡棄如遺  
相公答書言不過別瑕疵一旦盡遣撤譁然稱我欺怒下逐客令旋禁華工來溯自西學行極盛推康熙  
算兼幾何學方集海外醫天士充日官南齋長追隨廣譯奇器圖諸器何夥頤惜哉國學舍未及設狄鞮  
矧今學興廢尤關國盛衰十年教訓力百年富強基奈何聽兒戲所遣皆卑微部婁難爲高混沌強書眉  
坐令遠大圖壞以意氣私牽牛罰太重亡羊補恐遲蹉跎一失足再遣終無期目送海舟返萬感心傷悲  
按美國留學生於辛巳年裁撤奏請派往者曾文正公募集學生者豐順丁日昌率往者吳川陳蘭彬後  
派出使大臣前監督高州區諤良新會容增祥後監督南豐吳嘉善其僚友爲金某初率學生繼派副使  
爲新會容閱哈佛  
學堂亦其手造云

徐晉齋觀察壽朋 吳翰濤貳尹 廣霈 隨使美洲道出日本余飲之金壽樓翰濤卽席有詩

和韻以贈

銅琶高唱大江東。不許閒愁惱乃公。四海霸才能有幾。兩霸才又云縱交深嘆霸才稀。今宵歡樂又偕同。  
狂呼酒盞看樊素。醉拭刀銘辨正宗。離別尋常休悵怨。男兒志本在飛蓬。

### 流求歌

白頭老臣依牆哭。頹髻斜簪衣慘綠。自嗟流蕩作波臣。細訴興亡溯天蹴。天孫傳世到舜天。海上踈蹤一脈延。彈丸雖號蕞爾國。問鼎猶傳七百年。大明天子雲端裏。自天草詔飛黃紙。印綬遙從赤土頒。衣冠幸不珠崖棄。使星如月照九州。王號中王國小球。英蕩雙持龍虎節。繡衣直指鳳麟洲。從此苞茅勤入貢。豔說扶桑繭如甕。酋豪入學還請經。天王賜襲仍歸賄。爾時國勢正稱強。日本猶封異姓王。只戴上枝歸一日。更無尺詔問東皇。黑面小猴投袂起。謂是區區應余畀。數典橫徵貢百牢。兼弱忽然加一矢。鯨鯢橫肆氣吞舟。早見降旛出石頭。大夫拔舍君舍壁。昨日蠻王今楚囚。畏首畏尾身有幾。籠鳥惟求寬一死。但乞頭顱萬里歸。安將口血羣臣誓。歸來割地獻商於。索米仍輸歲歲租。歸化雖編歸漢里。畏威終奉嚇蠻書。一國從茲臣二主。兩姑未覺難爲婦。稱臣稱姪日爲兄。依漢依天使如父。一旦維新時事異。二百餘藩齊改制。覆巢豈有完卵心。顧器略存投鼠忌。公堂纔錫藩臣宴。鋒車竟走降王傳。剛聞守約比交隣。忽爾廢藩夷九縣。吁嗟君長檻車去。舉族北轅誰控訴。鬼界明知不若人。虎性而今化爲鼠。御溝一帶水溶溶。流水花枝胡蝶紅。尙有丹書珠殿挂。空將金印紫泥封。迎恩亭下蕉陰覆。相逢野老吞聲哭。旌麾莫覩漢官

儀。簪。纓。未。改。秦。衣。服。東。川。西。川。弔。杜。鵑。稠。父。宋。父。泣。鸚。鵡。興。滅。曾。無。翼。九。宗。賜。姓。空。存。殷。七。族。幾。人。脫。險。作。逋。逃。幾。次。流。離。呼。伯。叔。北。辰。太。遠。天。不。聞。東。海。雖。枯。國。難。復。氈。裘。大。長。來。調。處。空。言。無。施。究。何。補。只。有。琉。球。卹。難。民。年。年。上。疏。勞。疆。臣。



# 人境廬詩草卷四

奉命爲美國三富蘭西士果總領事留別日本諸君子

遠泛銀河附使舟。眼看滄海正橫流。欲行六國連衡策。來作三山汗漫遊。唐宋以前原舊好。弟兄之政況同仇。如何甌脫區區地。竟有違言爲小球。

占此江山亦足豪。凌虛樓閣五雲高。人饒春氣花多媚。山入波流地尙牢。六代風流餘蠟屐。百家磨鍊惜名刀。廿年多少滄桑感。盡日憑欄首重搔。

海外偏留文字緣。新詩脫口每爭傳。草完明治維新史。吟到中華以外天。王母環來誇盛典。吾妻鏡在訪遺編。若圖歲歲西湖集。四壁花容百散仙。

海水南旋連粵嶠。斗星北望指京華。但煩青鳥常通訊。貪住蓬萊忘憶家。一日得閒便山水。十分難別是櫻花。白銀宮闕吾曾至。歸與鄉人信口誇。

滄溟此去浩無垠。回首江城意更親。昔日同舟多敵國。而今四海總比鄰。更行二萬三千里。等是東西南北人。獨有興亞一腔血。爲君戶戶染紅輪。

爲佐野雪津常民題觚亭

占得江山美。觚亭足勝遊。高人欣對字。老子許登樓。海氣鼇頭日。天風鵬背秋。他時回首望。認此作并州。

海行雜感

正月十八日由橫濱展輪往美利堅。二月十二日到舟中無事拉雜成此。

東流西日奈愁何。蕩以天風浩浩歌。九點煙微三島小。人間世要縱婆娑。稗瀛大海善談天。艸女童男遠學仙。倘遂乘桴更東去。地球早闢二千年。疊牀恰受兩三人。奩鏡孟巾位置勻。寸地尺天雖局踣。儘容稊米一微身。

青李黃甘爛熳堆。蒲桃濃綠潑新醅。怪他一白清如許。水亦輪迴變化來。食果皆購自歐美二洲諸錫罐封固出之若新摘者水皆用茲

氣一經變化無復海鹹矣。

中年歲月苦風飄。強半光陰客裏拋。今日破愁編日記。一年卻得兩花朝。船迎日東行見日遞速於半途必加一日方能合歷此次重

日仍作爲二月初二故云。

打窗壓屋雨風聲。起看滄波一掌平。我自冒風衝雨過。原來風雨不曾晴。

星星世界徧諸天。不計三千與大千。倘亦乘槎中有客。回頭望我地球圓。

每每鴛鴦逐隊行。春風相對坐調箏。纔聞兒女呢呢語。又作胡雛戀母聲。同舟西人多攜眷屬有俄羅斯公使夫婦每夕對坐彈琴和歌

其聲動心。

偶然合眼便家鄉。夜二三更母在牀。促織入門蛛掛壁。一燈絮絮話家常。是耶非耶其夢耶。風乘我。我乘風耶。藤牀簸魂睡新覺。此身飄飄天之涯。

一日明明十二時。中分大半睡迷離。黃公卻要攜黃嬾。遮眼文書一卷詩。余居東時曾戲刊一印曰東海黃公。

家書瑣屑寫從頭。身在茫茫一葉舟。紙尾只填某日發。計程難說到何州。拍拍羣鷗逐我飛。不曾相識各天涯。欲憑鳥語時通訊。又恐華言汝未知。

蓋海旌旗闢道開。巨輪擘浪礮鳴雷。西人柄酌東人酒。長記通盟第一回。日本與泰西立約。實自嘉永癸丑。美將披理以兵規盟。始所率

軍艦七艘。由太平洋東來。同舟日本人有讓披理。照紀行者。將到時。猶能指其出師處也。

### 逐客篇

華人往美利堅。始於道咸間。初由招工。踵往者多。數至二十萬衆。土人以爭食故。譁然議逐之。光緒六年。合衆國乃遣使三人來商。訂限制華工之約。約成。至八年三月。議員遂藉約設例。禁止華工。感此而賦。

嗚呼民何辜。值此國運剝。軒頊五千年。到今種極弱。鬼蜮實難測。魍魅乃不若。豈謂人非人。竟作異類虐。茫茫六合內。何處足可託。華人渡海初。無異鑿空鑿。團焦始蝸廬。周防漸虎落。藍縷啓山林。邱墟變城郭。金山蟹堞高。伸手左右攫。驢呼滿載歸。羣誇國極樂。招邀盡室行。後腳踵前腳。短衣結椎髻。擔簦躡草屨。酒人率庖人。執鉞偕執斲。抵掌齊入秦。諸毛紛繞涿。後有紅巾賊。刑章指名捉。逋逃萃淵藪。趨如蛇赴壑。

同室戈婁操入市刃相斲。助以國網寬日長。土風惡漸漸生妒爭。時時縱謠詠。謂彼外來丐。只圖飽囊囊。地皮足一踏。有金盡跳躍。腰纏得萬貫。便騎歸去鶴。誰肯解髮辮。爲我供客作。或言彼無賴。初來盡袒膊。喜如蟲撲緣。怒則獸噬搏。野蠻性嗜殺。無端血染鍔。此地非惡溪。豈容食人鱷。又言諸婁羅。生性極齷齪。居同狗國穢。食等豕牢薄。所需日百錢。大穀難比較。任彼賤值傭。我輩坐腴削。眼見手足傷。誰能忍毒蘂。千口音譏譏。萬目瞪灼灼。聯名十上書。上請王斟酌。驟下逐客令。此事恐倍約。萬國互通商。將以何辭卻。姑遣三人行。暫免衆口鑠。擲梟尙成盧。聊一試蒲薄。誰知糊塗相。公然閉眼喏。噫嘻六州鐵。誰實鑄大錯。從此懸厲禁。多方設局鑰。九泥使封關。重門復擊柝。去者鵠遶樹。居者燕巢幕。關譏到過客。郊移及遊學。國典與鄰交。一切束高閣。東望海漫漫。絕遠踰大漠。舟人呼印須。津吏唱公莫。不持入關繻。一來便受縛。但是黃面人。無罪亦笏掠。慨想華盛頓。頗具霸王略。檄告美利堅。廣土在沙漠。九夷及八蠻。一任通印笏。黃白紅黑種。一律等土著。逮今不百年。食言曾不作。吁嗟五大洲。種族紛各各。攘外斥夷戎。交惡詈島索。今非大同世。祇挾智勇角。芒碭紅番地。知汝重開拓。飛鷹依天立。半球悉在握。華人雖後至。豈不容一勺。有國不養民。譬爲叢毆爵。四裔投不受。流散更安着。天地忽跼踖。人鬼共咀嚼。皇華與大漢。第供異族誼。不如黑奴蠢。隨處安渾噩。堂空龍節來。叩關亦足矍。倒傾四海水。此恥難洗濯。他邦互效尤。無地容飄泊。遠步想章亥。近功陋衛霍。芒芒問禹跡。何時版圖廓。

# 紀事

甲申十月爲公舉總統之期。合衆黨欲留前任布連而共和黨則舉姬利扶蘭。兩黨鬭爭。卒舉姬君。詩以紀之。

吹我合衆筊。擊我合衆鼓。擎我合衆花。書我合衆簿。汝衆勿喧嘩。請聽吾黨語。人各有齒牙。人各有肺腑。聚衆成國家。一身比尺土。所舉勿參差。此乃衆人父。擊我共和鼓。吹我共和筊。書我共和簿。擎我共和花。請聽吾黨語。汝衆勿喧嘩。人各有肺腑。人各有齒牙。一身比尺土。聚衆成國家。此乃衆人父。所舉勿參差。此黨誇彼黨。看我後來績。通商與惠工。首行保護策。黃金准銀價。務令昭畫一。家家田舍翁。定多十斛麥。凡我美利堅。不許人侵軼。遠方黃種人。閉關嚴逐客。毋許漏乃公。鼾睡臥榻側。譬如耶蘇餅。千人得飽食。太阿一到手。其効可計日。彼黨斥此黨。空言彼何益。

彼黨訐此黨。黨魁乃下流。少作無賴賊。曾聞盜人牛。又聞挾某妓。好作狹邪遊。聚賭葉子戲。巧術妙竊鉤。面目如鬼蜮。衣冠如沐猴。隱隱數不盡。汝衆能知不是誰。承餘竅。竟欲糞佛頭。顏甲十重鐵。亦恐難遮羞。此黨訐彼黨。衆口同一喙。

某日戲馬臺。廣場千人設。縱橫烏皮几。上下若梯級。華燈千萬枝。光照繡帷撤。登場一酒胡。運轉廣長舌。盤盤黃鬚虬。閃閃碧眼鵠。開口如懸河。滾滾浪不竭。笑激屋瓦飛。怒轟庭柱裂。有時應者者。有時呼咄咄。掌心發雷聲。拍拍齊擊節。最後手高舉。明示黨議決。

演說事未已。復闢縱觀場。鐵兜繡繡襦。左右各分行。寶象黃金絡。白馬紫絲繮。囊囊安步靴。林林聳肩鎗。或帶假面具。或手執長槍。金目戲方相。黑臉畫鬼王。仿古十字軍。赤旆風飄揚。齊唱愛國歌。曼聲音繞梁。千頭萬頭動。競進如排牆。指點道旁人。請觀吾黨光。

衆人耳目外。重以甘言誘。濃綠苗芽茶。淺碧釀花酒。斜紋黑普羅。雜俎紅氍毹。瑣屑到釵釧。取足供媚婦。上謁士雕龍。下訪市屠狗。墨屎與侏張。相見輒握手。指此區區物。是某託轉授。懷中花名冊。出請紀誰某。知君有姻族。知君有甥舅。賴君提挈力。吾黨定舉首。丁甯復丁甯。幸勿雜然否。

四年一公舉。今日真及期。兩黨黨魁名。先刻黨人碑。人人手一紙。某官某何誰。破曉車馬聲。萬蹄紛奔馳。環人各帶刀。故示官威儀。實則防民口。預備國安危。路旁局外人。各各捩眼窺。三五立街頭。徐徐撚頰髭。大邦數十籌。勝負終難知。赤輪日可中。已詫郵遞遲。俄頃一報來。急喘竹筒吹。未幾復一報。聞鑼驚復疑。抑揚到九天。啼笑奔千兒。夜半籌馬定。明明無差池。轟轟祝礮聲。雷響雲下垂。巍巍九層樓。高懸總統旗。吁嗟華盛頓。及今百年矣。自樹獨立旗。不復受壓制。紅黃黑白種。一律平等視。人人得自由。萬物咸遂利。民智益發揚。國富乃倍蓰。泱泱大國風。聞樂嘆觀止。烏知舉總統。所見乃怪事。怒揮同室戈。憤爭傳國璽。大則釀禍亂。小亦成擊刺。尋常瓜蔓抄。逮捕徧官吏。至公反成私。大利亦生弊。究竟所舉賢。無愧大寶位。倘能無黨爭。尙想太平世。

## 馮將軍歌

馮將軍。英名天下聞。將軍少小能殺賊。一出旌旗雲變色。江南十載戰功高。黃絳色映花翎飄。中原蕩清更無事。每日摩挲腰下刀。何物烏夷橫割地。更索黃金要歲幣。北門管鑰賴將軍。虎節重臣親拜疏。將軍劍光方出匣。將軍謗書忽盈篋。將軍鹵莽不好謀。小敵雖勇大敵怯。將軍氣湧高於山。看我長驅出玉關。平生蓄養敢死士。不斬樓蘭今不還。手執蛇矛長丈八。談笑欲吸匈奴血。左右橫排斷後刀。有進無退退則殺。奮挺大呼從如雲。同拚一死隨將軍。將軍報國期死君。我輩忍孤將軍恩。將軍威嚴若天神。將軍有令敢不遵。負將軍者誅及身。將軍一叱人馬驚。從而往者五千人。五千人衆排牆進。綿綿延延相擊應。轟雷巨礮欲發聲。旣戟交胸刀在頸。敵軍披靡鼓聲死。萬頭竄竄紛如蟻。十盞十決無當前。一日橫馳三百里。吁嗟乎。馬江一敗軍心懾。龍州壓地賊氛壓。閃閃龍旗天上翻。道咸以來無此捷。得如將軍十數人。制挺能撻虎狼秦。能興滅國柔強鄰。嗚呼安得如將軍。

## 九姓漁船曲

白石青溪波作鏡。翩翩自照驚鴻影。本來此事不干卿。偏擾波瀾生古井。使君五馬從天來。八閩強羅網賢才。何圖滿載珊瑚後。還有西施網載回。西施一舸輕波軟。原是官船當娃館。玉女清臚隔牖窺。徑就郎懷歌婉轉。婉轉佯郎倚郎坐。不道魯男真不可。此時忍俊未能禁。此夕銷魂便真箇。門前烏柏天將曙。寧

篷重對雙星。訴君看銀潢一道斜。小星竟向鵲橋渡。鵲橋一渡太匆匆。割臂盟寒忍負儂。不願郵亭纔一夕。寧將歌曲換三公。紛紛禮法言如雨。風語華言相詿誤。欲乞春陰巧護花。綠章寧向東皇訴。略言臣到庚宗宿。大隄花豔驚人目。爲求篷室夢泉邱。敢挈阿嬌貯金屋。彈章自劾滿朝驚。竟以風流微罪行。如何鐵石心腸者。偏對梨渦忽有情。雅娘傳語鳩媒妬。儂家世世橫塘住。相當應嫁弄潮兒。不然便逐浮梁賈。張羅得鳥雖有緣。將珠抵鵲寧非誤。禍水真成薄命人。微瑕究惜閒情賦。剛說高飛變鳳凰。無端打散鷺鴛鴦。金釵敲斷都由我。團扇遮羞怕見郎。永豐坊柳絲絲綠。拋卻一官賸雙宿。莫將破甑屢迴頭。且唱同舟定情曲。

感懷

下阻黃壚上九天。白雲望斷眼空懸。濛濛零雨又寒食。浩浩長流總逝川。萬里游惟圖一飽。三年淚忍到重泉。此身俯仰都慚愧。鞅掌猶言我獨賢。



# 人境廬詩草卷五

八月十五夜太平洋舟中望月作歌

茫茫東海波連天。天邊大月光團圓。送人夜夜照船尾。今夕倍放清光妍。一舟而外無寸地。上者青天下  
黑水。登程見月四回明。歸舟已歷三千里。大千世界共此月。世人不共中秋節。泰西紀歷二千年。只作尋  
常數圓缺。舟師捧盤登舵樓。船與天漢同西流。虬髯高歌碧眼醉。異方樂祇增人愁。此外同舟下牀客。夢  
中暫免供人役。沈沈千蟻趨黑甜。交臂橫肱睡狼藉。魚龍悄悄夜三更。波平如鏡風無聲。一輪懸空一輪  
轉。徘徊獨作巡檐行。我隨船去月隨身。月不離我情倍親。汪洋東海不知幾萬里。今夕之夕。惟我與爾對  
影成三人。舉頭西指雲深處。下有人家億萬戶。幾家兒女怨別離。幾處樓臺作歌舞。悲歡離合雖不同。四  
億萬衆同秋中。豈知赤縣神州地。美洲以西日本東。獨有一客欵孤篷。此客出門今十載。月光漸照鬢毛  
改。觀日曾到三神山。乘風竟渡大瀛海。舉頭只見故鄉月。月不同時地各別。卽今吾家隔海遙相望。彼乍  
東升此西沒。嗟我身世猶轉蓬。縱游所至如鑿空。禹跡不到夏時變。我遊所歷殊未窮。九州腳底大球背。  
天胡置我於此中。異時汗漫安所抵。搔頭我欲問蒼穹。倚欄不寐心憧憧。月影漸變朝霞紅。朦朧曉日生  
於東。

歸過日本誌感

舊游重到一凄然。電掣光陰又四年。老輩漸聞歌薤露。滄波眞易變桑田。出關符傳行人璽。橫海旌旗下瀨船。今日荷戈邊塞去。可堪雪窖復冰天。謂何子我大使。

舟中驟雨

極天唯海水。水際忽雲橫。雲氣隨風走。風聲挾雨行。鵬垂天欲墮。龍吼海齊鳴。忽出風圍外。滄波萬里平。

到香港

水是堯時日。夏時衣冠又是漢官儀。登樓四望眞吾土。不見黃龍上大旗。

到廣州

秋風獨上越王臺。弔古傷今幾霸才。表裏山河故無恙。因越南事近始解嚴逍遙天海此歸來。滄波淼淼八千里。圓月匆匆一百回。自撫頭顱看髀肉。側身東望重徘徊。

肇慶舟中

穩臥孤篷底。迷茫夜氣微。使星正西向。零雨悵東歸。燈影侵孤枕。波聲蕩四圍。行藏無一是。萬事付沾衣。

將至梧州誌痛

灑盡燈前淚。偏沾身上衣。呼天惟負負。戀母尙依依。吹樹風何急。尋巢鳥獨飛。殷勤看行篋。在日寄當歸。

游七星巖

歸帆正藉好風吹，卻爲看山誤我期。急水漸趨江合處，奇峯橫出路窮時。欲尋柯斧仙何處，壁慶有爛柯山云即王質觀棋之處久困津梁佛亦疲。返景入林人坐久，昏鴉何事獨歸遲。

夜宿潮州城下

九曲潮江水，遙通海外天。客程餘百一，江路故迴旋。犬亦鄉音吠，鷗依岸影眠。鷓聲催款乃，既有曉行船。

夜泊

一行歸雁影零丁，相倚雙鳧睡未醒。人語沈沈篷悄悄，沙光淡淡竹冥冥。近家鄉夢心尤亟，拍枕濤聲耳厭聽。急趁天明催鷓發，開門斜月帶殘星。

遠歸

人人相見各開顏，載得春風入玉關。鄰里關心問筐篋，兒童拍手唱刀環。且圖傍岸牽舟住，競說乘槎犯斗還。海外名山都看遍，杖藜還看故鄉山。

鄉人以余遠歸爭來詢問賦此誌感

歡迎海客遠游歸，各認容顏半是非。六合外從何處說，十年來漸故人稀。糟牀爭送牆頭酒，針線愁牽身上衣。舊識新交徧天下，可如親戚話依依。

今夕

相逢都怪鬢毛蒼。今夕重依燈燭光。已去年華一彈指。無窮心事九迴腸。雲中蜃氣樓臺幻。海外龍堆道  
路長。身世茫茫何可說。呼兒炊飯熟黃粱。

春夜招鄉人飲

春風漾微和。吹斷簷前雪。寒犬吠始停。衆客互排闥。出甕酒子醞。欹壁燭奴熱。花豬間黃鷄。亦足供餽餼。  
團坐盡鄉鄰。無復苛禮設。以我久客歸。羣起爭辯詰。初言日本國。舊是神仙窟。珊瑚交枝柯。金銀眩宮闕。  
雲餘白傅龕。錦留太真轡。今猶驂鸞來。眼見非恍惚。子乘仙槎去。應識長生訣。靈芝不死藥。多少祕筐篋。  
或言可倫坡。索地始未獲。匝月糧懼罄。磨刀咸欲殺。天神忽下降。指引示玉牒。巨鼇戴山來。再拜請手接。  
狂呼登陸去。礮響轟空發。人馬合一身。手秉黃金鉞。野人走且僵。驚辟鬼羅刹。卽今牛貨洲。利盡西人奪。  
金穴百丈深。求取用不竭。又言太平洋。地當西南缺。下有海王宮。蛟螭恣出沒。漫空白雨跳。往往魚吐沫。  
曾有千斛舟。隨波入長舌。天地黑如盤。腥風吹雨血。轉腸入輪迴。遺矢幸出穴。始知出魚腹。人人慶復活。  
傳聞浮海舟。盡裹十重鐵。疊牀十八層。上下各區別。牛羊豕鷄狗。萬物萃一筏。康莊九達開。周廬千戶闢。  
船頭逮船尾。巡行認車轍。其人好樓居。四窗而八達。千光壁琉璃。五色紅鞞鞞。傑閣高入雲。明明月可掇。  
出入鬼仙間。多具鎖子骨。曾見高緹枝。行繩若飛越。犁韃善眩人。變態尤詭譎。常聞海客談。異說十七八。

文章實親見。然否待子決。諸胡飽腥羶。四族出饕餮。飢盤比塔高。硬餅藉刀截。菜香苜蓿肥。酒艷葡萄濃。冷淘黏山螻。濃汁爬沙鼈。動指思異味。諒子固不屑。古稱美鬚眉。今亦誇白皙。紫髯盤蟠虬。碧眼閃健鶻。子年未四十。鬢鬢須在頰。諸毛紛繞涿。東塗復西抹。得毋逐臭夫。習染求容悅。子如誇狄強。應舉巨觥罰。謬稱夜郎大。能步禹跡闕。試披地球圖。萬國僅蟻蝨。豈非談天衍。妄論工剽竊。一唱十隨和。此默彼又聒。醉喝杯箸翻。笑震屋瓦裂。平生意氣頗。滔滔論不歇。到此窮詰屈。口箝舌反結。自作滄溟游。積日多於髮。所見了無奇。無異在眉睫。山經伯翳知。坤圖懷仁說。足迹未徧歷。安敢遽排訐。大鵬恣扶搖。暫作六月息。尙擬汗漫游。一將耳目豁。再閱十年歸。一一詳論列。

### 小女

一燈團坐話依依。簾幕深藏未掩扉。小女挽鬚爭問事。阿娘不語又牽衣。日光定是舉頭近。海大何如兩手圍。欲展地球圖指看。夜燈風幔落伊威。

### 卽事

牆外輕陰淡淡遮。牀頭有酒巷無車。將離復合風吹絮。乍暖還寒春養花。一醉蒼騰如夢裏。此身飄泊又天涯。打窗山雨琅琅響。猶似波濤海上槎。

### 下水船歌

電光一掣光閃天。洪波直瀉無迴旋。饑鷹脫鞵兔走穴。馳輪下阪箭離弦。君看我舟疾如駛。世間快事那有此。潮頭拍拍鷗亂飛。舟人叫絕篙師喜。一山當頭一對面。倏忽兩山都不見。羣山轉瞬眼欲花。況又山頭雲萬變。江隨山轉氣益驕。蹴沙嚙石波橫跳。山雖百折舟一直。拍耳惟覺風刁刁。風聲水聲相鼓盪。舷傾桅側終無恙。風乘我耶我乘風。便凌霄漢游天上。年來足跡徧五洲。浮槎曾到天盡頭。長風波浪奚足道。平生奇絕輸此游。忽聞隔岸唱邪許。緯夫努力力如虎。百丈橫牽上瀨舟。三朝三暮見黃牛。

閉關

鬱鬱松陰外。深深一閉關。暫游二萬里。小住兩三間。雲懶隨龍臥。風微任鳥還。牆頭山自好。何必詡神山。

春暮偶游歸飲人境廬

某水某山我故鄉。今時今日好容光。頻年花事春三月。獨我蓬飄天一方。門外驪駒猶在道。堂前燕子穩棲梁。金盆月艷葡萄綠。便擬狂飛千百觴。

拜曾祖母李太夫人墓

鬱鬱山上松。呀呀林中鳥。松有蔭孫枝。鳥非反哺雛。我生墮地時。太婆七十五。明年阿弟生。弟兄日爭乳。太婆向母懷。伸手抱兒去。從此不離開。一日百摩撫。親手裁綾羅。爲兒製衣裳。糖霜和麵雪。爲兒作餛飩。髮亂爲梳頭。腳膩爲煖湯。東市買脂粉。饋面日生香。頭上盤雲髻。耳後明月璫。紅裙絳羅襦。事事女兒妝。

牙牙初學語。教誦月光光。一讀一背誦。清如新炙簧。三歲甫學步。送兒上學堂。知兒故畏怯。戒師莫嚴莊。將出牽衣送。未歸跨閭望。問訊日百回。赤足足奔忙。春秋多佳日。親戚盡團聚。雙手擎掌珠。百口百稱譽。我家七十人。諸子愛渠祖。諸婦愛渠娘。諸孫愛渠父。因裙便惜帶。將縑難比素。老人性偏愛。不顧人笑侮。隣里向我笑。老人愛不差。果然好相貌。艷艷如蓮花。諸母背我罵。健犢行破車。上樹不停腳。偷芋信手爬。昨日探鵲巢。一跌敗兩牙。噴血噴滿壁。盤礴畫龍蛇。兄妹昵我言。向婆乞金錢。直傾紫荷囊。滾地金鈴圓。爺娘附我耳。勸婆婆加餐。金盤膾鯉魚。果爲兒下咽。伯叔牽我手。心知不相干。故故摩兒頂。要圖老人歡。兒年九歲時。阿爺報登科。劍兒大父旁。一語三摩挲。此兒生屬猴。聰明較猴多。雖鷄比老鷄。異時知如何。我病又老耄。情知不堅牢。風吹兒不長。那見兒扶搖。待兒勝冠時。看兒能奪標。他年上我墓。相攜着宮袍。前行張羅繖。後行鳴敲簫。豬雞與花果。一一分肩挑。爆竹響墓背。墓前紙錢燒。手捧紫泥封。云是夫人誥。子孫共羅拜。焚香向神告。兒今幸勝貴。頗如母所料。世言鬼無知。我定開口笑。大父回顧兒。此言兒熟記。一年記一年。兒齒加長矣。兒是孩提心。那知太婆事。但就兒所見。依稀記一二。太婆每出入。籠東拄一杖。後來杖挂壁。時見垂帷帳。夜夜攜兒眠。呼娘搔背蚌。展轉千搥腰。殷殷春雷響。佛前燈尙明。窗隙見月上。大父舉簾來。歡笑時鼓掌。瑣屑及鄉鄰。譏訶到官長。每將野人語。眩作鬼魅狀。太婆悄不響。便知婆欲睡。戶樞徐徐關。移踵車輪曳。明朝阿娘來。奉匱爲盥洗。欲飯爺捧盤。欲羹娘進匕。大父出迎醫。覩縷講脈理。

咀嚙分膏藥。斟酌共量水。自兒有知識。日日見此事。幾年舉場忙。幾年絕域使。忽忽三十年。光陰迅彈指。今日來拜墓。兒既鬚滿嘴。兒今年四十。大父七十九。所喜頗聰強。容顏類如舊。過山看松柏。不要攜杖走。拜跪不須扶。未覺躬偃僂。挂珠碧霞犀。猶是母所授。繡補炫錦鷄。新自粵西購。一手拳頰髭。一手振袍袖。打鼓唱迎神。紅氈齊泥首。上頭爇紅香。中間酌黃酒。青箬苞黍粽。紫絲絡蓮藕。大父在前跪。諸孫跪在后。森森排竹筍。依依伏楊柳。新婦外曾孫。是婆定婚媾。阿端年始冠。昨年已取婦。隨兄擎腰扇。阿和亦十五。長樛次當孫。此皆我兒女。青青秀才衣。兩弟名誰某。少者新簪花。捧觴前拜手。次第別後先。提抱集賤幼。一家盡偕來。只恨不見母。母在婆最憐。刻不離左右。今日母魂靈。得依太婆否。樹靜風不停。草長春不留。世人盡癡心。乞年拜北斗。百年那可求。所願得中壽。謂兒報婆恩。此事難開口。求母如婆年。兒亦奉養久。兒今便有孫。不得母愛憐。愛憐尙不得。那論賢不賢。上羨大父福。下傷吾母年。吁嗟無母人。悠悠者蒼天。

遣悶

花開花落掩關臥。負汝春光奈汝何。天下事原如意少。眼中人漸後生多。聲聲暮雨蕭蕭曲。去去流光踏踏歌。今日今時有今我。茶烟禪榻病維摩。

寒食

幾日春陰畫不成。纔過寒食又清明。霏霏紅雨花初落。嫋嫋白波萍又生。欄外輕寒簾內暖。竹中微滴柳



梢晴浮雲萬變尋常事。一瞬光陰既屢更。

夜飲

長風吹月過江來。照我華堂在手杯。莫管陰晴圓缺事。盡歡三萬六千回。胸中五嶽撐空起。眼底浮雲一掃開。玉管銅絃兼鐵板。與君扶醉上高臺。

日本國志書成誌感

湖海歸來氣未除。憂天熱血幾時攄。千秋鑑借吾妻鏡。四壁圖懸人境廬。改制世方尊白統。罪言我竊比黃書。王船山集有黃書頻年風雨鷄鳴夕。灑淚挑燈自卷舒。

十月十九日至滬初隨何大臣如璋使日本即於是日由上海東渡今十二年矣

百年有幾相逢日。一別重來十二年。海水萍蹤仍此地。歲星荔實忽周天。長江浪擊轟雲礮。絕漠寒深大窖甑。公正南歸吾北上。欲論近事恨無緣。子峨先生自塞外賜環由滬來潮。余方由港往滬故差池不得相見。

由潮州泝流而上。駛風舟行甚疾

借得南風便無嫌。上水船千帆張鳥翼。一席盡鷗眠。樹若迎人立。桅隨倚枕偏。篙師相對語。今夕且神仙。夜泊高陂其地多竹

一篷涼月冷於秋。萬竹瀟瀟俯碧流。欲擬勾留留不得。明年何處夢黃州。



# 人境廬詩草卷六

## 自香港登舟感懷

又指天河問析津。東西南北轉蓬身。行行遂越三萬里。碌碌仍隨十九人。久客暫歸增別苦。同舟雖敵亦情親。龍旗獵獵張壇去。徒倚闌干獨愴神。

## 過安南西貢有感

滄海歸來伏著書。平生豪氣未全除。仰看跼跼飛鳶墮。轉憶鄉人下澤車。高下連雲擁百城。一江直溯到昆明。可憐百萬提封地。不敵彈丸一礮聲。神功遠拓東西極。聖武張皇六十年。不信王師倒戈退。翻將化外棄南天。九真象郡吾南土。秦漢以前旣版圖。一自三楊倡議後。珠崖永棄不還珠。班超投筆氣如山。萬里封侯出玉關。今豈無人探虎穴。寶刀難染血痕殷。

## 錫蘭島臥佛

大風西北來。搖天海波黑。茫茫世界塵。點點國土墨。雖曰中國海。無從問禹跡。近溯唐南蠻。遠逮漢西域。舊時職貢圖。依稀猶可識。自明遣鄭和。使節馳絡繹。凡百馬流種。各各設重譯。金葉鑄多羅。玉環獻摩勒。

每以佛光明。表頌帝威德。蘇祿率羣臣。淳泥挈盡室。闌斑披繡縵。扶服拜赤帟。是雖蠻夷長。竊號公侯伯。比古小諸侯。尙足稱蒲璧。其他鳥了部。爭亦坳商舶。有詔鎮國山。碑立高百尺。以此明德意。比刻之罌石。及明中葉後。朝貢漸失職。豈知叢爾國。既經三四摘。鐵圍薄福龍。大半供鳥食。我行過九真。其次泊息力。婆羅左右望。羣島比蟻蝨。咸歸西道主。盡拔漢赤幟。日夕興亡淚。多於海水滴。行行復行行。便到獅子國。浩浩象口水。流到碗伽山。遙望率塔波。相約僧躋攀。中有臥佛像。丈六金身堅。右疊重累足。左握光明拳。雖具堅牢相。軟過兜羅絲。水田脫淨衣。鬢雲堆華鬘。大青髮屈蠡。圍金耳垂環。就中白毫光。普照世大千。八十種好相。一一功德圓。是誰攝巧匠。上登忉利天。刻此牛頭檀。妙到秋毫顛。或言佛涅槃。婆羅雙樹間。此卽茶維地。斯語原訛傳。惟佛有神力。高踞兩山巔。至今雙足跡。尙隔十由延。或言古無人。只有龍鬼仙。其後買珠人。漸次成市廛。此亦妄造語。有如野狐禪。實則經行地。與佛大有緣。參天貝多樹。由此枝葉繁。獨怪如來身。不坐千葉蓮。既付金縷衣。何不一啟顏。豈真津梁疲。老矣倦欲眠。如何沈沈睡。竟過三千年。吁嗟佛滅度。世界眼盡滅。最先王舍城。大闢禪師窟。迦葉與阿難。結集佛所說。爾來一百年。復見大會設。恆河左右流。桴槌聲不絕。其後阿育王。第一信佛法。能役萬鬼神。日造八萬塔。舉國施與佛。金榜國門揭。九十六外道。羣言罷一切。復遣諸弟子。分授十萬偈。北有大月氏。先照佛國月。四開無遮會。各運廣長舌。漢家通西域。聲教遠相接。金人入夢白馬來。負笈繩行復沙度。來往踵相躡。總持四千部。重譯多於髮。

華言通梵語。衆推秦羅什。後分律法論。宗派各流別。要之仗盧字。力大過倉頡。南有獅子王。鑿字赤銅鑠。當時東西商。互通度人筏。但稱佛弟子。能避鬼羅刹。遂使諸天經。滿載商人篋。鳥喙郝子洲。畏鬼性駭怯。一聞地獄說。心畏睽摩殺。賴佛得庇護。無異棲影鷓。國主爭布金。妃后亦托鉢。尊佛過帝天。高供千白氈。樂奏梵音曲。訟聽番僧決。向來文身人。大半著僧衲。達摩浮海來。一花開五葉。語言與文字。一喝付抹殺。十年勤面壁。一燈傳立雪。直指本來心。大聲用棒喝。非特道家流。均會入莊列。竟使宋諸儒。沿襲事剽竊。最奇宗喀巴。別得大解脫。不生不滅身。忽然佛復活。西天自在王。高踞黃金榻。千百氈裘長。膜拜伏上謁。西戎犬羊性。殺人日流血。喃喃誦經聲。竟能消殺伐。藏衛各蕃部。無復事鞭撻。卽今奔巴瓶。改法用金椽。論彼象教力。羣胡猶震懼。綜佛所照臨。竟過九洲闊。極南到朱波。窮北踰靺鞨。大東渡日本。天皇盡僧牒。此方護佛齒。彼土迎佛骨。何人得鉢緣。某日是箭節。莊飾紫金塔。供食白銀闕。倒海然脂油。震雷響金鉞。香雲幢幡雲。九天九地徹。五百虎獅象。遍地迎菩薩。謂此功德盛。當歷千萬劫。有國賴庇護。金甌永無缺。豈知西域賈。手不持寸鐵。舉佛降生地。一旦盡劫奪。

我聞舒五指。化作獅子雄。能令衆醉象。敗竄頭籠東。何不勅獸王。俾當敵人衝。我聞犄大力。手張祖王弓。射過七鐵豬。入地千萬重。何不矢一發。再張力士鋒。我聞四海水。悉納毛孔中。蛟龍與魚鼈。衆生無不容。何不口一吸。令化諸毛蟲。我聞大千界。一擊成虛空。譬擲陶家輪。極遠到無窮。何不氣一噴。散爲鞞藍風。

家聞三昧火。燒身光熊熊。千眼金剛杵。頭出烟焰紅。何不呼阿奴。一用天火攻。我聞安息香。力能勅毒龍。尾擊須彌山。波濤聲洶洶。何不呼小婢。悉遣河神從。我聞阿修羅。橫攻善見宮。流盡赤蚌血。藕絲遁無蹤。何不取天仗。壓制羣魔凶。我聞毗琉璃。素守南天封。薜荔鳩盤茶。萬鬼聲喁喁。何不飭鬼兵。力助天王功。惟佛大法王。兼綜諸神通。聲聞諸弟子。遞傳術猶工。如何斂手退。一任敵橫縱。竟使清淨土。概變腥膻戎。五方萬天祠。一齊鳴鼓鐘。遙望西王母。虎齒髮蓬蓬。合上皇帝號。萬寶朝河宗。佛力遂掃地。感嘆摧肝胸。佛不能庇國。豈不能庇教。奈何五印度。竟不開佛號。古有韋陀書。云自梵天造。貴種婆羅門。挾此肆凌傲。凡夫鈍根輩。分定莫能校。自佛倡平等。人各有業報。天堂與地獄。善惡人所召。卑賤衆首陀。吹螺喜相告。亦有婆羅門。漸漸服教導。食屑鴉鳩行。夜行鴝鷓叫。塗灰身半裸。拜月腳左蹻。各棄事天業。迴向信三寶。大地閻浮提。慈雲徧覆幬。何意梵志輩。勢盛復鼓噪。灰死火復然。尾大力能掉。別創溫都名。布以人皇詔。佛頭橫著糞。訶罵雜嘲誚。盡驅出家人。一一出邊徼。外來波斯胡。更立祆神廟。千牛祭火光。萬馬拜日曜。嗣後摩訶末。採集各經要。一經衍聖傳。一劍鎮羣暴。謂此哥羅尼。實以教忠孝。天使乘白馬。口宣天所誥。從則升九天。否則殺左道。教主兼霸王。黃屋建左纛。繼以蒙古主。挾勢尤桀驁。以彼轉輪王。力大誰敢較。邇來耶穌徒。徧傳新舊約。載以通商舶。助以攻城礮。謂天只一尊。獲罪無所禱。一切土木像。荒誕盡可笑。頂上舍利珠。拉雜付摧燒。竟使佛威德。燈滅樹傾倒。摩耶撫鉢哭。迦葉捧衣悼。像法二千年。今日未劫到。

惡王魔波旬。更使衆魔嬈。天人八部衆。誰不生悲惱。

噫嗟五大洲。立教幾教皇。惟佛能大仁。首先唱天堂。以我悲憫心。置人安樂鄉。古分十等人。貴賤如畫疆。惟佛具大勇。自棄銅輪王。衆生例平等。一律無低昂。罪畏末日審。報冀後世償。佛說有彌勒。福德莫可當。將來僧祇劫。普渡肯安康。此皆大德慧。傾海誰能量。古學水風火。今學聲氣光。辯才總無礙。博綜無不詳。獨惜說慈悲。未免過主張。臂稱窮鷓肉。身供餓虎糧。左手割利刃。右手塗檀香。冤親悉平等。善惡心皆忘。愈慈愈忍辱。轉令身羸尪。獸蹄交鳥跡。一聲外物狀。人間多虎豹。天上無鳳凰。虎豹多筋力。故能恣彊梁。鳳凰太文彩。毛羽易摧傷。惟彊乃秉權。彊權如金剛。吁嗟古名國。興廢殊無常。羅馬善法律。希臘工文章。開化首埃及。今亦歸淪亡。念我亞細亞。大國居中央。堯舜四千年。聖賢代相望。大哉孔子道。上繼皇哉唐。血氣悉尊親。聲名被八荒。到今四夷侵。盡徹諸邊防。天若祚中國。黃帝垂衣裳。浮海率三軍。載書使四方。王威鎮象主。鬼族馴狼臙。歸化獻赤土。頌德歌白狼。共尊天可汗。化外胥來航。遠及牛賀洲。鞭之如羣羊。海無烈風作。地降甘露祥。人人仰震旦。誰侮黃種黃。弱供萬國役。治則天下強。明王久不作。四顧心茫茫。

溫則宮朝會

萬燈懸耀夜光珠。繡縷黃金匝地鋪。一柱通天銘武后。三山絕島勝方壺。如聞廣樂鈞天奏。想見重華蓋地圖。五十餘年功德盛。女媧以後世應無。

重霧

碌碌成何事。有船吾欲東。百憂增況瘁。獨坐屢書空。霧重城如漆。寒深火不紅。昂頭看黃鶴。高舉挾天風。

倫敦大霧行

蒼天已死黃天立。倒海翻雲百神集。一時天醉帝夢酣。舉國沈迷同失日。芒芒蕩蕩國昏荒。冥冥蒙蒙黑甜鄉。我坐斗室幾匝月。面壁惟拜燈光王。時不辨朝夕。地不識南北。離離火焰青。漫漫劫灰黑。如渡大漠沙盡黃。如探巖穴黝難測。化塵塵亦緇。望氣氣皆墨。色象無可名。眼鼻若并塞。豈有盤古氏。出世天再闢。又非阿脩羅。攪海水。上擊。忽然黑暗無間。墮落阿鼻獄。又驚惡風吹船。飄至羅刹國。出門寸步不能行。九衢徧地鈴鐸聲。車馬鷄棲匿不出。樓臺蜃氣中含腥。天羅磕匝偶露缺。上有紅輪色如血。曖曖曾無射日光。涼涼未覺炎手熱。吾聞地球繞日日繞球。今之英屬徧五洲。赤日所照無不到。光華遠被天盡頭。烏知都城不見日。人人反抱天墜憂。又聞地氣蒸騰化爲雨。巧算能知雨點數。此邦本以水爲家。況有竈煙十萬戶。倘將四海之霧銖積寸算來。或尙不如倫敦城中霧。

在倫敦寫真誌感

人海茫茫着此身。蒼涼獨立一傷神。遞增哀樂中年感。等是尋常行路人。萬里封侯從驃騎。中興名相畫麒麟。虎頭燕頰非吾事。何用眉頭鬱不申。



得梁詩五書

廿年蹤跡半天下。數盡新交總不如。四海幾人真我友。萬金一紙當家書。相期雲漢高飛鶴。難忘江湖同隊魚。事事蹉跎落人後。可堪君尙逐前車。余得拔萃後四年。舉於鄉。詩五亦如之。余常以此爲戲。

今別離

別腸轉如輪。一刻既萬周。眼見雙輪馳。益增中心憂。古亦有山川。古亦有車舟。車舟載離別。行止猶自由。今日舟與車。併力生離愁。明知須臾景。不許稍綢繆。鐘聲一及時。頃刻不少留。雖有萬鈞柁。動如繞指柔。豈無打頭風。亦不畏石尤。送者未及返。君在天盡頭。望影倏不見。煙波杳悠悠。去矣一何速。歸定留滯不。所願君歸時。快乘輕氣球。

朝寄平安語。暮寄相思字。馳書迅已極。云是君所寄。既非君手書。又無君默記。雖署花字名。知誰箝緡尾。尋常並坐語。未遑悉心事。況經三四譯。豈能達人意。只有班班墨。頗似臨行淚。門前兩行樹。離離到天際。中央亦有絲。有絲兩頭繫。如何君寄書。斷續不時至。每日百須臾。書到時有幾。一息不相聞。使我容顏悴。安得如電光。一閃至君旁。

開函喜動色。分明是君容。自君鏡奩來。入妾懷袖中。臨行剪中衣。是妾親手縫。肥瘦妾自思。今昔得毋同。自別思見君。情如春酒濃。今日見君面。仍覺心忡忡。攬鏡妾自照。顏色桃花紅。開篋持贈君。如與君相逢。

妾有釵插鬢。君有襟當胸。雙懸可憐影。汝我長相從。雖則長相從。別恨終無窮。對面不解語。若隔山萬重。自非夢來往。密意何由通。

汝魂將何之。欲與君追隨。飄然渡滄海。不畏風波危。昨夕入君室。舉手搴君帷。披帷不見人。想君就枕遲。君魂倘尋我。會面亦難期。恐君魂來日。是妾不寐時。妾睡君或醒。君睡妾豈知。彼此不相聞。安怪常參差。舉頭見明月。明月方入扉。此時想君身。侵曉剛披衣。君在海之角。妾在天之涯。相去三萬里。晝夜相背馳。眠起不同時。魂夢難相依。地長不能縮。翼短不能飛。只有戀君心。海枯終不移。海水深復深。難以量相思。

憶胡曉岑

一別匆匆十六年。雲龍會合更無緣。隔隣呼飲記同巷。積歲勞思吝一箋。無數波濤滄海外。何時談話酒杯前。太章走徧東西極。天外瀛洲別有天。

感事三首

酌君以葡萄千斛之酒。贈君以玫瑰連理之花。飽君以波羅徑尺之果。飲君以天竺小團之茶。處君以琉璃層累之屋。乘君以通幃四望之車。送君以金絲壓袖之服。延君以錦綉圍牆之家。紅氍貼地燈耀壁。今夕大會來無遮。袞裳攜手雙雙至。仙人之入紛紛如麻。繡衣曳地過七尺。白羽覆髻騰三叉。襜褕乍解雙臂袒。旁綴纓絡中寶珈。細腰亭亭媚楊柳。窄靴簇簇圍蓮華。膳夫中庭獻漣乳。樂人階下鳴鼓笳。諸天人龍

原  
书  
缺  
页

原  
书  
缺  
页

原  
书  
缺  
页

原  
书  
缺  
页

原  
书  
缺  
页

原  
书  
缺  
页



原  
书  
缺  
页

原  
书  
缺  
页

原  
书  
缺  
页

原  
书  
缺  
页

原  
书  
缺  
页

原  
书  
缺  
页

原  
书  
缺  
页

原  
书  
缺  
页



原  
书  
缺  
页

原  
书  
缺  
页

頽牆殘月竹冥冥。閃閃微燈三兩星。絳帕白衣偏袒舞。時聞巷犬吠流螢。

中西流娼所生女。以父母異種。故皆色白髮黑。非常美秀。富商

多納爲姬妾。別營屋居之。夜半月高。絃索齊鳴。而擊鼓唱歌。均沿用巫來由舊習。往往聲聞數里。

鐙紅月白可憐宵。羯鼓如雷記里遙。異種名花新合樂。知誰金屋別藏嬌。  
千形萬態樹扶疏。欲喚無名口又茹。重譯補箋新艸木。馬留名字蟹行書。  
一聲長嘯海天空。聲浪沈沈入海中。又挾餘聲上天去。天邊嚶唳一歸鴻。  
蕩蕩青天一紙鋪。團團紅日半輪孤。波搖海綠雲翻墨。誰寫須臾萬變圖。



# 人境廬詩草卷八

## 悲平壤

黑雲草山山突兀。俯瞰一城礮齊發。火光所到雷碇礮。肉雨騰飛飛血紅。翠翎鶴頂城頭墮。一將倉皇馬革裹。天跳地踔哭聲悲。南城早已懸降旗。三十六計莫如走。人馬奔騰相踐蹂。驅之驅之速出城。尾追翻聞餓鳴聲。大東喜舞小東怨。每每倒戈飛暗箭。長矛短劍磨鐵鎗。不堪狼藉委道旁。一夕狂馳三百里。敵軍便渡鴨綠水。一將囚拘一將誅。萬五千人作降奴。

## 東溝行

濛濛北來黑烟起。將臺傳令敵來矣。神龍分行尾銜尾。倭來倭來漸趨前。綿綿翼翼一字連。倏忽旋轉成渾圓。我軍瞭敵遠飛礮。一彈轟雷百人墜。一彈星流藥不爆。敵軍四圍來環攻。使船使馬旋如風。萬彈如錐爭鑿空。地爐煮海海波湧。海鳥絕飛伏蛟恐。人聲鼓聲噤不動。漫漫昏黑飛劫灰。兩軍各挾攻船雷。糝糊不辨莫敢來。此船桅折彼釜破。萬億金錢紛雨墮。入水化水火化火。火光激水水能飛。紅日西斜無還時。兩軍各唱饒歌歸。從此華船匿不出。人言船堅不如疾。有器無人終委敵。

## 哀旅順

海水一泓烟九點。壯哉此地實天險。礮臺屹立如虎闕。紅衣大將威望儼。下有深池列鉅艦。晴天雷轟夜電閃。最高峰頭縱遠覽。龍旗百丈迎風颭。長城萬里此爲塹。鯨鵬相摩圖一噉。昂頭側睨視耿耿。伸手欲攫終不敢。謂海可填山易撼。萬鬼聚謀無此膽。一朝瓦解成劫灰。聞道敵軍蹈背來。

哭威海

臺南北若唇齒。口東西若首尾。劉公島中間峙。嗟鐵圍薄福龍。龍偃屈盤之中。海與陸不相容。敵未來路已窮。敵之來。又夾攻。敵大來。先拊背。榮城摧。齊師潰。南門開。犬不吠。金作臺。須臾廢。萬鈞礮。棄則那。礮擊船。我奈何。船資敵。力猶可。礮資敵。我殺我。危乎危。北山嘴。距南臺。不尺咫。十里牆。薄如紙。李公睡。戴公死。寇深矣。事急矣。糜海軍。急上臺。雷轟轟。化爲灰。山號跳。海驚猜。擊者誰。我實來。南復北。臺烏有。船子子。東西口。天大雪。雷忽發。船齧裂。龍見血。鬼夜哭。船又覆。地日蹙。龍局縮。壞者撞。傷者鬥。破者沈。逃者走。噫。吁。噫。海陸軍。人力合。我力分。如螻屈。不得申。如鬪雞。不能羣。毛中蟲。自戕身。絲不治。絲愈焚。火不戢。火自焚。遁無地。謀無人。天蓋高。天不聞。四援絕。莫能救。卽能救。誰死守。礮未毀。人之咎。船幸存。付誰某。十重甲。顏何厚。海漫漫。風浩浩。龍之旗。望杳杳。大小李。愁絕倒。巋然存。劉公島。

偕葉損軒大莊夜談

頻歲華胥睡味酣。又扶殘醉到江南。更無舊雨誰堪語。欲訪名山奈未諳。花尙含苞春過半。月剛留影夜

初三丁當簷鐵君休問。抽得閒身且絮譚。

乙未二月二十七日公祭沈文肅公祠

管絃合沓鐘鼓喧。左鑪右鼎騰香煙。翩然被髮乘雲下。知公未遂神龍蟠。憑闌東望大江去。旁通閩海百由延。增城赤嵌蠹孤島。下有膏沃千良田。柘漿茶苳作銀氣。紅塵四合城郭闐。生番擢人食人肉。側有餓虎貪垂涎。當時倭奴軼我界。公統王師居中權。大官媼嬰主和議。公唾謂不值一錢。側聞近者議輸幣。乃竭水衡傾銅山。南門管鑰東流柱。搖搖竟如風旌懸。流求兩屬忽改縣。舉族北轅王東遷。公言尺寸不許讓。興滅繼絕兼保藩。氍毹大長議分島。公尙搖手謂不然。豈期舐糠遂及米。神州亦竟污腥羶。巍峩鉅艦古未有。鑿破混沌成方圓。考工作記智述物。雲房石棧相鉤連。後來漢幟成一隊。椎輪筆路推公先。病中呢喃造鐵甲。欲聚衆鐵城三邊。東溝一戰礮雷震。轟轟洞擊七札穿。人船兵甲各糜化。蟲沙萬數魚鼈千。威海劉島據堅要。漆城孰上池難填。蜃息蝮伏不敢出。如引鐵鎖封喉咽。天驕橫肆地險失。坐令虬蟻咸無援。曹蜍李志奄奄氣。仰求敵國垂哀憐。言爲衆生乞生命。手書降表黃龍箋。恐公聞此氣山湧。妄語詭公船猶全。就中鄧林二死士。躬蹈烈火沈重淵。願公遣使携葆羽。垂手接引援上天。金戈鐵馬英靈在。尙藉神力旋坤乾。吁嗟公去十六載。今日何月時何年。捧觴再拜席未散。又聞奔命囊書傳。是日聞澎湖之警

爲同年吳德瀟壽其母夫人

羅太恭人渠縣人歸澂江知府吳公笏丞道光己丑進士

鬱鬱龍象山。松柏森蒼蒼。中有丹山鳥。哀鳴復迴翔。樹下卽方池。池旁多鴛鴦。封缸有美酒。羅列東西廡。新婦廚下來。徐徐捧羹湯。長孫華臚冠。幼孫明月璫。再拜拜壽母。願母舉一觴。呼瀟汝來前。未言淚盈眶。瞿瞿心目中。曷嘗須臾忘。汝父初聞喪。星奔去澂江。露宿衣雞斯。雨泣鈴郎當。沈沈永甯城。淒風搖陰房。切脈零亂絲。背面欹空床。病名我不知。何由知醫方。迴頭看我面。眼語諸兒郎。復指白衣冠。當作收斂裝。汝時口啖餅。學哭嬉樞旁。爲汝換錦袍。隨兄爇爐香。朝發瀘州頭。丹旄魂飛揚。暮宿巴江尾。白雞鳴悽愴。體夫冒重棺。騎奴嘲笑囊。家有垂白母。猶待兒治喪。遙遙二千里。如何到家鄉。明年汝兄歸。捧棺交汝兄。逝者遂已矣。存者稱未亡。我今七十三。忽忽四十霜。食梅難得甜。啖蔗難得漿。何圖見孫曾。驩笑同此堂。瀟也奉母言。手書告其朋。同年黃遵憲。曾歷各海邦。西俗重婦女。安居如天堂。一簪值十萬。一衣百萬強。登樓客持裾。試馬夫引繮。夢中不識役。矧乃身手當。雖則同女身。苦樂何參商。吁嗟三代後。女學將毋忘。執業只箕帚。論功惟酒漿。所託或寒微。持身備嬪嬙。拳拳事女君。縮縮足循牆。人權細已甚。世情習爲常。周婆欲制禮。胡兒惟有孃。將此語人人。人人疑荒唐。人生於父母。猶戴日月光。同是鞠育恩。誰能忍分張。當時黔蜀交。塞道嗥豺狼。驅兒就兒學。虎口兒勿驚。黃巾動地來。捉人鎖琅璫。棄家匿深山。視盎無宿糧。蜀薑與蜀錦。殷勤遠寄將。口書勉兒學。兒學毋怠荒。山中多黃蘗。甘苦母自嘗。母苦兒則知。不知母何望。



瀟今富學行。非母曷有成。斯實備父德。豈徒慰姑嫜。作婦甘卑屈。爲親宜顯揚。顯揚萬分一。恩義終難詳。盤龍恭人誥。雕螭節孝坊。悠悠鹿鳴詩。並坐歌笙簧。歌我述德篇。彤管何芬芳。持謝有母人。念茲永勿忘。

### 馬關紀事

既遣和戎使。翻貽驕倨書。改書追玉璽。絕使復軺車。唇齒相關誼。干戈百戰餘。所期捐細故。盟好復如初。卅載安危繫。中興郭子儀。屈迎回鶻馬。羞引漢龍旗。正勞司賓館。翻驚力士椎。存忘家國淚。淒絕病床時。括地難償債。臺高到極天。行籌無萬數。納幣一千年。遼金歲幣銀二十萬兩。以今計之。合一千年。乃有此數。恃衆忘蠶蠹。驚人看雀。齟齬傷心償。博進十擲輒成鞬。

竟賣盧龍塞。非徒棄一州。趙方謀六縣。楚已會諸侯。地引相牙犬。鄰還已奪牛。瓜分倘乘敝。更益後來憂。

蕞爾句驪國。羣知國必亡。本圖防北狄。遷怒及西皇。患轉深蟬雀。威終讓虎狼。朝鮮自主後。日本公使三浦某合黨謀亂。擾及王宮。

王避居於俄羅斯使館半年。弟兄同禦侮。莫更禍蕭牆。

### 晚渡江

擾擾悲生事。孤篷自往還。霞紅眉欲笑。山綠鬢遙刪。魚底星辰睡。鷗邊天地閒。號咷磯外水。莫更向人間。

### 降將軍歌

衝圍一舸來。加飛衆軍屬。目停鼓鞞。船頭立者持降旗。都護遣我來致詞。我軍力竭勢不支。零丁絕島危。

乎危。龜鼈小豎何能爲。島中殘卒皆瘡痍。其餘鬼妻兵家兒。鍋底無飯枷無衣。紇干凍雀寒復饑。六千人命懸如絲。我今死戰彼安歸。此島如城海如池。橫排各艦珠纍纍。有礮百尊槍千枝。亦有彈藥如山齊。全軍旗鼓我所司。本願兩軍爭雄雌。化爲沙蟲爲肉糜。與船存亡死不辭。今日悉索供指麾。乃爲生命求恩慈。指天爲正天鑒之。中將許諾信不欺。詰朝便爲受降期。兩軍雷動懽聲馳。燐青月黑陰風吹。鬼伯催促不得遲。濃薰芙蓉傾深卮。前者闔棺後輿尸。一將兩翼三參隨。兩軍雨泣咸驚疑。已降復死死爲誰。可憐將軍歸骨時。白幡飄揚丹旒垂。中一丁字懸高桅。迴視龍旗無子遺。海波索索悲風悲。悲復悲。噫。噫。噫。

五月十三日夜江行望月

灑淚填東海。而今月一圓。江流仍此水。世界竟今年。橫折山河影。誰攀闔闔天。增城高赤嵌。夜照血痕殷。臺灣行

城頭逢逢雷大鼓。蒼天蒼天淚如雨。倭人竟割臺灣去。當初版圖入天府。天威遠及日出處。我高我曾我祖父。艾殺蓬蒿來此土。糖霜茗雪千億樹。歲課金錢無萬數。天胡棄我天何怒。取我脂膏供仇虜。眈眈無厭彼碩鼠。民則何辜罹此苦。亡秦者誰三戶楚。何況閩粵百萬戶。成敗利鈍非所覩。人人效死誓死拒。萬衆一心誰敢侮。一聲拔劍起擊柱。今日之事無他語。有不從者手及汝。堂堂藍旗立黃虎。傾城擁觀空巷舞。黃金斗大印繫組。直將總統呼巡撫。今日之政民爲主。臺南臺北固吾圉。不許雷池越一步。海城五月

風怒號。飛來金翅三百艘。追逐巨艦來如潮。前者上岸雄虎彪。後者奪關飛猿獠。村田之銃備前刀。當輒披靡血杵漂。神焦鬼爛城門燒。誰與戰守誰能逃。一輪紅日當空高。千家白旗隨風飄。搢紳耆老相招邀。夾跪道旁俯折腰。紅纓竹冠盤錦條。青絲辮髮垂雲髻。跪捧銀盤茶與糕。綠沈之瓜紫蒲桃。將軍遠來無乃勞。降民敬爲將軍導。將軍曰來呼汝曹。汝我黃種原同胞。延平郡王人中豪。實關此土來分茅。今日還我天所教。國家仁聖如唐堯。撫汝育汝殊黎苗。安汝家室毋譏謔。將軍徐行塵不翳。萬馬入城風蕭蕭。嗚呼將軍非天驕。王師威德無不包。我輩生死將軍操。敢不歸依明聖朝。噫嚯吁。悲乎哉。汝全臺。昨何忠勇。今何怯。萬事反覆隨轉睫。平時戰守無豫備。曰忠曰義何所持。

### 度遼將軍歌

聞雞夜半投袂起。檄告東人我來矣。此行領取萬戶侯。豈謂區區不余畀。將軍慷慨來度遼。揮鞭躍馬跨人豪。平時蒐集得漢印。今作將印懸在腰。將軍鄉者曾乘傳。高下句驪蹤跡遍。銅柱銘功白馬盟。鄰國傳聞猶膽顫。自從弭節駐雞林。所部精兵皆百鍊。人言骨相應。封侯恨不遇時逢。一戰雄關巍峩高。插天雪花如掌春風顛。歲朝大會召諸將。銅爐銀燭圍紅氈。酒酣舉白再行酒。拔刀親割生彘肩。自言平生習鎗法。鍊目鍊臂十五年。目光紫電閃不動。袒臂示客如鐵堅。淮河將帥巾幗耳。蕭娘呂姥殊可憐。看余上馬快殺賊。左盤右辟誰當前。鴨綠之江碧蹄館。坐令萬里銷烽烟。坐中黃曾大手筆。爲我勒碑銘燕然。么麼

鼠子乃敢爾。是何雞狗何蟲豸。會逢天幸遽貪功。它它籍籍來赴死。能降免死跪此牌。敢抗顏行聊一試。待彼三戰三北餘。試我七縱七擒計。兩軍相接戰甫交。紛紛鳥散空營逃。棄冠脫劍無人惜。只幸腰間印未失。將軍終是察吏才。湘中一官復歸來。八千子弟半摧折。白衣迎拜悲風哀。幕僚步卒皆雲散。將軍歸來猶善飯。平章古玉圖鼎鐘。搜篋價猶值千萬。聞道銅山東向傾。願以區區當芹獻。藉充歲幣少補償。毀家報國臣所願。燕雲北望憂憤多。時出漢印三摩挲。忽憶遼東浪死歌。印兮印兮奈爾何。

閏月飲集鍾山送文芸閣學士

廷式

假歸兼懷陳伯嚴吏部

三立

潑海紅霞照我杯。江山如此故雄哉。馬蹄蹴踏西江水。相約扶桑濯足來。

用寫經齋體送葉損軒之申江

幾日蕭疏雨滴簷。送君一舫水新添。閏餘桐葉閒來數。去後桃花笑復拈。索和詩箋停玉版。判依文稿閣牙籤。夫餘立國今何似。爲我探詢海外髯。

立秋日訪易實甫

順鼎

遂偕遊秦淮和實甫作

袖裏魂南一束詩。茫茫相對兩情癡。看揚玉海塵千斛。喜贖青溪鱗一枝。鶉首賜人天亦醉。龍泉伴我世誰知。死亡無日難相見。況又相逢便說離。

又和實甫

九州莽莽匆匆走。兩鬢蕭蕭漸漸枯。欲訪蓬萊難附鶴。暫攀楊柳可藏烏。筆留白石飛仙語。袖有青溪小妹圖。猶是人間乾淨土。莫將樂國當窮途。

元武湖歌和龍松岑繼棟

大江滾滾流日夜。降旛屢墜石頭下。別有蒼茫一片湖。山勢周遭潮不打。湖光十里擎風荷。游人競說安樂窩。船頭簫管驢背酒。吳娘楚客時經過。城南暑鬱蒸如甕。汗雨橫流溼衣縫。笳鼓欣停戰伐聲。蓬船合作清涼夢。一客新自天邊來。唐春卿侍郎一客臥起叢書堆。龍松岑戶部承平公子文章伯。同坐有沈諤皆王雪澄兩觀察何詩孫太守

酒龍詩虎爭崔嵬。天風浩浩三萬里。吹我犯斗星槎迴。河山不異風景好。今者不樂何爲哉。江城明媚雨新霽。菱葉蓮蓬送香氣。井闌莫問燕支山。鐘聲尙認雞鳴埭。閒閒十畝逍遙遊。莽莽六朝興廢事。珠樓綺閣未渠央。青蓋黃龍奈何帝。盛衰漫唱百年歌。哀樂且圖今日醉。酒波光溢金叵羅。銀鱸錦鴨甘芳多。強顏作歡攢眉飲。茫茫對此如愁何。夕陽映郭空波明。柳絲漾綠蘆芽青。平生舊游在吾眼。彷彿上野湖心亭。上野西湖爲日本東京游讌佳處美酒肥牛酣大嚼。頭冠腰箭恣歡諠。遙想將軍渡海歸。相從凱唱從軍樂。

九月初三夜招袁重黎柯巽庵梁節庵王晉卿諸君小飲和節庵韻

嫋嫋風波又此秋。青溪幾曲映清流。疏篷剪燭人重話。短鬢簪花老漸羞。杯影驚心傾海水。角聲催晚逼城樓。兼葭別有悽悽恨。不向中央怨阻修。

上海喜晤陳伯嚴

颯颯秋風夜氣深。照人寒月肯來臨。磯頭黃鶴重相見。海底鱘魚未易尋。伯嚴到滬訪我三日不值。大地山河悲缺影。中年絲竹動歡心。橫流何處安身好。從子商量抱膝吟。

題黃佐廷贈尉遺像

佐廷名季良。番禺人。光緒十年七月初三日。在閩江揚武船中殉難。詔以雲騎尉承襲。方敵船圍困馬江。佐廷自以照像寄其父道平。自言能爲忠臣。卽是孝子。卒踐其言。年僅二十五耳。

潑海旌旗燕血紅。防秋諸將盡籠東。黃衫淺色靴刀備。年少翻能作鬼雄。  
不如烏鳥陳情表。生屬猴年寄母書。讀到季良男百拜。淚痕點點照衣裾。  
不將褒鄂畫凌煙。颯爽英姿尙凜然。一語衝君冠上髮。有人降表寫龍箋。

贈梁任父同年

列國縱橫六七帝。斯文興廢五千年。黃人捧日撐空起。要放光明照大千。  
仗盧左字力橫馳。臺閣官書帖括詩。守此毛錐三寸管。絲柔綿薄諒難支。  
白馬東來更達摩。青牛西去越流沙。君看浮海乘槎語。倘有同文到一家。  
寸寸山河寸寸金。孤離分裂力誰任。杜鵑再拜憂天淚。精衛無窮填海心。  
又天可汗又天朝。四表光輝頌帝堯。今古方圓等顛趾。如何下首讓天驕。

青者皇穹黑劫灰。上憂天墜下山隕。三千六百釣鼈客。先看任公出手來。

寄女

團團雞子黃。醜醜花豬肉。雙雞日饋泊。毋許竊更驚。飯蒸杭稻香。酒潑蒲萄綠。庖丁日解牛。碎切煮爛熟。吹沫成白波。碾麈積紅麴。罨以自然鼎。濃過留香粥。我日啜此汁。十載未厭足。勿告而翁知。知之忍眉蹙。牛旁侍閻羅。黃金獰四目。云欲取屠人。橫叉入地獄。佛自愛衆生。我且飽天祿。嗟余患瘡後。負風幾欲伏。計臂小半分。量腰賸一束。兩頰旋深渦。而今漸平復。須白一二莖。雙鬢尙垂綠。朝朝輒飽後。行行捫余腹。寄汝近時影。祝我他時福。

江南三四月。夾道花爭妍。誰家女如雲。各各扶婢肩。碧羅湖水媚。茜紗秋雲媚。就中最驕詡。繡羅雙行纏。一裾覆百金。一襪看千錢。婷婷復嫋嫋。纖步殊可憐。笑謂蠻方人。半是赤足仙。新樣尖頭鞋。略仿浮海船。上繡千鴛鴦。下刺十丈蓮。指船大如許。伸腳笑欲顛。汝輩聞此語。當引扇障顏。父母誰不慈。忍將人雕鐫。幸未一缸淚。買此雙拘攣。邇聞西方人。設會同禁煙。意欲保天足。未忍傷人權。吁嗟復吁嗟。作俑今千年。寶塔高十層。巍峨天主堂。塞人欲上天。引手能扶將。指揮十字架。閃閃碧眼光。土人手執箠。驅之如虎狼。蘇州大都會。新開通商場。蜃氣噓作樓。馬鬣化爲牆。行有女歐絲。條條出空桑。載我金錢去。百帆復千箱。我奉大府檄。奔走吳之江。一月三往來。往來趁夜航。彼曾領事官。時時從商量。喜則軒眉笑。怒或虬髯張。

豈免鬪唇舌。時復據肝腸。世人別顏色。或白亦或黃。黑奴汝所知。汝曾至南荒。昔有女王國。曾封親魏王。文身易斷髮。鱗介被冠裳。自我暨降旛。亦附強國強。汝弟捧地球。手指海中央。區區黑子大。胡爲戰則贏。汝母口誦經。佛國今何方。如何伏魔者。怒目無金剛。聰明汝勝母。書付汝參詳。慎勿給人看。看則疑荒唐。感懷呈樵野尙書丈卽用話別圖靈字韻

海南巨鱷頑不靈。非人非鬼絕靚聆。詘強彌隙百無策。罔兩鑄鼎誰能銘。方今五洲猶戶庭。雲帆颺艦來不停。海波漫漫檣不掩。天闕蕩蕩門無扃。突然太行扼井陘。欲上無梯馳無輪。守門信信黑犬吠。傳書杳杳飛鸞青。背盟絕客出何經。更索鉅島屯飛舲。蛙蛤相呼祇取鬧。蛟螭攫人先染腥。我生遇合如逕庭。累百感心萬勞形。西踰萬里大漠絕。東居三年濛雨零。於今忽作閉口瓶。焚香依佛晝鎖廳。平生蹤跡默自數。將南忽北飄浮萍。故鄉梅花今已馨。在山泉水催我聽。歸攜片石同君平。客槎奈犯牽牛星。

放歌用前韻

歸來歸來兮窮鬼舍我。擲揄鬼不靈。我目無睹耳無聆。迷陽迷陽傷我足。豈能絕漠渡磧遠。勒燕然銘。平生履海如戶庭。風輪逐地馳不停。忽然鳳皇受詒鳩告絕。百靈閉門門晝扃。行趨太行越井陘。莫縲馬兮朝展輪。攀雲觀日俯視衆山小。復走江南江北。飽看青山青。不然痛飲讀騷經。望衡九面浮湘舲。秋風嫋嫋一葉渡江去。金焦山下。下探水窟蛟龍腥。噫吁乎窮邊甌脫多王廷。尙有五嶽留真形。我鄉我土大有



好山水猶能令我顏丹鬢綠。不復齒髮嗟凋零。肩囊腰劍手鉢瓶。歸來歸來兮。左樓右閣中有旋馬廳。二松五柳四圍雜桃李。坐看風中飛絮波中萍。寒梅着花幽蘭馨。小山招隱君其聽。歸來歸來兮。菜香飯熟茶餘睡覺。獨自語京華。北望戀戀北斗星。

題樵野丈運甃齋話別圖

光緒丙戌尚書奉使美國道出廣州倪豹岑中丞爲作此圖

四海復四海九州更九州。既踰海西極。尙非天盡頭。今之墨利堅。佛說牛賀洲。通商五十載。聚衆千百儔。金椎南北道。鐵耜東西疇。世族庾氏庾。專門韓人韓。吉莫製革履。蒙戎縫旃裘。下至洒削技。亦挾瓦墁售。人人輦金歸。金山高甌窶。初關合衆國。布告東諸侯。紅黃黑白種。萬族咸并收。無端畫禹跡。不使隙地留。爭食鬪鷄蟲。別味殊薰蕕。橫下逐客令。相率合力勦。九泥封函關。劃道分鴻溝。欲使越地舟。同歌篋國篋。公時秉英蕩。禦侮持干楨。逆阪善轉丸。密室工藏彊。謂有百金產。當免南冠囚。按約往美之華工。應往來欲限禁。凡犯禁者。概加以囚繫。公與外部議。華工在美。苟有千金產者。卽不許禁。已諾行。而華工不解此意。轉以鬪爭廢約。鑿山通蠶叢。築臺高環榴。拔幟已歸漢。右袒翻爲劉。識此約時。上下議員。豈圖五丁力。竟招衆楚咻。華言造蜚語。越調騰怨謳。我時居京都。逢人說因由。恨不後車從。參預前箸籌。乙酉九月。遵憲歸自美國。明年春。公由豹岑中丞。馳檄召至廣州。命仍充華民。亦非意計所及也。逮公唱刀環。我復隨軒輶。契闊六七載。烟波杳悠悠。忽然地軸翻。東海嗟橫流。黃塵滾滾來。

蔽天森戈矛。遼東十萬家。血染紅燭髓。何物掉尾鯨。公然與龍仇。中有枳首蛇。飛飛從鷓鴣。盲雲雜怪雨。波寒風颼颼。魴鱖戒出入。蛟螭互蟠蠕。公復探虎穴。徑驅車前騶。絲轡關無華。雲旌慘垂旒。謂我識塗馬。召我來咨諏。檄我千里船。揖我百尺樓。戰旗捲風急。臙鼓催年逾。竦立誦璽書。未語鯁在喉。皇帝問東皇。兩國非寇讐。元元一家子。所願兵革休。側聞哀痛詔。淚珠熒雙眸。何期尺一書。按劍明珠投。和戎盟已定。關港事方稠。我捧大府檄。尋約毋效尤。夜郎挾天驕。自比黑面猴。鴉音不革響。馬逸難維婁。定議法六條。未審然與不。喜公告典屬。語妙言無郵。公亦定載書。氣奪藩之酋。頗如雲從龍。上下相應求。平生臨公後。學步隨沈浮。公使美日秘三國使日本國憲初超擢出驂乘各國事務大臣憲亦由候補道奉使德國誤犯凌斗牛。德使誤聽致生違言凡公所親歷。我亦窮追搜。古稱絕域使。例比譚天鄒。獻環詡蓋地。折箠誇防秋。王會徵職貢。使父親懷柔。今日渡西海。受節先包羞。紫鳳短褐倒。黃龍青酒酬。與公共此役。積歲叢百憂。艱難比天險。嗟怨惟鬼謀。一燈話疇昔。累夕言伊優。憲也初識公。同客齊之罍。哦詩商舊學。漉酒酣新篘。抵掌當世務。時時摩劘緜。爾時會秦趙。重獄窮共兜。時以滇南苗人殺馬嘉利事合肥傳相與威安瑪會議於此吁嗟海大魚。已如魚中鉤。尙能跋巨浪。展翼摩天游。指東覆蟠木。圖南包小球。環顧四海波。依然完金甌。卽當繪圖時。今亦一星周。二老話昇平。一室何清幽。入門竹數竿。翠覆雲油油。登盤獻橙橘。繞屋圍松楸。茫茫大瀛海。寸地纔一瀨。門前水只尺。便通浮海舟。海水綠搖天。中函今古愁。公自翔丹鳳。我行從白鷗。再閱二十年。

重對話綢繆

和沈子培同年曾植

蕩蕩門開翼不飛。九天爲正有天知。鳩媒絕我言何巧。猿臂封侯數本時。縹緲三山信徐市。橫縱六里聽張儀。雲中指點回車路。且任東風馬耳吹。

游仙詞仍用沈乙庵韻

玉宇揚塵海盡飛。丁寧無遣世人知。誤移紫鳳圖難補。欲探青鸞足又踦。惡水疊經鬼羅刹。散仙猶詔漢官儀。思歸送遠天風曲。遙聽紅牆玉笛吹。

元朱碧山銀槎歌

王阮亭居易錄槎杯元銀工朱碧山製吏部侍郎孫北海家物苑西集又云宋荔裳觀察所藏後歸於余馮海宴金石索言近藏曾寶谷家杯左鑄朱華玉造右至正壬寅圖書碧山二字皆小篆也或仿其製出以譏客爲作此歌

華燈照夜張銅荷。酒池灑灑吹白波。主人醉客出奇器。錯落絕勝銀頗羅。玉芒鋒殺巧削楮。珊瑚盤屈紛交柯。中虛龍腹深兀兀。下銳鳳尾飛莎莎。滑稽滿注妙能轉。渾脫安穩平不頗。拍浮凌波舞白鳥。蜿蜒帳翅旋丹螺。槎頭有人五銖服。挾書傲睨顏微酡。蓬萊三山在臺瓊。靴尖一趨時來過。蓬萊記李適之酒器有蓬萊瓊上有三山象三下鑄至正壬寅字。朱華手鑄無差訛。吁嗟大元起漠北。滅國五十揮天戈。大瓶昇酒四白象。行幕鳴

鼓千明駝。珠盤玉甕鴉鵲石。萬邦琛寶來求和。使星任指東西極。亦飲白鶴擎金鵝。承平日久文物盛。巧工亦復高巍峨。一杯流傳六百載。急觴飲我憂益多。天平平戶覆舟後。寇來又見東海倭。玉塵百斛輸不盡。黃龍十艦棄則那。繡衣使者雖四出。強顏媚敵還遭訶。卽今迴槎令逐客。竟隔上關遮銀河。居易錄。杯八字云。欲渡銀河。隔上關。時人浪說貫銀。追思虞揭作高會。苑西集。元時虞揭二公。朝回花底恆鳴珂。清灣如何不覓天孫錦。只帶支機片石還。各令碧山製槎爲壽。談定窮星宿海。觀飲應賦天馬歌。海鷗盜去杯羽化。尙竊形似工研磨。坐觀桑田幾興廢。如撫銅狄三摩抄。肆工述物亦苦窳。朝官退食無委蛇。攢眉對飲長太息。銀槎銀槎奈爾何。

爲何翹高兵部藻翔題象山圖

裊瀛大海四圍環。半在虛無縹緲間。天戴堯時州禹迹。分明認取自家山。叩門海客偶譚瀛。發篋陰符或論兵。糜盡蟲沙賸猿鶴。拭乾殘淚說閒情。說教祇神方造塔。訛言王母又行籌。年來洗耳胸無事。一味貪眠看水鷗。十七史從何處說。茫茫六合賦何愚。騎驢倒看雲烟過。只好商量入畫圖。

酬曾重伯編修

詩筆韓黃萬丈光。湘鄉相國故堂堂。誰知東魯傳家學。竟異南豐一瓣香。上接孟荀騶論縱。旁通騷賦楚歌狂。澧蘭沅芷無窮竟。況復哀時重自傷。

廢君一月官書力讀我連篇新派詩。風雅不亡由善作。光豐之後益矜奇。文章巨蟹橫行日。世變羣龍見首時。手擷芙蓉策蚪駟。出門惘惘更尋誰。

上黃鶴樓

磯頭黃鶴日東流。又此闌干又此秋。乙未五月客鄂方與客登樓忽鼾睡他人同臥榻。婆娑老子自登樓。聞秦嶽濱濱棄之報遂興盡而返能言鸚鵡悲名士。折翼天鵬慨督州。灑盡新亭楚囚淚。煙波風景總生愁。

上岳陽樓

巍峨雄關據上游。重湖八百望中收。當心忽壓秦頭日。近見西人勢力範圍竟將長江上下畫地難分禹迹州。從古荆蠻原小醜。卽今砥柱孰中流。紅髯碧眼知何意。挈鏡來登最上頭。是日有西人登樓者

長沙弔賈誼宅

寒林日薄井波平。人去猶聞太息聲。楚廟欲呼天再問。湘流空弔水無情。儒生首出通時務。年少羣驚歷老成。百世爲君猶灑淚。奇才何況並時生。

書憤

一自珠崖棄。膠州紛紛各效尤。旅順大連灣威海衛廣南灣瓜分惟客聽。薪盡向予求。秦楚縱橫日。幽燕十六州。未聞南海。處處扼咽喉。

豈欲親豺虎。聯交約近攻。如何盟白馬。無故賣盧龍。光緒二十二年使俄密約已以膠州許之。一着棋全敗。連環結不窮。德取膠州。

俄人不問論者已。知意在旅順矣。四鄰牆有耳。言早洩諸戎。

擾擾無窮事。吁嗟景教行。乍聞祆廟火。已見德車旌。過重牽牛罰。橫挑噬犬爭。挾強圖一逞。莫問出師名。

殺二教士。遂失膠州。

古有羈縻地。今稱險領州。竟聞秦失鹿。轉使魯無鳩。各國勢力範圍。獨中國無分。地動山移恐。天懸日墜憂。君看黑奴國。到此屬何州。

弱肉供強食。人人虎口危。無邊畫甌脫。有地盡華離。爭問三分鼎。橫張十字旗。波蘭與天竺。後患更誰知。

支離

舉鼎贖先絕。支離笑此身。窮塗竟何世。餘事且詩人。技悔屠龍拙。時驚嘆蜡新。剖胸傾熱血。恐化大千塵。

# 人境廬詩草卷九

## 紀事

貫索星連熠熠光。穹廬天蓋暮蒼蒼。秋風鼓吹妃呼豨。夜雨鈴聲劬禿當。十七史從何處說。百年債看後來償。森森畫戟重圍柝。坐覺今宵漏較長。

## 放歸

絳帕焚香讀道書。屢煩促報訊何如。佛前影怖棲枝鷓。海外波驚涸轍魚。上海道蔡鈞遵以兵二百名圍守。捧鎗鷓立。若臨大敵。寓滬西人懼余蹈不測。議聚衆劫余他徙。而日本駐京公使亦請於總署。余慮其重滋余罪也。轉爲之慄懼。此地可能容複壁。廿五夜得總署報云。查康未匿。黃無人肯就問。篋輿。玉關楊柳遼河月。卻載春風到舊廬。

## 九月朔日啓程由上海歸舟中作

月黑霜凝點客衣。寥天雁影乍南飛。一池水問千何事。萬里風勞遠送歸。測鏡回看星貫索。解裝待問石支機。旁人莫誤三能望。遙指銀潢望紫薇。

## 到家

處處風波到日遲。病身憔悴尙能支。少眠易醒藏蕉夢。多難仍逢翦韭時。大海走鰻尋有迹。老翁失馬卜

難知。援琴欲鼓拘幽操。月在中天天四垂。

感事

授受元辰紀上儀。帝堯訓政典留貽。誰知高后垂簾事。又見成王負扆時。九鼎齊鳴驚雉雉。千金懸格購龍醫。白頭父老紛傳說。上溯乾嘉淚欲垂。上變飛騰赤白囊。兩端首鼠疾奔忙。剛聞赤板連名奏。便召長槍第六郎。馳騎鎖門謀大索。屯橋阻水伺非常。珠襦武帳諸臣侍。亟詔明晨幸未央。推車弄頂看文康。變態真如傀儡場。五百控弦謀刼制。一丸進藥失先嘗。傳書信口訶西母。改制稱尊託素王。九死一生仍脫走。頭顱聲價重天亡。金甌親卜比公卿。領取冰銜十日榮。東市朝衣真不測。南山鐵案竟無名。芝焚蕙嘆嗟僚友。李代桃僵泣弟兄。聞道話天兼罵賊。好頭誰斫未分明。父子相從泣獄扉。老翁七十荷征衣。一家草索看生縛。三寸桐棺待死歸。鑿空虛槎疑漢使。涉江奇服怨湘妃。可憐時俊才無幾。瓜蔓抄來摘更稀。下詔曾宣母子離。初聞逐諫後笞兒。心肝誰奉藏衣詔。骨肉難徵對簿詞。一網打餘高鳥盡。九泉曲處蟄龍知。恩牛怨李原與無。莫誤忠奸讀黨碑。



師未多魚遂漏言。如何此事竟推袁。柏人誰白孱王罪。改子終傷慈母恩。金玦厖涼含隱痛。杯弓蛇影負奇冤。五洲變法都流血。先累維新案盡翻。

太白星芒月色寒。五雲縹緲望長安。忍言赤縣神州禍。更覺黃人捧日難。壓己眞憂天夢夢。窮途並哭海漫漫。是非新舊紛無定。君看寒蟬噤衆官。

人境廬之隣。有屋數間。余購取其地。葺而新之。有樓。巋然獨立。無壁。南武山人爲書一聯曰。陸沈欲借舟。權住天。問翻無壁受呵。因足成之。

半世浮槎夢裏過。歸來隨地覓行窩。陸沈欲借舟權住。天問翻無壁受呵。偶引雛孫問初月。且容時輩量汪波。灣灣幾曲青溪水。可有人尋到釣簑。

### 寒夜獨坐臥虹榭

今時何時我非我。中夜起坐心旁皇。風聲水聲烏烏武。日出月出團團黃。層陰壓屋天四蓋。寒雲入戶山兩當。回頭下視九州窄。高飛黃鵠今何方。

### 小飲息亭醉後作

斜日江波聽鷓鴣。鷓鴣啼處是吾廬。酒酣仍作思鄉夢。徑仄難爲益地圖。偶約故人同茗芋。居然丈室坐蓮鬚。朝朝捧牘應官去。忽憶吳江老釣徒。

仰天

仰天擊缶唱烏烏。拍徧闌干碎唾壺。病久忍磨新脾肉。劫餘驚撫好頭顱。篋藏名士株連籍。壁掛羣雄豆剖圖。敢託鳩媒從鳳駕。自排閭闔撥雲呼。

雁

汝亦驚弦者。來歸過我廬。可能滄海外。代寄故人書。四面猶張網。孤飛未定居。匆匆還不暇。他莫問何如。

酬劉子巖同年

瑛

鐵漢樓高天四垂。嶺雲愁護黨人碑。看花每濺啼鵲淚。繞樹難安飛鳥枝。何地可名清淨土。思君忽到太平時。一家樂壽兼文福。呼聿吟書買寫詩。

己亥雜詩

我是東西南北人。平生自號風波民。百年過半洲游四。留得家園五十春。亦曾忍死須臾坐。正用此時持事來。今午垂簾春睡起。擁爐拈箸撥寒灰。自攜蠟屐自扶筇。偶亦偕行挈小童。積習未除官樣俗。袖中藏得歛煙筒。斜陽橋背立移時。偶有人過偶領之。商略雨晴旋散去。不曾相識亦忘誰。

雲中水火界相爭。相觸相磨便作聲。此是尋常推阻力。人間浪作震雷驚。

起世經言雷聲一雲中風界與地界相觸著二風界與水界相

觸著三風界與火界相觸著。譬如樹枝相搭。即有火出。又謂虛空中生電光。以二電相觸。相對相磨。相打。故出光。此即西人乾溼氣相磨。觸成雷電之說。力學氣學已見於佛經矣。

跳珠雨亂黑雲翻。事外閒雲卻自閒。看到須臾圖萬變。終愁累卻自家山。  
老健真應飽看山。看山誰得幾時閒。屢將遊釣誑猿鶴。遲恐山靈笑汝孱。  
夢回小坐淚潸然。已誤流光五十年。但有去來無現在。無窮生滅看香煙。  
日光野馬息相吹。夜氣沈沈萬籟微。真到無聞無見地。衆蟲仍着鼻端飛。  
拋書午倦睡醒時。走聽盲翁負鼓詞。漫說是非身後誤。上場人事類兒嬉。  
天下英雄聊種菜。山中高士愛鋤瓜。無心我卻如雲嬾。偶爾栽花偶看花。  
費盡黃金匝地鋪。算來十笏只區區。無端尙被西隣責。何況商量益地圖。

人境廬之隣有廢屋余以二百萬錢購得之然縱橫不過數丈

而隣居逼處更無可展拓偶有營造輒來責言

曲闌十步九徘徊。三面軒窗四扇開。誇道華嚴彈指現。只憐無地着樓臺。  
牆外垂楊盡別家。平分水竹頗爭差。萬花爛漫他年事。第一安排旋復花。

無端苞拆復接莎。誤盡人非郭橐駝。甫見萌芽生意盡。對花負負奈花何。

接梅花四五枝已生根矣而澆花人日拆視而振摩之卒不得

生。

忍向當門再種蘭。露翻雨打莫重看。思量空谷安身好。猶恐他時畫地難。

蘭

秋淫天漏雨蕭蕭。展葉抽條各自驕。同作綠陰同蔽日。如何修竹肯彈蕉。

種竹種芭蕉

略買臙脂畫折枝。明窗護以壁琉璃。物從中國名從主。綠比波葳紅荔支。

絳藤丹砂菊皆德意志種。植之甚盛。余考中國花果從海外來。

者如蒲萄苜蓿人所共知。此外名無定字。字從音譯。如波羅蜜波羅之類。大抵皆是荔支。或作離支。又作利支。知非華產。然今西南洋無此物。余詢之西人。乃知本阿刺伯種也。今之玻璃。漢書西域傳作璧流離。

說文作璧瑯。亦譯音之名。

絮棉吹入化春衣。渡海山藹足療饑。一任轉踰無內外。物情先見大同時。

亂草刪除綠幾叢。舊花別換日新紅。去留一一歸天擇。物自爭存我大公。

種月李花

農事傳家稷世官。可知粒食出艱難。妄誇天降忘人力。轉當寒冰覆翼看。

呂覽有上農任地辨土三篇。多述后稷之言。蓋農家相傳農學。

嘗謂蕪厥豐草種之黃茂一章。乃濟土宜察物性之學。訓詁家失其旨矣。至誕降嘉種貽我來牟。亦頌后稷配天之功。等於造物。非謂從天而降也。

三千年上舊花枝。頗怪風人不入詩。我向秦時明月問。古時花可似今時。

詩有桃李花。有桃實。而不及梅。花賦咏梅花始於六朝。極盛於

唐。以植物之理推之。古時花未必住。後接以他樹而後盛耳。

移桃接李盡成春。果碩花濃樹愈新。難怪球西新闢地。白人換盡舊紅人。

筆路桃弧展轉遷。南來遠過一千年。方言足證中原韻。禮俗猶留三代前。

五代時有九族隨王審知入閩。客人來州。多在元時。本河南人。

後散居八閩。今之州人。皆由甯化縣之石壁鄉遷來。頗有唐魏儉儻之風。禮俗多存古意。世守鄉音不改。故土人別之曰客人。方言多古語。尤多古音。陳蘭甫先生云。證之周德清中原音韻。多相符合。大埔林海

巖太守則謂客人者中原之舊族。三代之遺民。殆不誣也。

男執干戈女甲裳。八千子弟走勤王。崖山舟覆沙蟲盡。重帶天來再破荒。梅州之土人。今惟存楊古。卜三

從他邑來。今豐順大埔婦人。皆戴銀髻。稱孺人。相傳爲帝昺口勅。此亦足補史傳之缺也。

野外團焦嶺上田。世傳三十子孫千。元時古墓明朝屋。上覆榕陰六百年。土著有傳世四五十者。從寧化

如爲元時矣。孫枝蕃衍。多者數千人。少亦千人。入明以後。墳墓世守無失。元時墓存一二而已。明時築室亦有存者。

宰相表行多譜牒。大宗法廢變祠堂。猶存九兩繫民意。宗約家家法幾章。各姓皆聚族而居。皆有祠堂。糾

訟獄。生械門。故乾隆間。江西巡撫輔德有禁祠之奏。

世守先姑德象篇。人多列女傳中賢。若倡男女同權論。合授周婆制禮權。婦女皆勤儉。世家巨室亦無不

之家。則無役不從。甚至務農。業商。持家教子。一切與男子等。蓋客人家法。世傳如此。五部州中。最爲賢勞矣。

宵娘側足跛行苦。楚國纖腰餓死多。說向粧臺供媚妾。人人含笑看黎渦。有耶穌教士語余。西人束腰。華

女人最完。全無憾云。

反哺難期婦乳姑。繫纓竟占女從夫。雙雙錦襪鴛鴦小。絕好朱陳嫁娶圖。多童養媳。有彌月即

一聲聲道妹相思。夜月哀猿和竹枝。權是團圓悲是別。總應腸斷妃呼豨。土人舊有山歌。多男女相思之

各鄉尙相沿不改。每一辭畢。輒問以無辭之聲。正如妃呼豨。甚哀厲而長。

華燈挂壁祝添丁。吉夢徵蘭笑語馨。日問神游到何處。佛前別供處胎經。日者言胎有神。某日在門。在確

在蟻在雞棲如興工作犯其神則墮胎或胎殘缺世皆違信之

海國能醫山國貪萬夫荷甬轉金輪最憐一二虬髯客手舉扶餘贈別人州為山國土瘠產薄海道既通

業采錫遇害藏則暴富近則荷蘭之日里英吉利之北蠟檳榔嶼法蘭西之四貢皆有積寶至百數十萬者總計南洋華商客人居十之三同治年有葉來在吉隆與土酋鬥爭得其地卒以無力割據歸之英人

此與坤甸羅大伯事略相類

秀孝都居弟子行人人陰騭誦文昌邇來雲笈傳抄貴更寫鸞經拜玉皇嘉道以來所謂學術只誦陰騭

昌一派近更有玉皇教以關帝呂祖文昌為三聖所傳經卷均自降鸞來如明聖經之類大抵本道家名目而拊會以儒家仁孝釋氏因果之說士大夫多崇信之

枯骨如龜識吉凶狐狸鳩占不相容一年訟牒如山積不為疑龍即撼龍溺於風水禍福之說訟獄極多

螺壳漫山紙蝶飛攜雛扶老語依依紅羅繖影銅簫響知是誰家掃墓歸掃墓每在播間聚食喜食螺菓壳於地足以徵其子孫之衆多

也樂用銅簫亦土俗

老樹棲鴉子又孫青青松柏半為薪眼中酒化杯中淚拜手今承主祭人拜曾祖母李太夫人墓

恨無永叔瀧岡表亦媿義之誓墓文說甚微官邀薄祿紙錢在地酒澆墳拜先母吳夫人墓

樹靜風停夢不成枕函側倚淚縱橫荷荷引睡施施溺竟夕聞娘喚女聲婦墓歸不寐隔壁有撫兒者終夜有聲

黃鵠都非五尺童日催人老日龍鍾呼名摩頂回頭道兩頰差如百歲翁隨李伯陶先生謁其母鍾太孺人年九十八歲矣百歲翁謂余

高祖也

五十年前事未忘。白頭諸母說家常。指渠墮地呱呱處。老屋西頭第四房。

一路春鳩啼落花。十齡學步語牙牙。錦袍曾賦小時月。月照恆河鬢已華。十齡學爲詩。塾師以梅州神童。蔡蒙吉一路春鳩啼落花句命。

題。余有春從何處去。鳩亦盡情啼語。師大驚。次日令賦一覽衆山小。余破題云。天下猶爲小。何論眼底山。因是鄉里甚推異之。小時不識月。余進學時賦題也。

忽想尻輪到五洲。海泓煙點小齊州。丁年破浪乘風興。畫壁留圖作臥游。

歲星十二徧周天。繞盡圓球賸半環。法界樓臺米家畫。總輸三島小神山。余客海外十二年。環游地球。所未渡者大西洋海耳。山水明秀。

日本爲最。

長恨古人吾不見。又疑諸史半欺謾。女王銅鏡委奴印。親手摩挲對面看。委奴國王之印。神功皇后之鏡。皆現存博物館中。

烏呼碑下弔忠臣。蹈海人人恥帝秦。震地哭聲塗地血。大東扶起一紅輪。德川氏之末。有處士高山九郎。見宮闕望山陵。則痛哭繼而瀟。

生。君平作山陵志。岩垣松苗修國史。略賴襄著日本政紀。世知尊王。及美英劫盟。舉國復讐。言攘夷而將軍主和。捕戮志士。前仆後起。則又唱尊王以攘夷。連結幕府。傾覆。終知夷不可攘。再變而講和。戎之利維新之業。成於二三豪傑。實基於在下之仁人君子心力之爲也。烏呼。

滔滔海水日趨東。萬法從新要大同。後二十年言定論。手書心史井函中。在日本時。與子蟻星使言中國必變從西法。其變法也。或如日本。

本之自強。或如埃及之被逼。或如印度之受轄。或如波蘭之瓜分。則吾不敢知。要之必變。將此藏之石函。三十年後。其言必驗。

一夫奮臂萬人呼。欲廢稱臣等廢奴。民貴遂忘皇帝貴。莫將讓國比唐虞。華盛頓。華盛頓之拒英也。布告各國。言

當時傳檄開荒令。今日關門逐客書。浪詡皇華誇漢大。請看黃種受人鋤。美利堅土廣人稀。無論紅黃黑。

白各種到美國者均一律看視而  
光緒八年竟行禁制華工之例

赫赫紅輪上。大空搖天海。綠化爲虹。從今要約黃人捧。此是扶桑東海東。歸舟行太平洋。明日到日本矣。五更起坐舵樓中。待日出極目。

所際惟見水耳。俄頃有萬道虹光。上下照映。而日出矣。大如五車輪。頃刻已圓。勢極迅疾。

四百由旬海道長。忽逢此老怨津梁。沈沈睡過三千歲。可識西天有教皇。由香港至錫蘭島。島有臥佛。長三丈餘。佛滅度後。即造此像云。

上燭光芒曜日星。東西並峙兩天擎。象形文字鴻荒祖。石鼓文同石柱銘。埃及國石柱。爲周以前物。字多象形。郭筠仙侍郎所謂體近大

也。

一刀截斷大河橫。省卻闔南六月程。海客懽呼土民怨。債臺高築與天平。蘇彝士河。

瓊闕丹房耀彩霞。爛紅玫瑰雨天華。外孫魯酒皇娥瑟。同醉西方阿母家。英皇即位今六十四年矣。普魯斯王是其外孫。俄皇丹主皆姻

戚。貴壽福祿世所希有。所居有五色宮殿。玫瑰花皇族徽章也。

生是天驕死鬼雄。全歐震蕩氣猶龍。世間一切人平等。若算人皇只乃公。拿破崙紀功碑。

萬燈懸耀夜光珠。照出諸天夜燕圖。纓絡網雲花散雨。居然欲界有仙都。桑斯勒塞法都之極大都會也。

長夜漫漫日不光。黑風吹我墮何方。蒼天已死黃天立。惟見團團雞子黃。九十月之交。倫敦每有大霧。咫尺不辨。余居英時。日晝然燈。凡

二十三日。車馬非鈴鐸不敢行。

眼底塵驚世界微。天風浩浩吹人衣。便當御氣乘毬去。飽看環瀛跨海歸。巴黎鐵塔高一千尺。



浮沈飄泊年年事。偶寄閒鷗安樂窩。急雨打窗浪搖壁。無端平地又風波。到新嘉坡二年。因患瘧久病。初上風定月明。潔無纖翳。惟狂風一吼。則飛浪往往濺入窗戶。間如泛舟大海中也。

雲爲四壁水爲家。公付名山改姓余。瘦菊清蓮豔桃李。一瓶同供四時花。潮州富豪余家。於新嘉坡之豬居養疴。主人素樓名。余因江南有余山名之。曰余山樓。雜花滿樹。無冬無夏。余手摘蓮菊桃李。同供瓶中。亦奇觀也。

上山如畫重累人。結屋絕無東西鄰。襟間海上一九月。屐底人間萬斛塵。余養疴至檳榔嶼。有謝姓者。邀士人昇籃輿而往。至峻絕處。則引手攀援而上。如猿猴然。再用一人護余。足到山頂。絕巘俯海。一無所見。惟月初出時。若在我襟帶間矣。

甌蒸汗雨鬱如珠。兩腋清風習習俱。浴過涼波三百斗。纔知灌頂妙醍醐。客南洋羣島者。每晨起。輒灌頂。曾以此法治伏熱病。蓋以水制汗。使不敢出。久之則併所受鬱熱。滂沛而出。覺體清涼矣。

三年團扇在懷袖。六月重裘仍帶圍。萬里歸槎北風急。經旬卻換五時衣。余客舊金山四年。全用夾衣。居間曾御裘。住新嘉坡三年。僅一單衣。正二月或用薄紗。惟甲午十一月中旬。由坡回華。十日間。炎風朔雪。每日更換。到上海。乃重裘矣。

蟹行艸字畫。佻盧蠟印紅鷹兩翼舒。君主花名民主押。篋中留得兩除書。官領事者。其主國例有文憑。日嘉坡總領事。存英君主美民主簽押。官文各一紙。上有花字。末作一蠟印。印作巨鷹舒翼。獨立大如盤。

夢裏似曾遷海外。醉中不覺到江南。用東坡語。茫茫人海浮沈處。添得閒鷗又兩三。受事日。即電奏調余回華。

我行徧歷三天下。松寥一開天下奇。兩鼎蟠螭碑瘞鶴。還有椒山手寫詩。

焦山。

黃鶴高樓又槌碎。我來無壁可題詩。擎天鐵柱終虛語。空累尙書兩鬢絲。

黃鶴樓已毀。南皮制府常語。黃鶴樓已毀。南皮制府常語。黃鶴樓已毀。南皮制府常語。

庶免火災。然鐵政一局。設餉五六百萬。已易官爲商矣。

御屏丹筆記名新。天語殷殷到小臣。九牧盛名吾豈敢。知非牛李黨中人。

數年來以人才保薦。疆臣則陳右銓。中丞二次。張香濤。督部三

次。劉現莊。督部王。鑾。石。督部榮。仲。華。督部。廖。穀。似。中。丞。朝。官。則。李。蕊。園。尙。書。唐。春。卿。侍。郎。張。野。秋。侍。郎。徐。子。澗。侍。郎。各。一。次。而。鄧。鐵。香。鴻。臚。於。光。緒。九。年。保。奏。使。才。已。有。久。困。下。僚。之。語。聞。得。旨。交。軍。機。處。記。存。凡。

十數次云。

丹樓彩日畫中看。初上鸞坡舉步難。勞動九重前席問。繡衣門外立天官。

故事。道府以下官。必先行引見。乃得召見。余因總理衙門徵召。

至京。本有由吏部帶領引見之旨。而部議尼之。乃奉持旨預備召見。蓋異數也。

堯天到此日方中。萬國強由法變通。驚喜天顏微一笑。百年前亦與華同。

召見時。上言泰西政治。何以勝中國。臣奏泰西之強。悉由變法。

臣在倫敦。聞父老言。百年以前。尙不如中華。上初甚驚訝。旋笑領之。

奉使虛聞結德車。卻迴舞袖到長沙。青鸞傳到東皇信。又泛蓬萊八月槎。

三詔嚴催倍道馳。霸朝一集感恩知。病中泣讀維新詔。深恨鋒車就召遲。

戊戌二月。上命樞臣。進日本國志。繼再索一部。奉使日本。由上

特簡三詔。敦促。有無論行抵何處。着張之洞。陳寶箴。傳令。攬程迅速來京之諭。然余以久病。恨未能遽就道也。

冷月嚴霜照一燈。柝鈴風送響騰騰。案頭英蕩門前戟。豈有蓬蔭覆庾冰。

到滬。病益亟。乃乞歸。已奉旨允。或奏稱康梁尙匿。余慮蓋因。

其藏匿日本使館而誤傳也。有旨命兩江總督查看。上海道蔡鈞張大其事。派兵圍守。然余之所居。本上海道公所。且當時康已在香港矣。

七十尙書出荷戈。三閩憔悴怨湘液。撫琴欲鼓拘幽操。輒唱臣難喚奈何。

竟寫梅邊生祭祠。亦歌塞外送行詩。候人鵠立門如海。浪語風聞百不知。園守之兵。擊鎗環立。如設重圍。外人不知所犯爲何事。疑爲大

獄。險語驚人。徧海內外。知交探問。隔絕不通。然即問及余。余亦不知也。八月二十六夜。乃得旨放歸。

憐君膽小累君驚。抄蔓何曾到友生。終識絕交非惡意。爲曾代押黨碑名。八月二十五日。得一帋曰。與

康有爲往金陵謁南皮制府。欲開強學會。力爲周旋。是時余未識康。會中十六人。有余名。卽所代簽也。又聞與康至交。所贈詩有南陽臥龍之語。及康罪發。乃取文慄參劾之摺。彙刊布市。蓋亦出於無奈也。

環門松竹喜相迎。倚樹安棲鴿不驚。對鏡頭顱顧妻笑。幾乎此事卻干卿。到家

菜傭酒保笑言歡。偶數江湖幾謫官。瓜蔓環門蘭在室。呼兒重檢漢書看。

花落庭空對紫薇。畫簾重處漾斜暉。銜雛燕子渾無賴。眼見人瞋故故飛。

寒燈說鬼鬼啾啾。夜雨言愁我欲愁。只有蓬山萬重隔。未容海客說瀛洲。

左列牛宮右豕圈。冬烘開學鬧殘年。籬邊兀坐村夫子。極口媧皇會補天。

寒爐爆栗死灰然。酒冷燈昏倦欲眠。驚喜讀書聲到耳。細聽仍是八銘篇。八銘篇。鄉塾時文課本也。

風雨雞鳴守一廬。兩年未得故人書。鴻離魚網驚相避。無信憑誰寄與渠。

頸血模糊似未乾。中藏耿耿寸心丹。琅函錦篋深韜襲。留付松陰後輩看。  
古佛孤燈共一龕。無人時與影成三。何方化得身千百。日換新吾對我譚。  
地球捧問海中央。多少紅毛國幾方。聽說龍飛周甲宴。挽鬚要去見英皇。小孩及外孫皆八九歲。  
相約兒童放學時。小孫拍手看翁嬉。平生兩事轟轟樂。爆竹聲騰鶴子飛。粵俗呼紙鳶爲鶴子。  
鏡中歲歲換容儀。諱老無妨略鑷髭。今日髮旃懸不起。星星知賸幾莖絲。  
蜡餘忽夢大同時。酒醒衾寒自嘆衰。與我周旋最親我。關門還讀自家詩。

己亥續懷人詩

白髮滄江淚灑衣。別來商榷更尋誰。閒雲野鶴今無事。可要籃輿共護持。義寧陳右銘先生。  
紛紜國是定維新。一疏驚人泣鬼神。尋徧東林南北部。一家鉤黨古無人。宛平徐子靜。  
薦賢略似孔文舉。下獄還因呂步舒。一編選佛科名錄。便是司空城旦書。貴筑李慈菴先生。  
金華講殿共論思。聖祖文宗舊典貽。指問雞棲庭下樹。可容別築鳳凰池。錢塘張菊生。  
優孟衣冠笑沐猴。武靈胡服衆人咻。問君薙髮新王令。換卻頑民多少頭。咸陽李孟符。  
龍泉知我劍隨身。三斗撐胸熱血新。是我眼中神俊物。熊羆男子鳳凰人。鳳凰熊乘三。  
南嶽雲開華路初。歸來秋雨臥相如。零星幾卷靈鷲閣。只算江郎製錦餘。元和江建霞。

我歌樂府壽人曲。君作師儒紹聖篇。爛漫衆雛環我拜。登堂公瑾是同年。達縣吳季清

文如腹中所欲言。詩是別後相思貲。三載心頭不曾去。有人白皙好鬚眉。義甯陳伯嚴

念我平生同隊魚。又念丈人屋上烏。翩翩公孫才似舅。因君問訊今何如。長沙俞恪士南昌羅郊峴伯嚴有子名衡恪卽其甥也

臣罪當誅父罪微。呼天呼父血沾衣。白頭元鬢哀蟬曲。減盡維摩舊帶圍。宛平徐研父

一卷生花天演論。因緣巧作續絃膠。絳紗坐帳談名理。勝似麻姑背蚌搔。福州嚴又陵

兼綜九流能說佛。旁通四部善談天。紅燈夜雨圍爐話。累我明朝似失眠。仁和夏穗卿

平生著述老經師。絕妙文章幼婦詞。今日皋皮談改制。黃書以外錄明夷。善化皮鹿門

閃電雙眸略似噴。知君龍性未能馴。同游莫學梁園客。自負山膏好罵人。福州鄭蘇庵

自家家法自家妝。鄉里傳誇馬糞王。花樣時文笏尖腳。可容兒女再商量。鄞縣王苑生

船山大隱師承遠。東海襄冥學派新。編到沅湘耆舊錄。難爲君稱作龍身。瀏陽歐陽翥

屈指中興六七公。論才考德首南豐。籠人意氣談天口。轉似區區隘乃翁。湘鄉曾重伯

少年罪狀在金荃。中歲驂鸞便學仙。魂北魂南今哭徧。再傾淚海哭桑田。龍陽易實甫

四壁青山亂疊書。蓮蒿沒徑閉門居。記會元子坊邊遇。手挈筠籃貫柳魚。丹徒陳善餘

相約乘槎萬里遙。天風吹散各蓬飄。屋梁月黑思君夢。忽夢平生無鐵喬。順德何蔚高

頭顱碎擲哭瀏陽。一鳳而今贖楚狂。龜手正需汧澣藥。語君珍重百金方。

瀏陽唐  
韋臣

背負靈囊欲大包。東西游說日譏譏。冶傭酒保相攜去。幸免門生瓜蔓抄。

順德麥孺博南海韓  
樹園三水徐君勉

謬種千年兔園冊。此中埋沒幾英豪。國方年少吾將老。青眼高歌望爾曹。

李炳寰蔡良  
寅唐才質

臘月二十四日詔立皇嗣感賦

漢家累葉子孫千。朱果祥占瓜瓞綿。十世忽遭陽九厄。再傳失紀仲壬年。千秋金鑑懲儲貳。九降綸音慎擇賢。今日小宗承大統。典書豈忘帝堯篇。

先皇遺恨鼎湖弓。世及家傳總大公。誰誤禮經爭繼統。妄拚尸諫效孤忠。弟兄共託施生薦。男子偏遲吉夢熊。片紙病中哀痛詔。前星翹首又移宮。

齊東野語儘荒唐。讀詔人人泣數行。怪事聞呼奈何帝。僂詩敢唱厲憐王。袖中禪代誰經見。管外窺天妄測量。鈎盡甘陵南北部。庶人橫議亦刊章。

家居撞壞慮纖兒。天下膏粱百不知。朝貴預尊天子父。王驕甘作賊人魁。亢龍守蟄存身日。瘐狗相牙擲骨時。玉匣緘名黃帶盛。承平重憶說雍熙。

# 人境廬詩草卷十

庚子元旦

喔喔天雞又一鳴。雙懸二曜展光明。承天仰看金輪轉。震地訛傳玉斧聲。漢厄愁看正月卯。代來幾協大橫庚。自歌太乙迎神曲。終望餘年見太平。

樂奏鈞天夢裏過。瀛臺縹緲隔星河。重華仍唱卿雲爛。大地新添少海波。千九百年塵劫末。東西南國戰場多。南洋非洲均有戰事未知王母行籌樂。歲歲添籌到幾何。

杜鵑

杜鵑花下杜鵑啼。苦雨淒風夢亦迷。古廟衣冠人再拜。重樓關鎖鳥無棲。幽囚白髮哀蟬咽。久戍黃沙病馬嘶。未抵聞鵑多少恨。況逢春暮草萋萋。

初聞京師義和團事感賦

無端桴鼓擾京師。猶記昌陵鼎盛時。今日黃天傳角道。非徒赤子弄潢池。冠纓且教宮人戰。繡闥還充司隸儀。晝夜金吾曾不禁。未知盜首定何誰。

九百虞初小說流。神施鬼設詔兵謀。明知篝火均狐黨。翻使衣冠習狗偷。養盜原由十常侍。詰姦惟賴外

諸侯竹筐麻瓣書團字。痛哭誰陳恤緯憂。

博帶裘冠對舊臣。三年絨口諱維新。儘將兒戲塵羹事。付與尸居木偶人。詔述政行皆鐵案。黨人獄起又黃巾。卽今馬趙來宣撫。猶信投戈是義民。

寄懷邱仲闕逢甲

滄海歸來鬢欲殘。此身商榷到蒲團。哀絃怕聽家山破。醇酒還愁來日難。繞樹烏尋誰屋好。銜雛燕喜舊巢安。朝朝曳杖看山去。看到斜陽莫倚闌。

感事又寄邱仲闕

萬目眈眈大九州。神叢爭博正探籌。何堪白刃張拳黨。大刀會義和拳更擾黃花落地秋。嘉慶癸酉本於八月置閏欽天監奏改爲次年

二月而教匪所傳經有二八中秋黃花落地之語賊黨以爲豫兆定謀糾亂及改閏林清等乃於九月十五日作亂於京師石破真驚天壓已。陸沈可有地埋憂。前番

尙得安身處。莫說寒蕪赤嵌愁。

三邊烽火照甘泉。聞道津橋泣杜鵑。帝釋亦愁龍漢劫。天災況值鼠妖年。流離苦語傳黃蘗。盜竊迷香幻白蓮。嘉慶中白蓮教匪倡亂凡九年傳習京畿者又變爲八卦榮華紅陽白易諸名今之義和拳卽離卦教中徒黨見那文毅公奏疏漫寫哀辭金鹿痛。人間何事不顛連。

述聞



太阿倒授又移權。使到元黃血戰年。狂喝梟盧天一笑。怒訶狗腳帝三拳。垂虹上貫重輪日。瀉海橫分九點煙。畢竟圖王圖作賊。無端殿下比雷癡。

皇京一片變烟埃。二百年來第一回。荆棘銅駝心上淚。觚稜金爵劫餘灰。螟蛉果羸終誰撫。猿鶴沙蟲總可哀。只望木蘭仍出狩。鑾輿無恙賊中來。

說有蒼天不死方。盜泉一飲衆皆狂。人言細柳都兒戲。我欲傳芭哭國殤。鬼吏三官明作賊。神兵六甲解擒王。古今多少昏荒事。併付盲翁負鼓場。

一拳打碎舊山河。兩手公然斗柄按。鸚鵡往來謠語慟。魚龍曼衍戲場多。火焚祆廟連烽燧。轍涸羈臣乞海波。至竟遼東多浪死。尙誇十萬劍橫磨。

拔幟先登徑上臺。礮聲震地忽轟雷。一齊擾擾嗟魚爛。萬目眈眈看虎來。鐵鑄六州成大錯。夜香七市付沈灰。聯盟守約連名奏。賴有維持半壁才。

禹迹茫茫畫九州。到今滄海竟橫流。合縱敢拒三天下。雪恥將尋九世讎。事勢可如騎虎背。功名偏賞爛羊頭。是誰畫諾誰傳詔。一紙明貽萬國羞。

忽灑龍螭翳太陰。臣天主竄到於今。風輪壞劫天難補。磐石無人陸竟沈。揖盜開門終自誤。虐臣覺鼓果何心。當時變政翻新案。早使憂臣淚滿襟。

飛角侵邊局早輸。啓超按輸字疑國家雖缺尙金甌。剪分鶉首天何醉。再拜鶉聲帝獨憂。藉寇終除鉤黨

禍。函圖看送罪臣頭。祖功宗德王明聖。豈有乾坤一擲休。

七月十五夜暑甚看月達曉

空庭樹靜悄無鴉。太白光芒北斗斜。破碎山河猶照影。廣寒宮闕定誰家。光殘銀燭誤偷藥。熱逼金甌看  
剖瓜。滿酌請尊聊一醉。漫愁秋盡落黃花。

南漢修慧寺千佛塔歌

塔爲南漢劉鋹時建。第一層有銘。文曰。敬勸衆緣。以烏金鑄造。首行。千佛塔。七層。於敬州修慧  
寺。二行。瓶塔亭。供養虔繫歸善土望。三行。皇躬玉歷。千春。四行。瑤圖萬歲。然願郡壇  
方隅。次以九宥。三塗。康平。禾麥。豐饒。軍民。寧。魂滯。魄成。證人。天。順。調。境。歌。詠。周。圍。常。隆。瞻。敬。以。大  
寶八年。十行。乙丑。歲大呂之月。設齊慶讚。十一行。銘皆陰文。以光孝寺東。西。鐵塔。證之。其  
三面當尙有題名。如乾亨寺。銅鐘。款或並有衆緣弟子名。然無從尋視矣。此塔創建至今。九百餘年。  
廣東通志。嘉應州志。皆失載。卽吳石華。廣文南。漢金石志。搜羅極富。亦不之及。塔高約三四丈。上七  
層。爲鐵鑄。下壘土築成。無從攀登。故不知塔頂有銘。乙丑兵燹以後。略毀而未壞。嗣爲羣兒毀傷。日  
久。遂圯。余歸里後。求之鄰家。得塔銘一方。續得第五層全層。由下而上。塔銘在下。爲第一層。餘十  
此。又得第三。第四。層之三方。及第二層之一方。考第二層。有七十七佛。像分五層。每層小佛十  
六。大佛一。占小佛位四。第三層。六十七佛。亦五層。每層小佛十四。大佛如上一。第四層。五  
七佛。亦五層。每層小佛十二。大佛如上一。第五層。三十七佛。亦五層。每層小佛十四。大佛如上一。  
式。由是推知第六層。有十二佛。當是兩層。每層六佛。每面二百五十佛。合計千佛也。最高  
之七層。爲合尖頂。應無像。第四層。大佛旁有小字曰。東方善德佛。北方相德佛。四方無量壽佛。南方  
殘缺。以釋典考之。當是南方栴檀佛。佛皆跏趺坐。斂袖。乘蓮花。自第二至第六層。皆方隅下有  
寬約四寸。簷角有蟾蜍形。似以之繫鈴者。唯第一層無簷。有立像二。在兩隅。似是四天王。其數應不

在佛中也。攷敬州於南漢主劉晟乾和三年。卽潮州之程鄉縣。升爲州。鎮縣一。修慧寺。不入志中。寺址亦未悉所在。此塔距余家僅數牛鳴地。歸然立岡上。亦無塔亭。故老傳言乾隆初年。由前州牧王整各塊均置於人境廬。其塔銘則供息亭中。已囑溫墓柳檢討補入新志中。復作此詩以誌緣幸。

天龍不飛海蛟起。遙斥洛州爲刺史。萬事蕭閒署大夫。仍世風流作天子。無愁天子安樂公。黃屋左纛誇  
豪雄。當時十國均佞佛。此國佞佛尤能工。八萬四千塔何處。勅司特用烏金鑄。石趺鐵蓋花四圍。宮使沙  
門名列署。千家設供爭飯僧。百姓燒指添然燈。一州政得如斗大。亦造窣堵高層層。此塔周圍佛千位。十  
方弟子同瞻禮。寶林銅鐘廣勸緣。雲華石室誰作記。坐花共數蓮幾枝。剔繡尙餘銘百字。銘文共一百十  
字。十九下言人鬼共安康。上祝國皇壽千歲。噫嘻劉氏五十年。一方嶺蛋殊可憐。畫地爲牢聚蛇毒。殺人下

酒垂蛟涎。離宮深處卽地獄。鐵牀湯鑊窮烹煎。兔絲吞骨龍作醢。諸劉遺種無一全。人人被髮欲上訴。亡  
魂怨魄誰解冤。編玉爲堂柱念四。媚川采珠人八千。壘山日輸贖罪石。入城亦費導行錢。錢王媚佛善搜  
括。比此尙覺差安便。賣兒貼婦竭膏血。一塔豈有功德緣。爾時王此昏荒國。方詡極樂切利天。紅雲張宴  
飽荔子。素馨如雪堆花田。朝出呼鸞引幢蓋。暮歸走馬委珠鈿。魚英供壺甘露味。翠屏舞鏡春風顛。大體  
雙雙學豬媚。微行側側攜蟾仙。樓羅檢歷縱嬉戲。候窗設監酣醉眠。女巫霞裾坐決事。彼昏只倚常侍賢。  
自謂此樂千萬歲。還丹不服貪流連。誰知執梃降王長。屈指造塔剛七年。星流雨至時事改。風輪轉劫無  
不壞。銅壺漏滴幾須臾。倏忽到今九百載。金蠶往往賣珠市。玉魚時時出銀海。康陵荒廢馬墳空。此塔金

身歸然在。賜田補鉢亦荒蕪。廢像模銅失光彩。人間理亂百不聞。菩薩低眉猶故態。吁嗟乎。佛雖無福亦無殃。而今宗教多荒唐。木鐸廣招諸弟子。天主教之傳教者名曰主教曰神父曰司鐸曰白絹妄說空家鄉。道祖爲重。又有天靈女巫諸名位。所傳經卷以真空家鄉無生父母八字爲真言。書於白絹暗室供之。中西同異久積憤。一朝糜爛如蝸蟻。誰人秉國竟養盜。坐引強敵侵畿疆。天魔紛擾脩羅戰。神兵六甲走且僵。大千破碎六種動。恐與佛國同淪亡。長安北望淚如瀉。空亭徘徊夕陽下。問佛不言佛羊啞。趙佗竊號何真降。孰能保此一方者。

五禽言

不如歸去。不如歸去。博勞無父鸚無母。生小零丁長艱苦。毛羽雖成不自主。歸去歸去。歸何處。不如歸去。姑惡姑惡。小姑謠詠。小姑讒我有間時。獰奴黠婢日助虐。十年不將雛。自嘆妾命薄。作窠猶未成。亦願受鞭撲。一意報姑恩。云何姑不樂。姑惡姑惡。

泥滑滑泥。滑滑北風多雨雪。十步九傾跌。前日一翼翦。昨日一臂折。阿誰肯護持。舉足動牽掣。仰天欲哀鳴。口噤不敢說。回頭語故雌。恐難復相活。泥滑滑泥。

阿婆餅焦。阿婆餅焦。阿婆年少時。羹湯能手調。今日阿婆昏且驕。汝輩不解事。阿婆手自操。大婦來。口饒。小婦來。聲囂囂。都道阿婆本領高。豆其然盡煎太急。炙手手熱驚啼號。阿婆餅焦。

行不得也哥哥。行不得也哥哥。黑雲蓋野天無河。枝搖樹撼風雨多。骨肉滿眼各自他。三年病損瘦到骨。

還欲將身入網羅。一身網羅不敢惜。巢傾卵覆將奈何。行不得也哥哥。

再述

誓師仗鉞大王雄。虐使連聲冒宋聾。萬國談瀛驚創見。八方震電怒環攻。寇來直指濟雲觀。兵起誰張救日弓。況是黑龍江上月。旌旗光照血波紅。璽書皇帝問東皇。親愛從來昆弟行。豈有行人真坐罪。忍看鄰國到唇亡。剛聞窮海通飛雁。翻又穹廬縱盜羊。五百島民如併命。膏腴割盡可能償。存亡危急上呼天。聯乞皇天悔禍延。朝議正爲劉氏祖。里優忽唱李公顛。主盟牛耳方推長。賓館鴻臚竟首懸。誤盡攘夷南宋論。況逢毒手又空拳。噉噉元老語騎閩。杳杳羣臣當殿趨。玉磬賂人終聽客。翠華到處卽遷都。預愁清酒黃龍約。盡倒天吳紫鳳圖。忍聽王孫路旁泣。延秋月黑乳啼烏。羽檄飛馳四百州。先防狼角後髦頭。兩端首鼠盟吳楚。一國蒙戎黨李牛。天意豈忘黃種貴。帝星猶幸紫微留。橫流忍問安身處。北望徘徊漆室憂。

七月二十一日外國聯軍入犯京師

壓城雲黑鴟鳴鳴。齊作吹唇沸地聲。莫問空拳敵市戰。餘聞扈蹕六軍驚。波臣守轍還無恙。日馭揮戈豈

有名。聞道重臣方受節。料應城下再尋盟。

聞車駕西狩感賦

史臣新紀中興年。應數西遷弟一篇。嵩室剛呼千萬歲。帝車同仰九重天。齊人野語紛多故。海客瀛談每浪傳。今日君顏親咫尺。秋風簫鼓競導前。

有以守社稷爲言者口號示之

萬一羣胡竟合圍。城危援絕勢難支。要知四海爲家日。終異諸侯失國時。奪使只如爭虎穴。勞王非敢戰魚麗。溥天頌德三年久。請聽回中鼓吹辭。

中秋夜月

曾聞太姆會羣仙。霞縹雲綉敞綺筵。齊唱人間可哀曲。卻忘天上是何年。橫爭叢博拚孤注。醉擲陶輪碎大千。賸取山河月中影。不成滄海不成田。

讀七月廿五日行在所發罪己詔書泣賦

讀詔人人泣數行。朕躬不德股肱良。三年久已祈羣望。此罪明知在萬方。表裏山河故無害。轉旋日月定重光。婆娑鳳尾親批諾。遙想天顏慘不揚。

諭勦義和團感賦

是民是賊論紛歧。鑄鼎圖姦始共知。黃帶亦編流寇傳。繡衣重覩漢官儀。自天下降愚黔首。爲帝驅除比赤眉。伏劍直臣猶未瞑。料應喜見中興時。

聞駐蹕太原

南海昆明付劫灰。西風汾水雁聲哀。勤王莫肯倡先晉。樂禍人猶奉子頽。兵甲誰清君側惡。衣冠各自賊中來。壺漿夾道民爭獻。願祝橋從萬里回。

聞車駕又幸西安

羣公累月道旁謀。擾擾干戈未敢休。太白去天真一握。稗瀛環海更西流。河山形勢成牛角。神鬼威靈尙虎頭。端王所統虎神營仍隨扈西行。差喜長安今夜月。千年環照帝王州。

久旱雨霽邱仲闕過訪飲人境廬仲闕有詩兼慨近事依韻和之

生菱碎盡贖湖光。未落秋花半染霜。舉目山河故無恙。驚心風雨旣重陽。麻鞋袞袞趨天闕。華蓋遲遲返帝鄉。話到黃龍清酒約。唏噓無語忍銜觴。

兼葭秋老臥江湖。有客敲門夢乍蘇。海外瀛談勞炙轆。電中天笑詫投壺。自循短髮羞吹帽。相對新亭喜雨珠。太白孤雲高兩角。不知曾溼漢旌無。

再用前韻酬仲闕

夜雨紅燈話夢梁。人言十事九荒唐。任移斗柄嗟王母。枉執干戈痛國殤。博戲幾人朱果擲。劫灰徧地白蓮香。殘山一角攜君看。羞喜無須割地償。

北望鈞天帝所都。詔書昨拜執金吾。羞言玉璽褒新事。淒絕霓旌幸蜀圖。牛李尙尋鈎黨禍。晉秦能作一家無。尊王第一和戎策。誰唱迎鑾作先驅。

三用前韻

秋草灤河輦路荒。牛車重又冒風霜。國人爭看天魔舞。帝女難言神鵲祥。今尙拳拳持璽綬。人言籍籍撲縑囊。蕪蕪豆粥艱辛處。應憶東朝樂未央。

無人伏闕諫青蒲。事誤都由七尺孤。當壁咸尊十阿父。折箠思服小單于。黃襪擁護難爲婦。寶玦淒涼乞作奴。同此王稱同此禍。早知金狄讖非誣。

四用前韻

撼門環哭呼高皇。鐘虜何人奉太常。墮地金甌成瓦注。在天貫索指銀潢。歸元纒篋催函送。計口緡錢責幣償。索償至四百五十兆兩。以戶口計之。是每人一緡錢也。豈獨漢唐無此禍。五洲驚怪國人狂。

聚語踰閭二大夫。報書未服五單于。華離尙免分瓜苦。莽亂難遲蔓草圖。藉口豈徒徵紀獻。空拳尙欲曜威弧。禱天莫作遷延役。早已荆榛萬骨枯。



五用前韻

盜璽曾聞罪贊襄。如何在鼎九刑忘。君臣相顧如騎虎。父子難爲隱攘羊。今日家居誰撞壞。老身社飯自思量。忽傳罪己興元詔。霑灑青霄淚萬行。

掩抑魚軒賦載驅。吞聲在野鶴跣。扈行尙縱花門賊。入衛難徵竹使符。舊夢百年仍鎖港。殘山半壁欲遷都。最憐黃鶴樓中客。西望長安淚眼枯。

奏稱臣等自五月以來。驚魂欲斷。淚眼將枯云。

六用前韻

噫嘻諸將敢連衡。傳檄清奸告四方。狼角盡除塵盡掃。龍顏重奉日重光。到今北闕猶朝拱。豈有西鄰妄責償。汾水秋風太行雨。幾人南望感勤王。

天河沈醉國何辜。橫使諸華擾五胡。照海紅燈迎聖母。驚人銅版踏耶穌。奇聞竟合諸天戰。改色愁看蓋地圖。到此鵲喧鳩聚語。猶誇魔術詔神符。

七用前韻

擾擾橫開傀儡場。四方傳笑國昏荒。夢鸚終悔臨朝武。氏蟀應編異姓王。賜劍昨悲吳命短。執戈又弔楚辭殤。賴姦掩賊知難活。殲我良人孰索償。

謂南北殉難。遭害諸君子。

落葉秋風怨帝梧。天寒誰爲送寒襦。六宮亦寫零丁帖。九牧旁觀罔兩圖。列仗黃麾函促送。蒙頭氈毳病

應蘇轉旋龍馭歸何日。恨未前驅手執爻。

八用前韻

驚天重鼓女媧簧。橫逼君絃變履霜。跪地習聞提冒絮。奪門禍遂起蕭牆。日中傾蜺何無忌。海外醫龍竟有方。聞道八神齊警蹕。人間早既唱堂堂。

鸞聲夾道聽謹呼。重覩官儀返上都。三月靡裘思德化。諸天龍節護曼殊。崇德初年西藏達賴禪師遣使馳賀。奏稱爲曼殊皇帝。中央士復尊黃帝。十等人能免黑奴。賴我聖君還我土。人人流涕說康衢。

天津紀亂十二首

九載妖魔亂。先朝寶訓垂。又逢年厄閏。復演卦重離。善禁刀能厭。神姦鼎共知。何堪三輔地。焚亂遂如絲。竟屈將軍貴。焚香啓閣迎。嗔經龍滴淚。圖怪鳥羅平。大禮分輿馬。同仇賦甲兵。紅巾隨衣繡。攜手便偕行。棧道燒先絕。軍書阻不通。九天方設險。六國已環攻。霧暗軍氛墨。波飛戰血紅。鷹麟兼鵲視。高颺大旗風。一概拳槌碎。喧騰萬口譁。噫風傾海市。笑電掉電車。薪積祆神火。蓮開地獄花。忍看灰礮毒。糜盡萬蟲沙。露布明光奏。翻誇士氣揚。執戈童衛國。麾扇女勤王。赤手能擒虎。紅頭看爛羊。傷心驕憤詔。雪恥報先皇。廣募樓羅歷。誇強曳落河。摩雲飛白燕。出地叫蒼鵝。空手婆猴枝。齊聲天馬歌。赤流鳴咽水。猶逞劍橫磨。二伯分藩地。諸胡互市場。虎牢同鄭戍。魚爛竟梁亡。仗劍空神博。靈輪又國殤。相州師一潰。從此隳邊防。

誰繪流民狀。冤霜苦泣零。沙黃嗥餓犬。月黑尾流螢。倭墮拋家髻。郎當閣道鈴。不徒標賣宅。徧地帖零丁。官作胡奴役。魔將鬼界圍。驚雷從掌起。酣夢忽頭飛。神亦釘銅版。人難護鐵衣。吞聲說離亂。辛苦客逃歸。誰信勤王檄。都成烏合徒。兵篋紛白劫。國鬢哭朱儒。張豚當螳臂。空譚墜虎鬚。計窮惟矢死。一死豈償辜。都統開牙治。威儀比漢官。共和成宙合。餘怒及師團。錦繡千人繖。琅璫大吏冠。更留鞭血地。說付賊民看。古有蚩尤霧。師君又水仙。未聞召金狄。幾欲死蒼天。照影神人鏡。彈詞瞽女絃。併歸妖亂志。傳述太平年。

京亂補述六首

王屋沈沈者。翻聞篝火鳴。潢池紛盜弄。枉矢竟流行。白陪天魔舞。丹書鬼卒名。人言十常侍。內應早連盟。一炬咸陽火。羣飛京洛塵。自天來劍俠。無地立環人。囊射匈奴血。鞭麾小婢神。將軍三十六。妖服盡黃巾。天竟生積禍。人爭唱董逃。空聞宣虎節。莫肯解牛刀。舉國成狂病。羣官作賊曹。驢王兼狗相。踴躍喜同袍。萬國紛馳檄。傳聞客館攻。魚枯將海涸。龍睡尙天聳。雷門槍雲黑。星飛彈雨紅。不堪掘殘冢。肆虐到神叢。亦有誅奸疏。泣陳王室憂。裂麻要帝諾。攀檻碎臣頭。月暈蓬星見。山傾鐵血流。終看胡騎入。扶眼在城樓。熱鐵飛輪下。城門牡早亡。手持忘玉璽。事誤泣金牀。棄甲逃神將。函頭索賊王。虜塵重擾擾。又換八旗揚。

京師

鬱鬱千年王氣旺。中間鼎盛數乾嘉。可憐一炬成焦土。留與東京說夢華。鸚鵡來巢公在野。鷓鴣毀室我

無家登城不見黃旗影。獨有斜陽咽暮笳。

三哀詩

哀袁爽秋京卿

士生板蕩朝。非氣莫能濟。國家有妖孽。尤貴養正氣。公官典客時。正值艱難際。初言義和拳。本出大刀會。先皇鑄九鼎。早既斥魑魅。明明白蓮教。遺孽傳苗裔。邪術金鐘罩。不過弄狡獪。宗社三百年。豈可付兒戲。繼言諸大國。各有白馬誓。預儲大萬金。始可戮一士。矧持英蕩來。堂堂大國使。一客不能容。反縱瘦犬噬。問罪責主人。將以何辭對。封事兩留中。痛哭再上疏。彼賊敢橫行。實挾朝貴勢。奈何朝廷尊。公與匪人比。盲師糊塗相。驕將偃蹇吏。擲國作孤注。作事太憤憤。速請黃鉞誅。無得議親貴。幸清君側惡。斧鉞臣不避。當璧天子父。不敢爲尊諱。天潢盜弄兵。語直斥王字。嗚呼批鱗難。況觸投鼠忌。朝衣縛下獄。衆口咸詬詈。白刃露霜鋒。黃巾走塵騎。阿師呼大兄。紅帶夾道侍。謹譁殺二毛。萬頭相傾擠。公甫下囚車。拜問臣何罪。刑官縱馬來。大罵囚無禮。豈容發口言。指天復畫地。呼天聲未終。滾地頭已墜。惡耗四海傳。何人不雨淚。識公十數年。相見輒倒屣。追述潘鄧說。許我以國器。公贈詩有云。孺初伯訥。孤標說士推。君器後凋之句。同輩六七賢。推公最強記。喜談佛老學。語我求出世。知公真名士。不獨善文藝。未知比干心。竟爲直諫碎。我實知公淺。負負心內媿。馬關定約後。公來謁大吏。青梅雨翛翛。煮酒論時事。公言行篋中。攜有日本志。此書早流布。直可省歲

幣我已外史達。人實高閣置。我笑不任咎。公更發深喟。今日讀公疏。倘得行公意。四百五十兆。何至貽民累。不獨民累祛。中國咸受惠。卽彼附賊徒。亦緩須臾斃。斥公助逆人。黃泉見亦悔。蒼蒼天九重。今尙浮雲蔽。痛公不言隱。開卷輒流涕。盜首旣伏誅。知公不爲厲。定爲社稷憂。騎龍謁天帝。

哀吳秀清明府

世界隨轉輪。成壞各有劫。適值傾覆時。萬法不必說。以君循吏才。三年官於越。無端桴鼓鳴。伏莽寇竊發。山縣斗大城。城頭黑雲壓。紛紛彼狼心。躍躍欲豬突。君昔理常平。手曾治大猾。鴟音不能革。生性成樞机。到此播流言。官實通賊牒。作賊兼作官。滿城耳喧聒。城中西教徒。積惡鬼羅刹。閃閃蒼鷹眼。磨刀咸欲殺。公知事不可。大聲作曠喝。反激蚩蚩怒。一霎盡滅裂。非無防禦使。蠢蠢怯如鼈。噤不發一言。坐視民劫奪。此客甫斷頭。彼奴復流血。亂刃白雨點。混殺到手滑。獠犬狂號跳。奔馬肆蹄齧。但是縣衙人。一見輒摧挫。郎當子若孫。衣破腳不襪。同寮不肯留。望門走托鉢。指名徧搜牢。牽髮互辯結。驅羊入屠肆。執箠尙鞭撻。天堂變地獄。肉花碎片割。同時遭荼毒。彼此造何業。君一家遇難後並尸於天主堂中教士被害者共六人少婦幼兒皆以刀割其肉肉既盡乃斃之君當就縛時。自知當永訣。上念我佛恩。如何得解脫。下傷我母慈。如何保生活。可憐八十母。蕭條幾黃髮。追憶六年前。春酒壽筵設。君披宮錦袍。手執先朝笏。公瑾與伯符。同年小一月。我歌壽人曲。登堂來拜謁。孫曾六七枝。一一芝蘭茁。最小耳銀璫。顰面白勝雪。誰料綵衣舞。回旋僅一瞥。覆巢無完卵。雛鳥鳴亦絕。

聞今既半年未悉子存歿。家人畏驚倒。相戒咸結舌。入則圍紅裙。出乃易墨經。母尚倚閭望。朝夕拜菩薩。念子歸何遲。此別太契闊。家人讒以太府調往勸賊告其母。豈知望子臺。早既堆白骨。以君精佛理。夙通一切法。明知入世事。如露如泡沫。佛力猶有盡。何況身生滅。將頭臨刃時。定知不驚怛。獨怪耶穌教。瓣香未曾爇。如何偕教徒。一例受磨折。觀君遭萬變。已足空一切。只有黃鳥歌。哀吟代嗚咽。

哀唐韋臣明經

嗚呼漢家厄。十世到我皇。上承六七聖。德澤徧八荒。虜裘三月政。謳歌不能忘。忽傳有疾詔。徧求千金方。千人萬人和。重鼓女媧簧。珠襦坐武帳。奔走何踴躍。神鵲銜果來。天女實發祥。今當堯舜朝。益宜簡元良。恩賜太子衣。有心見雁涼。惻惻君弦聲。晨寒哀履霜。瀛臺百尺高。遠隔海中央。齊東野人語。傳說多荒唐。賊相與警師。髮短心甚長。亟欲奉前星。高置中宮旁。豬王一無知。好勇徒強梁。羣小爭擁戴。妄誇國富強。待封狼居胥。同進萬年觴。天適降神人。人人空拳張。張我虎神威。何難驅羣羊。家家白蓮花。滿城吹迷香。直挑強鄰怒。橫縱國人狂。各國會師來。長驅莫敢當。遂令春秋筆。天王狩河陽。嗚呼當此時。國勢如螭蟻。東南外諸侯。亟亟宜勤王。上以肅宮禁。下以靖機槍。外以杜鄰責。免索歲幣償。奈何裘蒙戎。失路迷俚俚。轉令一匹夫。起爲董公倡。遙聞誓羣師。風雲奉龍驤。多魚忽漏言。一網歸淪亡。畫虎竟不成。刳羊亦無益。成敗非所論。此志良可傷。人言祕篋中。別藏法三章。意實主民權。假託尊王綱。又言三日穀。縱兵肆跳踉。

擄掠得幾何。概許歸囊囊。是皆莫須有。祕獄誰能詳。江南羣盜藪。紛紛說連衡。倘若出此策。自毀周身防。鑄鐵成大錯。引刀還自戕。明明勤王師。轉以賊名揚。君魂果銜冤。被髮訴帝鄉。援枹率犀甲。號召諸國殤。請帝乘白龍。還我蒼天蒼。芒芒此禹域。滔滔彼漢江。君聽人間謠。處處歌堂堂。

### 和平里行和邱仲閣

潮陽縣有碑曰和平里。碑九尺許。每字高二尺許。小字九。曰宋廬陵文山文天祥題。和平里不見於宋史。惟鄧光薦丞相傳云。公駐和平市。攻陳懿。黨意後隔海港步騎。未能遽前。而陳懿乃迎導北師。張弘正潛具舟濟。輕騎直造督帳。劉岳申傳云。公方飯五坡嶺。步騎掩至。公不得脫。服腦子不死。衆擁之上。馬見張弘正於和平。大罵求死。和平蓋即此地。初潮之士民請公移行府於潮。公進潮陽。誅懿。黨劉興。適鄒溫。劉子俊等。亦以民兵數千自江西至。指南錄所謂稱平羣盜。人心翕然。即此時事。鄧中甫云。因潮之民阻山海之險。使假以歲月。增兵峙糧。以立中興之本。亦吾國之莒卽墨也。乃逆懿懼誅。潛師夜襲。卒陷絕地。謂非天乎。公於祥興元年十一月屯潮陽。即住和平市。十二月十五日趙海豐入南嶺。二十日被執。越七日入虜營。討逆寇於此。見處帥亦於此。先後凡一月。有奇。里人獲公書。珍襲而摹刻之。以公忠義之氣。感人之深也。百世下猶興起。况親見公書者耶。固其宜也。仲閣歸自壘灣。客於潮。作詩寄余。歲暮感事。因追和之。距文山住此時六百二十四年矣。庚子歲除前三日。

豐碑巍巍土花碧。大書和平字深刻。此鄉曾駐勤王師。下馬來拜文信國。澄潭小渚風不波。奇卉美箭枝交柯。手攜酒壺背釣簑。彼是文山安樂窩。日氣火氣蒸溼暑。人聲鬼聲雜風雨。身倚窮牆立圓土。此乃南冠囚繫處。少日里居殊安康。中年國難多搶攘。最公一生所踐履。大都惶恐灘與零丁洋。紅塵蔽天走胡騎。海水羣飛無立地。飄流絕島君若臣。行在朝衣頻拭淚。自從辛苦賊中來。萬死一生艱險備。今夕何夕

夢稍安。此身卻在和平里。想見淋漓落筆時。滿腔攪轡澄清志。八千子弟方募兵。欲倚卽墨復齊城。有田有成衆一旅。天若祚宋期中興。靡崖上刻浯溪頌。安知不畧臣結名。崖山一哭舟盡覆。公竟囚車隨北征。吁嗟乎。從古未聞純是夷虜世。德祐卽位。大后詔中語。翦分鶉首天何醉。撥亂無聞平賊功。刼盟莫講和戎利。邱生吾與汝。坐視金甌缺復碎。想公馳檄召勤王。對我父老愧欲死。公魂歸天在柴市。今日鄰軍猶設祭。矧公畫日親筆書。字字風霜留正氣。孤城隱隱烟霧遮。大江濺沫飛春沙。指南錄集杜駐潮陽云。寒城朝烟淡。江沫擁春紗。寒山片石月來照。中有光芒非公耶。



# 人境廬詩草卷十一

## 聶將軍歌

聶將軍名高天下聞。虬髯虎眉面色赭。河朔將帥無人不愛君。燕南忽報妖民起。白晝橫刀走都市。欲殺一龍二虎三百羊。是何鼠子乃敢爾。將軍令解大小團。公然張拳出相抵。空拳冒及口喃喃。礮聲一到駢頭死。忽來總督文。戒汝貪功勳。復傳親王令。責汝何暴橫。明晨太后詔。不許無理鬧。夕得相公書。問訊事何如。皆言此團忠義民。志滅蕃鬼扶清人。復言神拳斫不死。自天下降天之神。國人爭道天魔舞。將軍墨墨淚如雨。呼天欲訴天不聞。此身未知死誰手。又復死何所。大沽昨報礮臺失。詔令前軍作前敵。不聞他軍來。但見聶字軍旗入。復出雷聲聒聒起。起處無處覓。一礮空中來。敵人對案不能食。一礮足底轟。敵人繞床不得息。朝飛彈雨紅。暮捲槍雲黑。百馬橫衝刀雪色。周旋進退來夾擊。黃龍旗下有此軍。西人東人驚動色。敵軍方詫督戰誰。中旨翻疑戰不力。此時衆團民。方與將軍讎。阿師黃馬絰。車前鳴八驕。大兄翠雀翎。衣冠如沐猴。亦有紅燈照。巾幗羸兜鍪。昨日拜賜金。滿車高甌窶。京中大官來。神前同叩頭。懿旨五六行。許我爲同仇。獎我與甲兵。勉我修戈矛。將軍願輕我。將軍知此不。軍中流言各譁譟。作官不如作賊好。諸將竊語心膽寒。從賊容易從軍難。人人趨叩將軍轅。不願操兵願打拳。將軍氣湧徧傳檄。從此殺敵

先殺賊。將軍日午罷戰歸。紅塵一騎乘風馳。跪稱將軍出戰時。闔門衆多僂羅兒。排牆擊案拖旌旗。嘈嘈雜雜紛指揮。將軍之母將軍妻。芒籠繩縛兼鞭笞。驅迫泥行如犬雞。此時生死未可知。恐遭毒手不可遲。將軍將軍宜急追。將軍追賊正馳電。道旁一軍路橫貫。齊聲大呼聶軍反。火光已射將軍面。將軍左足方中箭。將軍右臂幾化彈。是兵是賊紛莫辨。黃塵滾滾酣野戰。將軍麾軍方寸亂。將軍部曲已雲散。將軍仰天泣數行。衆狂仇我謂我狂。十年訓練求自強。連珠之礮後門鎗。禿襟小袖氍毹裝。蕃身漢心庸何傷。執此誣我讒。口張通天之罪死難償。我何面目對我皇。外有虎豹內豺狼。警警犬吠牙強梁。一身衆敵何可當。今日除死無可望。非戰之罪乃天亡。天蒼蒼野茫茫。八里台作戰場。赤日行空飛沙黃。今日披髮歸大荒。左右攙扶出裏瘡。一彈掠肩血滂滂。一彈洞胸胸流腸。將軍危坐死不僵。白衣素冠黑襦袴。幾人泣送將軍喪。從此津城無人防。將軍母年八十。白髮蕭騷何處泣。將軍妻是封君。其存其歿家莫聞。麻衣草屨色憔悴。路人道是將軍子。欲將馬革裹父屍。萬骨如山堆戰壘。

夜起

千聲簷鐵百淋鈴。雨橫風狂暫一停。正望雞鳴天下白。又驚鵝擊海東青。元楊允孚灑京雜詠新腔翻得涼州曲彈出天鷲避海青自註

曰海青擊天鷲新聲也海東青者出於女真遂極重之

沈陰曠曠何多日。殘月暉暉尙幾星。斗室蒼茫吾獨立。萬家酣夢幾人醒。

羣公

羣公袞袞各名聲。一死鴻毛等重輕。事事太阿權倒授。人人六等罪分明。兵威肯薄牽牛罰。黨論猶嗟走狗烹。聞道諫臣歸骨日。柳車迎拜極哀榮。

遁逃無地呼無天。到此惟餘冒及拳。啓秀徐承煜爲聯軍所拘。卒見殺。廷雍亦被殺。甲仗空迎回紇馬。聯軍入保定。廷雍出迎之。血衣竟染漢

臣鞭。操戈逼父心先死。聯軍入城後。承旭託名保家。按劍呵人。目尙懸。殺許侍郎袁大常之詔。實出啓

立鷹麟旗夾道。看君忍辱赴重泉。啓秀伏法時。八國各以兵押送。均閉目不視云。

各戴頭顱萬里行。九州無處可偷生。上尊猶拜養牛賜。五鼎先看福鹿烹。莊王在蒲州。趙舒翹及英年在西安。皆賜死。斷獄總

應名國賊。犯顏猶記與天爭。有諡稱首禍諸臣。叫囂。傷心禍首兼戎首。萬骨雖枯恨未平。毓賢戍新疆。行至蘭州。伏誅。

途窮日暮更何求。白首同拚一死休。銜及尙希忠烈傳。蓋棺免索太師頭。剛殺徐桐。李秉衡皆自盡。慧星掃地應除舊。

禍水滔天幸絕流。九廟有靈先詔在。朝衣趨謁定增羞。嘉慶癸酉八月。上以遇變下罪已詔。中有教匪變生肘腋。實由諸臣釀成。漢唐宋明未有之變云。

奉諭改於八月二十四日回鑾感賦

翹首齊瞻輦路塵。又遲鑾駕阻時巡。翠華望徧今天下。玉璽猶持一婦人。萬里河難塞瓠子。諡稱雨潦難行。且河決沖

方改造云。九霄星未轉鉤陳。三公一國狐裘賦。誰是安危社稷臣。

和議成誌感

天平叔帶召戎來。舉國傾危九廟哀。拳勇竟遭王室亂。首謀尙縱賊人魁。謂革王載漪未死。失民更爲叢毆爵。畢

世難償債築臺。坐視陸沈誰任責。事平敢望救時才。

啓鑾喜賦

千官萬騎奉龍輿。蹕路交闈扈從忙。罪首既誅昏墨賊。民心猶戴往黃皇。神靈擁護華輿穩。父老歡迎麥飯香。回首南山宮闕峻。定知在莒永無忘。

車駕駐開封府

竿摩轍亂逼西遷。瑣尾離流倏一年。奉母蒙塵猶在鄭。迎王望雨待歸燕。諸侯香草方氈幕。西母蟠桃又綺筵。舉首長安知日近。肯留河上再遷延。

李肅毅侯挽詩四首

駱胡曾左凋零盡。大政多公獨主持。萬里封侯由骨相。中書不死到期頤。壓弧卒挽周衰德。華袞優增漢舊儀。賜方龍補服。歷來漢官所未有。他如賞紫纁。賜三眼花翎。於京師建專祠。均異數也。官牒牙牌書不盡。蓋棺更拜帝王師。

連珠巨礮後門鎗。天假勳臣事業昌。南國旌旗三捷報。北門管鑰九邊防。平生自詡揚無敵。諸將猶誇石敢當。何意馬關盟會日。眼頭鉛水淚千行。

畢相伊侯久比肩。外交內政各操權。撫心國有興亡感。量力天能左右旋。赤縣神州紛割地。黑風羅刹任飄船。老來失計親豺虎。卻道支持二十年。公之使俄羅斯也。遵憲謁於滬上。公見語曰。連絡西洋。奉制東洋。是此行要策。及膠州密約成。歸又語遵憲曰。二十年無事總

可得也。

九州人士走求官。婢膝奴顏眼慣看。滿篋謗書疑帝制。一床踞坐屬儒冠。總無死士能酬報。每駭言官更耐彈。人哭感恩我知己。廿年已慨霸才難。光緒丙子余初謁公公語。鄭玉軒星使許以霸才。

### 寄題陳氏靖廬

前者主人翁。我曾侍杖履。後者繼主人。雁行我兄弟。滔滔大江流。前水復後水。一息不停留。百川互輸委。翁昔笑倚欄。早識生滅理。蓬蓬馬鬣高。萬古藏于是一。官甫歸來。乃無託足地。生當大亂時。忠賢或祈死。人至以死祈。世事可知矣。嗟嗟我華種。受生卽患始。盡是無父人。呼天失怙恃。弱肉供強食。誰能保沒齒。翁今順化去。萬事責可已。呼龍下大荒。倘作神遊戲。屋後瘞鶴銘。是翁記默示。階前紅杜鵑。是子所染淚。鶴塚鵲巢間。乃我寄題字。揣翁垂愛心。萬一肯留視。

負牆一病叟。吞聲幾欲哭。居此三四世。手執茅衣屋。作犬不守門。作猿不升木。坐令田荒蕪。萬事付手束。自官教我耕。暫學種蔬菽。橫縱濟盡通。方整帛有幅。門前桑竹茶。坐我樹陰綠。攜兒甫雞鷄。反盎有餘粥。倘官遂設施。庶幾一年蓄。何期麥嘗新。不及今茲孰。炭船泝湘來。篙工偶託足。稱官老陳米。意比凶年穀。長沙露行客。肩桃笑歌逐。城中諸婁羅。莫敢侵半菽。沈沈石墨緣。窮搜到地軸。家家易金歸。樂禍天雨粟。人人他不知。只知小人腹。帝清愛下民。賴官錫民福。官胡棄民歸。世亦嫌薄祿。江神夾海若。蹴我國日盛。

無人救飢溺。聽我飽荼毒。社時操豚蹄。待向墓前祝。

病中紀夢述寄梁任父

陰風颯然來。君提君頭顱。自言逆旅中。倏遇狙擊狙。閃電及一揮。忽如絳市蘇。道逢兩神人。桃雲上天衢。此挹塞民袖。彼褰烈士襦。邂逅哭復歌。互託今何如。君言今少年。大罵余非夫。當服九世讎。折箠笞東胡。逐逐揮日戈。彎彎射天弧。孰能張網羅。盡殺革命徒。汝輩主立憲。寧非愚欲迂。我方欹枕聽。鳴雞亂驚呼。殘日掛危簷。猶照君肩須。遙知白日光。明明耀子軀。子魂渡海來。道有風波無。蛟螭日攫人。子行猶坦途。懸金購君頭。彼又安蔽辜。在在神護持。天固弗忍誅。君頭倚我壁。滿壁紅模糊。起起拭目看。噫吁瓜分圖。我生託此國。舉國重科第。記昔持墨卷。出應羣兒試。夢謁文宣王。旁立朱衣吏。手指平頭憲。云是汝名字。爾時意氣盛。年少矜爪嘴。謂彼牛醫兒。徒一唐名士。不如黨錮傳。人人主清議。汪汪千頃波。陋比涔蹄水。捧龜詬天呼。區區竟余畀。烏知當是時。東海波騰沸。攘夷復尊王。僉議以法治。立憲定公名。君民同一體。果遵此道行。日幾大平世。我隨使槎來。見此發深喟。嗚呼專制國。今既四千歲。豈謂及余身。竟能見國會。以此名我名。蒼蒼果何意。人言廿世紀。無復容帝制。舉世趨大同。度勢有必至。懷刺久磨滅。惜哉吾老矣。日去不可追。河清究難俟。倘見德化成。願緩須臾死。

子今歸自美。云夢俄羅斯。憤作顛倒想。故非痴人痴。中原今逐鹿。此角復彼犄。此鹿竟誰得。夢境猶迷離。

遼東百萬家。戰黃血淋漓。不特薄福龍。重重圍鐵圍。哀彼金翅鳥。毛羽咸離披。方圖食小龍。展翼漫天池。鼓衰氣三竭。徧體成瘡痍。吁嗟自專主。中餓條約中之稱天鑒明在茲。人人自爲戰。人人公忘私。人人心頭血。濡染紅日旗。我今託中立。竟忘當局危。散作鎗礮聲。能無驚睡獅。睡獅果驚起。牙爪將何爲。將下布憲詔。大阿知在誰。我慚加富洱。子慕瑪志尼。與子平生願。終難償所期。何時睡君榻。同話夢境迷。卽今不識路。夢亦徒相思。

# 跋

右詩十一卷。先兄手自裒集而未付梓。自先兄下世。海內文人學士。折柬相追。欲讀其詩而知其人者。迄無虛歲。雖然。先兄著述。初行於世者。曰日本雜事詩。所以覘國情。紀風俗。譯署之官版也。日本國志。所以述職。知所駐國之形勢變遷。由於世界各國之形勢變遷。相逼而成。則本國之從違。當求合於世界各國之形勢。以爲斷。故其分門別類。勒成全書。亟自刊行者。意在於借觀隣國。作匡時之策也。先兄之書。至今談時局者。未嘗不推崇之。而先兄之遇。每奪於將行其志。卒至放棄。且以憂死。終其身皆仰成於長吏。未嘗有獨當方面。以行其所懷抱者。其於詩也。雖以餘事及之。然亦欲求於古人之外。自樹一幟。嘗曰。人各有面目。正不必與古人相同。吾欲以古文家抑揚變化之法。作古詩。取騷選樂府歌行之神理。入近體詩。其取材以羣經三史諸子百家。及許鄭諸註爲詞賦家不常用者。其述事以官書會典方言俗諺及古人未有之物。未闢之境。舉吾耳目所親歷者。皆筆而書之。要不失爲以我之手。寫我之口云。故其詩散見於字內者。輒爲世人所稱頌。以非詩人之先生。而使天下後世僅稱爲詩界革命之一人。是豈獨先兄之大戚而已哉。遵楷不肖。不能繼承兄志。有所建樹。讀先兄病篤之書。謂平生懷抱。一事無成。惟古近體詩能自立耳。然亦無用之物。到此已無可望矣。嗚呼。先兄之不忍爲詩人。而又不得不有求於自立之道。其愴



懷身世爲何如耶。今海內鼎沸。干戈雲擾。距先兄之下世者。僅六歲耳。先兄之不見容於當時。終自立於無用之地位。先兄之不幸。抑後於先兄者之不幸耶。然則先兄之哀集已竟。所不欲以付梓者。吾亦從而校讐以刊行之而已。夫復何言。辛亥九月五弟遵楷牖達謹跋。

